

[

週年默想 第三冊

N° 416

MG
B976.
726
2:2



3 1773 3641 3

週年默想

Nº 416

2000 4-37

MEDITATIONES QUOTIDIANAE

IN TOTUM ANNUM

Auctore: P. Vercrnysse, S. J.

Translatoribus: P. Joanne-Baptista Hiu. 許 禾 白

P. Andrea Tsiang, S. J. 蔣 邑 虛

— • —
上海主 教 惠

准

一
千
九
百
三
十
七
年

上海土山灣印書館第二版印

週年默想目錄第二冊

卷四 四月

第一	聖女瑪達肋納等赴聖墓……………	一	第十二	耶穌顯現諸徒……………	二八
第二	天神報耶穌復活……………	三	第十三	吾主三祝平安……………	三一
第三	耶穌現於瑪達肋納……………	六	第十四	耶穌發遣諸徒……………	三三
第四	耶穌現於二位聖女……………	八	第十五	聖若瑟大主保……………	三六
第五	二徒往視主墓……………	一一	第十六	憂愁喜樂殊途……………	三九
第六	耶穌現於聖伯多祿……………	一三	第十七	多默不信耶穌復活……………	四二
第七	二徒往村遇主……………	一六	第十八	耶穌顯現於多默……………	四四
第八	主爲人靈善牧……………	一八	第十九	多默回心認主……………	四七
第九	耶穌訓迪二徒……………	二一	第二十	耶穌現於海濱……………	四九
第十	二徒留主偕宿……………	二三	第二十一	一網多魚之異跡……………	五二
第十一	二徒目明認主……………	二六	第二十二	吾主許遣聖神……………	五五
			第二十三	炭火上餅魚之異跡……………	五八
			第二十四	主三問伯多祿……………	六〇
			第二十五	呼徒從實徒問……………	六三

第二十六	主現五百人衆	六六	第五	選徒以補茹答之缺	九九
第二十七	遣徒往誨萬民	六八	第六	聖神恩寵之需	一〇二
第二十八	底定聖教事宜	七一	第七	續思神恩之要	一〇五
第二十九	祈主宜有倚望	七四	第八	聖神降臨之向	一〇七
第三十	三天祈禱之禮	七六	第九	聖神降臨之近備	一一〇
第三十一	吾主末次顯現	七九	第十	聖神降臨瞻禮	一一三
第三十二	總思吾主顯現	八二	第十一	聖神降臨之時地效驗	一一六
第三十三	耶穌升天瞻禮	八五	第十二	聖神降臨之形像	一二九
卷五 五月					
第一	九日敬禮之緣	八九	第十三	聖神變化宗徒	一二二
第二	九日敬禮之式	九二	第十四	聖伯多祿講道	一二四
第三	聖神偕徒證主	九四	第十五	聖神感化新進之人	一二七
第四	宗徒祈禱之式	九七	第十六	聖神恩寵之奇	一三〇
			第十七	天主聖三瞻禮	一三二
			第十八	信靈締結聖三	一三五

第十九	聖號提億聖三……………	一三八	初二日	耶穌受洗示表……………	一七二
第二十	敬禮聖心之意義……………	一四一	初三日	耶穌四旬嚴齋……………	一七四
第二十一	聖心之至愛……………	一四三	初四日	耶穌三被魔誘……………	一七七
第二十二	聖心之潔淨……………	一四六	初五日	人生難免誘惑……………	一八〇
第二十三	聖心之謙遜……………	一四九	初六日	若翰顯證耶穌……………	一八二
第二十四	聖心之順命……………	一五二	初七日	耶穌初召門徒……………	一八五
第二十五	聖心之良善……………	一五五	初八日	納大厄爾見主……………	一八八
第二十六	聖心之慷慨……………	一五七	初九日	耶穌赴筵示異……………	一九〇
第二十七	聖心之神火……………	一六〇	初十日	耶穌別母招徒……………	一九三
第二十八	聖心之慈憫……………	一六三	十一日	初淨都城聖殿……………	一九六
第二十九	敬聖心於聖體……………	一六六	十二日	倪閣德睦問道……………	一九九
卷六 附月			十三日	若翰門徒妬主……………	二〇一
			十四日	傲爲諸罪之宗……………	二〇四
			十五日	謙遜之性謙遜之要……………	二〇七
			初一日	人宜日進於德……………	一六九

十六日	謙遜之利益性質……………	二〇九
十七日	進修謙遜之法……………	二一一
十八日	耶穌乞水化人……………	二一四
十九日	西加城人信主……………	二二七
二十日	耶穌愈王子之疾……………	二二九
二十一日	居加法爾納翁……………	二二二
二十二日	起伯多祿妻母於病榻……………	二二五
二十三日	愛人須間行禱主……………	二二七
二十四日	從主宜別無依戀……………	二三〇
二十五日	耶穌渡海止風息浪……………	二三三
二十六日	耶穌驅魔汚魔求入豕羣……………	二三五
二十七日	耶穌起癱瘓證赦……………	二三八
二十八日	耶穌召瑪竇爲宗徒……………	二四〇
二十九日	精修聖召之尊貴……………	二四三
三十日	雅依祿女復活……………	二四六
六月二十一日	聖類思公撒格……………	二四八

卷四 四月

月省之思

罪惡

見卷二第十三題

首瞻禮六

聖心之謙遜

見卷五第二十三題

第一 聖女瑪達肋納等赴聖墓

耶穌復活後第一主日

定像 想見聖女瑪達肋納等攜香料前往聖墓。

特求 求主賜我聖寵，增我愛主依主之情，勇於奉行天主之事。

第一端 瑪達肋納等同赴聖墓 耶穌死後第一日，爲如德亞大禮

之期，罷工之例甚嚴。故聖若望等埋葬耶穌，以香料傳於聖軀，草草畢事，未能盡致。聖女瑪達肋納、雅各伯之母瑪利亞及瑪利亞撒落默等於心不忍，購備香料，欲再傳聖屍，以盡其愛主之情。是以禮期之翌日，天未曉，三人不憚早行，不畏守卒，齊赴聖墓。試問二三婦人，

烏得如此勇敢。因其愛德之大愛情之熱故也。我苟亦有愛德、凡榮主救靈之事、必不畏難而不行。卽一切神靈之功、亦必遵行惟謹、而勇於進德。嗚呼天主、我心冷淡寔甚、亦可痛也。仰懇吾主、薰炙我心、賜我聖寵、與聖依納爵同求爾云、惟以愛爾誠心、及爾聖寵洪錫俯賜於我、我卽充裕富饒、不圖外物、亞孟。

第二端 瑪達肋納等互相告語 耶穌旣葬、以大石掩墓門、善爲封閉、又有兵丁防守。聖女等欲傳聖軀、力不能去石、將若何。因相告曰、噲爲我移去大石。語際、仍急步前行。專心致志、冀得遂其意願、而始快。噫、何其勇敢。我遵天主聖命、行我素志、偶有艱難、心生畏憊、當效法三聖女勇往直前、切不可中道廢止。況我力所不逮者、求之天主、必蒙默助、何畏之有。然自省平日之言行、有大謬不然者。今定志改

悛，不至始勤終怠。

第三端 墓門大石已去 聖女未至聖墓，地忽震動，天神下降，掀開墓石，守卒則紛紛逃竄。迨聖女抵墓，見大石已去，喜不勝言。余靈於此可見天主仁慈，終不負人所望也。人苟忠心事主，必得所願。保祿宗徒云，望之於無望之地，天主將行奇蹟以救之。但不可妄恃天主，宜盡己力之所能行，乃可。雖然，倚恃天主，當遠勝於恃己之心。自今而後，我當常賴天主，斯永不負屈矣。 祝言

第二 天神報耶穌復活

瞻禮二

定像 想見天神衣白如雪，安慰聖女瑪達肋納等，告以耶穌復活。特求 求天主賜我心神安樂，倍增愛主真情。

第一端 天神安慰聖女 聖女見天神如白衣少年，安坐墓中，乃大

驚天神告曰、勿驚。爾覓被釘之耶穌、納匝肋諾、已復活、不在此矣。卽此數語、可見聖女之驚怖、天神之安慰。夫同是天神、頃者恐嚇兵卒、直至因驚而逃竄。茲則安慰聖女、令之弗懼。何前後之懸殊、一至於斯。其故何者、因兵卒與聖女之心、善惡不同耳。天神喻聖女曰、勿驚。因其覓被釘之耶穌。可知凡人惶怖、當祈禱於耶穌苦像前、乃得真慰。我自思之、每求慰於虛妄之事、不亦惑哉。今我定志、以後心神擾亂、必求慰於被釘之耶穌。

第二段 天神報耶穌復活 天神曰、耶穌已復活、不在此。爾等何故於死者中、尋生活者耶。聖女入墓、果不見耶穌。按耶穌復活、爲靈魂復活之式。夫靈魂之死、必靈魂盡失聖寵。卽習犯小罪、而不知改悛、亦生如未生。故非勉力復活、不可。我自思之、一切語言動作、神功德

業、徒循故事、不知振作。今願奮袂而起、似夢初醒、一改平時之疎忽。當此大瞻禮良辰、聖寵必不缺乏。惟須善用聖寵、乃能遵保祿遺訓、脫去舊日之人、頓改往時之行。

第三端 天神命報宗徒 天神告聖女曰、往語宗徒、耶穌已復活。大哉、天主之仁慈、耶穌受難時、宗徒多離散。耶穌既死、諸徒不望耶穌復活。惟窮愁自苦、一若此生百事傾頽、毫無所望。以人情而論、諸徒宜見棄於主、或受主譴責。然而吾主仍施恩惠、遣天神轉囑聖女報復活之信、以慰藉之、并匡正輔翼之。噫、聖心之仁慈、誠出人意想外哉。我自思之、久矣忘主聖言、辜負主心、應受吾主懲創。然至今仍受本性超性無數洪恩。如此仁愛、將何以報。惟有痛改前日之非、發熱愛之情、獻我善志、認我劣弱。求主扶佑、俾得仰報於萬一。祝言

第三 耶穌現於瑪達肋納 瞻禮三

定像 想見聖女瑪達肋納望主墓而哭，主現而慰之。
特求 求主賜我與於聖女信愛諸德，及神樂之情。

第一端 瑪達肋納獨留墓側。瑪利亞雅各伯母及撒落默各如天神之言，歸見宗徒，告以耶穌復活。獨瑪達肋納徘徊不忍去，以耶穌前葬斯墓，今不得復見，又不知所在。斯時聖女真如窮人，無所歸依。於是眼望耶穌墓穴，口誦耶穌聖名，念念思慕耶穌，不禁涕淚交流，痛哭不止。是乃默想注禱之式也。我於此等神功，無多進境。神靈在天主前，毫不覺其振興，何哉？因物欲牽纏，偏私蒙蔽耳。正如多默更比所云，少有人存想天上事者，因少有人離棄易敗之物也。師主編

三卷三十一章 苟斷絕世緣，專心契主。庶幾於默禱之工，更上一層。

第二端 瑪達肋納見二天神 當瑪達肋納仰慕吾主、注想吾主、悲泣吾主時、雖知主不在墓、若望聖史述其猶俯身諦視墓穴、轉盼間、見二天神衣白衣、坐耶穌埋葬處、問曰、女人、何哭、對曰、因人擄去吾主、不知置於何地、可知聖女之涕泣悲傷、惟爲不見吾主、不知吾主何在、思我平日心憂志苦、多緣區區世物、不亦陋乎、至於神味之枯淡、心力之頹衰、吾主之何往、則毫不關情、擬於瑪達肋納、不亦抱慚無地乎、亟思有以復我初進修途時、所有之熱心。

第三端 瑪達肋納見主顯身 瑪達肋納含悲涕泣、願望吾主、吾主鑒其誠、而欲報之、適其與天神言際、轉身時、主問曰、女人、何哭、覓誰、聖女見是園丁、謂之曰、主、爾若携去之、請語我、置於何處、我將往取、耶穌曰、瑪利亞、聖女聞呼、卽知是主、遂曰、師、按吾主復活後、聖經載

其顯現，此爲第一。斯中，訓慰大矣。瑪達肋納原多罪過，何由得主殊恩特寵。曰：爲其愛情之熱，共主苦難之多，願見耶穌之切，尋求耶穌之勇也。問我於耶穌，何如乎。從今以往，熱我願見在天耶穌之心，發我真切愛慕耶穌之情。於事奉耶穌之行，徵我愛。示我勇。庶可望前愆之滌，主恩之洪也。賀聖女先見耶穌復活之歡。求主賜我效其熱心，與其福寵。祝言

第四 耶穌現於二位聖女

瞻禮四

定像 想見二聖女途中遇主，不勝驚喜。

特求 求主賜我心志怡愉，樂爲主事。

第一段 聖女歸告門徒 天神曾諭聖女往告主徒，言主已復活。斯時瑪利亞瑪達肋納仍留墓地，思慕之餘，先得見主。而瑪利亞雅各

伯母及撒落默二人，如天神言，急返城中，趨報諸徒。而二人亦同得吾主酌報，瞻吾主聖容，觀於此，可知主之恩錫，不定繫於一人一事。要觀人行事之誠心，設有二人，皆善用其時，一則誦經拜主，一則訓迪愚蒙，行雖殊迹，苟能同其善心，斯亦同功於主前，同蒙恩賞也。故我有正心美意，欲悅主心，卽行事從我所好，亦可得主賚錫。是乃上主仁慈之證。余也感激之餘，行事不忘誠正我心。

第二段 聖女途中遇主 二聖女聞天神語，往告徒等。主已復活，途中毫無延緩。如聖瑪竇紀，彼趨報諸徒，乃得主寵恩。現之曰：申爾福。聖女遂前，伏其足下，拜之。主曰：勿懼。往告吾弟，往加理勒亞見我。二十八篇至哉主仁，凡人愛主，存聽命之心，行敬主之事，主卽急行安撫之。曰：申爾福，頌爾安，爾可勿懼，往告吾弟。嗟，此劣信之徒，主猶稱

以吾弟。何聖心慈善若是。而不記人前日之愆忒耶。余靈當同聖女伏主足下。驚異其仁慈。而欽崇讚美之。并效主不念舊惡之仁心。

第三端

徒等疑主復活

徒等聞聖女報主復活。以爲妄言。俱不之

信。

路加二十四篇

夫吾主生前。曾謂門徒。已將受難受死。第三日復

活。今又得目見者爲證。而諸徒偏致疑若是。豈其信德喪亡。而甘心背主乎。曰。其惡固不至此。然信德昏蒙。言行乖舛。事有類於悖主。我也。信德昏蒙。行事乖戾者。亦爲時有之病。信主無微不照。日監在茲。而行動躁妄。往往觸其聖目。且傲慢同人。致傷愛德。噫。如此之信。適與不信等。今當圖改前非。求主助佑。不忘保祿宗徒之言曰。主爲贖我罪而受死。亦爲恩寵我而復生。致羅瑪人書四篇感謝稱頌之餘。求增我信德之光。祝言

第五 二徒往視主墓 瞻禮五

定像 想見伯多祿與若望二位宗徒，赴吾主聖墓。
特求 求主賜我聖寵，效法二徒之表。

第一端 二徒往墓 宗徒不信聖女之言，非無差等。伯多祿與若望離眾往視主墓，審驗復活之虛實。斯二徒之往，實隨理性之光，良心之引。他人卽有閒言，不之顧也。倘吾之行止，亦能如是，不惜人之訾議。惟良心理性，與天主聖意是從，豈非幸事。然撫躬自問，或因情面，或緣怠惰，起居動作，每附和劣行之徒，而不能自奮，不亦深堪痛惜。今求主光照我明，加增我力，庶幾從所當從，違所當違。而今而後，尙其勉之。

第二端 二徒急行 二徒赴聖墓，行愈近，步愈健。聖若望紀云二人

偕同趨往。二十篇急欲詣墓，知主究竟，因其心熱愛，故其行迅速，其力堅強也。余靈問爾行主事，守規誠盡職分，能有宗徒之敏捷剛勇乎。如曰能之，斯爲熱心之徵，可謝主而自慶。不然，則愧赧自惕，更當何如。恐力衰年長，歲月無幾。若因循不知自勉，雖有後悔，不可追矣。主責愈心之人曰：吾有懟恨於爾，因爾失初時之殷勤。默照經二十篇若然，則我之素行，恐亦將見責於主。尙其速除積習，自知奮勉，以補昔日之蹉跎。

第三端 若望知禮 聖若望年幼於聖伯多祿，精力強，步趨速，故先至主墓。然因敬聖伯多祿爲宗徒之長，不欲先進墓門。經記若望先抵主墓，而不入。迨聖伯多祿至，入墓先視。然後若望入視之。惟見殮布白布等，裹束吾主聖身諸物，而信主業已復活焉。若望二十篇夫

聖伯多祿因不知戒慎，曾陷背主之惡，而聖若望仍敬之如長上，不敢少衰。可謂知禮矣。故我於師長，不當視其本性之弱，宜重其代天主之尊。問我思言行事，居常能合斯道乎。主曰：聽爾者即聽予，慢爾者即慢予。思及於此，知事關非淺，可不慎哉。求主增我信望熱愛謙遜諸德。祝言

第六 耶穌現於聖伯多祿

瞻禮六

定像 想見聖伯多祿遇見耶穌，無任歡欣。

特求 求主賜我聖寵，能覺當時聖人所覺之情。

第一段 伯多祿自墓返 聖若望急步回城。聖伯多祿行後，存想吾

主諸事，而心異之。路加二十四篇蓋其默思吾主墓上諸奇，自覺衷情勃發，油然有渴望、敬畏、欣悅、哀痛、愛慕、愧悔諸意。轉念之間，百端

交集。此聖伯多祿遺人善表，訓我每獨行之際，或在家，或出外時，可沉思信德之一端。或思清晨默想之餘意，以增心靈之味，以動神愛之情，而有裨益於修身補過者，多矣。奈我蚩蚩無覺，不知自勉，惜哉。亟宜深心愧悔，時勤沉靜之修。

第二端 伯多祿蒙主顯現 保祿宗徒有言曰，吾主先現於伯多祿，後現於十一位。致哥林多人前書十五篇則是宗徒中見主顯現，惟伯多祿爲最先。奇哉！主恩之難測也。聖若望陪主至加爾瓦畧山，爲之送終殯葬。聖伯多祿三番背主，致干重罪。迨主復活，不先現於若望，而先現於伯多祿。且其顯現時，必有一番慰勉之語，使伯多祿信主已赦其罪，而感激殊深。嗚呼，奇矣。從可知天主於赦罪恩宥間，正顯天主之寬宏，其量至大，其宥至全，悉忘人之舊惡。人能真心悔改，

可望天主恩寵慈愛，一如未嘗獲罪者然。當偕達未聖王曰：余靈讚美主，主赦爾逆行者，主自死救爾者，主冕爾以慈憫矜憐者，雖不幸而多獲罪於主，終不失倚望之心。聖咏一百二篇

第三端 伯多祿固人信德。吾主先顯現於聖伯多祿者，因其爲宗徒之長，特欲保其權位，存其威望。故諸徒信主復活，每以伯多祿之證爲重。皆曰：主真復活，而現於西滿。路加二十四篇於是伯多祿堅他徒之信，符吾主之言。蓋曰：西滿，爾悔過後，固爾昆弟。路加二十二篇此又見天主之待人處事，至仁至善。我當稱頌讚美，留心取法。故見居尊位之人，偶有應得之咎，倘或我有規誨之分，慎無傷其名位。且罪不至宜公行補贖者，勿貶責於人前，亦勿詆訾於背後。卽與人私語，亦莫談論其短，致損其行事之權。問我素行，果何如乎？賀聖伯

多祿榮位之大。求主賜我師其見主時謙愛之情。祝言

第七 二徒往村遇主 瞻禮七

定像 想見吾主與二徒同行，二徒不識。

特求 求主賜我聖寵，俾行事不忘主監。

第一端 二徒往村 聖路加紀吾主復活本日，有二徒往厄瑪烏村，離京十餘里，互談近日之情。二十四篇二徒之所以往村者，因見主受難釘死，不勝憂鬱。人言吾主已復活，亦無影響，是以散步郊原，作消愁之計。而途中談論，仍不外吾主苦難情形，所以人當憂悶時，作出遊消遣，或解悶移情，固爲法所不禁。卽於修德之人，亦無不可。要觀其行之何如耳。若惟求慰於無益之戲談，浮華之習氣，則安慰終不可得，而反增獲戾之機。更可危者，任五官之放縱，恣一心之紛馳。

則又謬甚。而貽害益多矣。要知天主之外無真樂。世物之中無寔慰。余靈爾豈未嘗試之。求救前非。定志於閑散時。心目不離主監。

第二端 耶穌同行 談時。耶穌忽近同行。徒目不認。同上。吾主所以與徒同行者。因救靈心切。愛人情深。欲以正其誤。啟其愚。慰其憂。堅其信。使其多獲神益也。吾居家閒談時。或與外人酬酢時。一言一語。亦當裨益心身。使人與我交接之餘。亦能稍有善念。稍獲神益。此固我救靈愛人之定分。而爲人所願望於我者也。我乃至今怠忽。與人多游言浪語。能不抱愧於主前乎。定志於長談燕語之間。回心自省。更思如何而可裨益於己。有利於人。

第三端 耶穌慰問 主謂徒曰。行際相論何言。爾色何憂虞。曰。耶穌納匝肋諾。不知如何吾掌教士。及巨家顯人鳴官。使決刑釘死。吾皆

甚望彼果救贖本國。同上吾主明徹二徒隱念，何猶問之。蓋欲其自言之後，易於責其差謬，革其俗情，再訓以真實正理，更能悅服而有效也。倘我有誨人之職，於此可悟如何責人之失，如何迪人之蒙。宜詢問其人，使自述其事，得於言語中，自見已過。我復規之訓之，則人心自易聆受，而人之獲益，自能愈深而愈大。反是，不但不能開人之悟，適以觸忤而逢人之怒。求主增我愛德之熱，益我上智之明。祝言

第八 主爲人靈善牧 耶穌復活後第二主日

定像 想見吾主謂我曰，予乃善牧。

特求 求主賜我識主聖心之精蘊，而體味其情。

第一端 維時耶穌謂法利塞曰，予乃善牧。若望十篇於斯一言，吾主

顯己心意於人，欲人盡其心意以歸附之。蓋善牧者之於羊，其心思惟圖羣羊之益，防豺狼之害。一有逃亡，卽殷勤尋覓，迨獲而置之已棧，然後快。倘有疾疫，則愛心悄悄，一如與羊同病，惟恐醫治蓄養之稍懈。若夫吾主之爲我靈善牧，則其情之深厚，決不止萬倍於是。忘身以念我，甘貧以富我，茹苦以安我，捨生以活我。余靈當驚奇吾主之深情熱愛，而思以愛還愛，以心體心。定志於誘感艱屯之際，趨赴爾善牧前，庶幾有恃無恐矣。

第二端 予知予羊，予羊亦知予。同上此言吾主知人心曲，在奉教人與修道者之中，能知誰爲其羊，誰爲似羊非羊。誰爲惟有修德之名，徒以欺人爲事。誰爲能有修德之實，恒以敬主爲心。余靈，自省爾身果爲吾主之羊乎？抑或似羊非羊乎？羊隨牧後，爾能不離吾主，虔誠

敬愛聖體乎。羊聽牧聲，爾能聆主訓而從其默照，守其規誡，遵長上之言乎。羊性善良，爾能免欺妬乖戾諸病乎。由是思之，自可知爾乃似羊非羊，亦可知何修而爲吾主之眞羊。

第三端 予捨命爲予羊。同上傭人牧羊，惟在綏安無患之時。一有豺狼諸害，遂棄羊而走。任狼殺其羊，以致失散而不問。若夫善牧者之於羊，不惟綏安時常思撫字其羊，卽逢患而爲羊失命，亦所不惜。然則傭人與善牧，何如是之不同。蓋主嘗曰：傭人因爲傭人，惟求己利於羊無所用心。善牧者則其心甚愛己羊，而實願盡力保之也。傭人何指指法利塞也，彼於行事間，意念空虛，惟求榮譽。善牧者何，吾主自謂也。爲救人靈，捨生傾血，甘心受死。今我返躬自思，凡言行間，似乎敬主救靈。然果能殫忠竭慮，急修身之務，盡牧人之職乎。感主善

牧之恩、效主善牧之表。向羣羊之善牧耶穌、求賜助佑。 祝言

第九 耶穌訓迪二徒 瞻禮二

定像 想見吾主與二徒偕行、啟彼愚蒙。

特求 求主賜我聖寵、善聆聖訓、能忠心力行。

第一端 吾主貶責二徒 主徒格肋阿法謂吾主爲預達來事之先知、向望其救贖本國云云。可見其信德之淺、望德之浮。主責之曰、爾實狂人、實愈心人。言雖嚴厲、二徒不怨亦不言。可見吾主意氣之間、顯忠愛之心也。凡人有過、每苦於不自知耳。有人譴責、則省悟之下、每易悔改。若過而至於久習、則其改殊難。比之樹焉、其根稚而淺、固易拔易移。既堅而深、卽搖撼尙難。況欲拔而移之哉。我有長上在前、有過卽將箴警、不致習久根深、豈非幸事。縱使言詞嚴肅、亦惟欲我

知過之重，知事之危耳。當務者，須效法主徒之默默無辭，善受人言，存謙虛受教之心，庶幾易於遷改。今我謝主聖召，與聖召中所得諸恩，求主寵佑，賜我善用之，而日進於德。

第二段 吾主訓迪二徒 大抵欲責善於人，必當訓迪之，使能自知其過。吾主創立己國於謙卑苛刻之中，以符先知預言曰：「詎勿須基利斯督先受難，後入其上國。」路加二十四篇然則引入天國，獲享真榮之正路，而合先知預言，及吾主所明示者，惟有十字架之路。我豈更明於吾主，而知有別道之可通天域乎？我豈更勝於吾主，而能不由苦路以入天國乎？是狂悖也，是癡夢也。痛已錯謬，求主賜明此理，深慚至今畏受艱難。宜按神師之允准，將復行我刻苦補贖之工。

第三端 主爲二徒解經 卽舉梅瑟及先知聖人預發之論，凡攸指

主行，咸爲釋明。同上。吾主本能以一線之光，開徒神目，燦熱其心。何必爲之諄諄詳語，講解先知經典乎。其所以爲此者，蓋欲示人恒誦聖書，細心體味，以得天主之寵光，以涵養其心靈也。我因怠於誦閱善書，或閱之不知玩索其味。於是靈明幽昧，心志淡然。而於神修精蘊，不見有進境。撫躬深省，勉力改之。此於德行之途，亦一要端。慎毋忽諸。今按特求之意，向誨人靡倦之耶穌，求賜寵佑。祝言

第十 一徒留主偕宿

瞻禮三

定像 想見吾主若欲前行，二徒留之。

特求 求主整潔吾心，能常爲主居。

第一端 主欲前行 時至村，主續步，若欲前行。路加二十四篇吾主本心，原欲爲二徒嘉客，賜以厚惠，使見已復活，爲復活之證。然欲已

徒先致殷勤、先切攀留、而後施惠以賞報。吾主欲降我靈、欲入我心、每亦如良朋好友、敦其情誼、賜以嘉惠。如經云、予乃與人偕居。喻經八篇然亦欲我先冀願之、尋覓之、勤懇懇請求之。故吾主有時如遠棄我、致我心時覺空虛寂寞、不得主偕在之怡悅者、因我愛情之冷、心意之淡使然也。當自認己非、而求主赦免、并祈主除整我心、爲其安居之所。

第二段 二徒留行 二徒聽主講解聖經、殊覺津津有味。及至停駐之村、卽懇主偕宿曰、主、請偕居茲。天暮矣、日幾垂。同上既留之以言、又留之以行。或立前以塞去路、或曳後以止前行、其挽留之情、甚行肫切。於是知欲求吾主居我心內、嘗其神慰、獲其寵賚、心當懇切求之。且有時當倍我熱心、增我敬主苦身之功以要之。又當恒心修德、

堅持善志，若二徒之強之者然。蓋天時已暮，日幾西沒，恐我立功修德之時，已無多矣。可屢誦曰：主，請偕居茲。

第三端 吾主允諾 二徒殷勤堅請，實愜主心。主果鑒其惓誠，與之入村。斯時二徒心中，萬分歡悅，款待吾主，千萬傾意。然猶未識斯嘉賓貴客，果爲何人也。倘其識之，更當何如敬愛乎？我領聖體時，留吾主於心，我已明識其尊貴。然何爲以整其居，何修以備我心？果能細心謹慎，滌潔身靈，感發我情，增修我德，盡如吾主之願乎？果能有活潑之信，深下之謙，熱中之愛，孺慕之望，無虧當然之職乎？領主前夕，清晨醒寤，卽以此念縈懷乎？默禱誦經之際，更能傾心熱衷，備主寵臨乎？向隱藏救世之天主，求賜允我所願。 祝言

第十一 二徒目明認主

瞻禮四

定像 想見吾主與二徒同坐，持餅剖析。
特求 求主賜我得共二徒當時之歡悅。

第一端 主開徒目 餐時，持餅祝福，剖析付彼，二徒方開目明認。路

加二十四篇解經諸士 概謂主持餅祝福時，卽成聖體，付於二徒。其儀形景象，與受難前夕建立聖體相似。時二徒忽覺心目豁然，卽明認吾主。可知領主最速之效，爲能光照人靈，使人認識天主，通徹救靈之事。迺我屢領主體，而心靈仍舊昏暗。於救靈修德之途，不見進境，其故何哉？因心無應有之情，或因稍存怠忽，未能善備，或因不知專心感謝，辜負厚恩。當念我於聖體內所受之恩，而虔誠頌謝，更省於領主時所犯之過，而立意改悛。

第二端 主隱聖容 二徒乍得認主，主卽隱容不見。身雖不失其顯

容撫慰之神益。而忽如交臂失之。心中能無耿耿。或問吾主何不吝二徒感恩敬拜。盡其素誠。而乃倏忽之間。隱容若是。按諸名師之論說。謂訓人於修仁行義。恩德施人之後。避人頌謝。毋求榮譽。亦示人於此涕泣之谷。有時主臨賜慰。愉悅心靈。然忽往忽來。不可久恃。我乃以人薄待我。爲憂。不以主離逝我。爲懼。是亦愚矣。後當輕視世幻。勿以褒貶挂心。虔心事主。勿因悚懣怠忽。而失神靈之歡忭。

第三端 二徒回京 吾主聖諭。及聖體神恩。變易二徒之心。則後迥異。頃者神靈矇昧。今則得信德之光。頃者心思憂鬱。今則有神慰之歡。知吾主真已復活。不勝欣欣情動。互相謂曰。適吾行際。聆彼談論。及解經言。吾心詎不灼熱。於是卽起回京。同上試問二徒回京。爲何如是匆忙。非因急欲報主復活於諸徒。并補前時不信之非乎。念此

二徒之奇遇，有裨我躬修之神訓。一、當於默禱之時，求主以親密之訓，啟迪我心。二、領主之時，增我飢渴之願，益我熱愛之心。三、或事有差慝，急行悔改，不憚辛勞。問我自昔迄今，果如是乎。謝主於默想領主時，所賜諸恩，求主常爲我愚之明，我弱之強，我憂之慰。祝言

第十二 耶穌顯現諸徒

瞻禮五

定像 想見吾主現立徒中，諸徒驚駭。

特求 求主賜我神樂，倍切我欽崇愛慕之情。

第一端 主立徒中 復活後七日之首日，天暮。宗徒因懼主仇，同聚一室，門戶扃閉。適談論吾主如何析餅時，顯現二徒。時耶穌倏立徒中，曰：平安於爾等。是子，爾輩勿懼。路加二十四篇，若望二十篇是知吾主顯現諸徒，適在伊等以仁愛聯合，共相和好，同聚一室，避囂處。

靜、畏懼主仇、切願見主、談論主事之時。從可知我欲與主往來交好、亦有當行之事。一、與昆弟平和、善與人同、切勿獨行違眾。二、習於沉靜、思念天主。三、屢念誦句、請主臨格。四、喜論天主事。五、防禦惡讐、緊閉五官之門戶。事凡阻我與主契合者、卽思迸絕之。且於行事間、恒戒慎乎放心。

第二端 主慰徒心 主見徒心混淆惶擾、意視爲神、謂之曰、何紛何猜、可將予手予足、摸而視之。爾目明覩予身、有肉有骨、神則俱無。言畢、且露手足。路加同上聖若望紀曰、諸徒見主甚忻、同上全消惶怖之心、惟有和愉之樂。從可知吾主慰問信靈、善神敢迪人心、自有可憑之據。如心志平和、諸司安靜、隱覺天主在監、不禁神情怡悅、全心卸脫世物、惟求繫屬於主、是也。向善之靈、得主顧問、而嘗斯神味、誠

幸福哉。因念聖多默更比曰：吾主來乎。蓋爾不在，無一日一時之可樂，因爾爲我之歡娛焉。師主篇三卷二十一章務於日中，想見吾主示我五傷，令我瞻視。

第三端 主食徒前 按路加聖史紀云：徒猶未信，但驚喜交集。主謂之曰：汝其有食乎？徒獻炮魚一分，蜜窩一方，主食彼前。餘餽分與之。同上至哉主仁，大哉主愛，飲食之事，原不合於復活之身。然吾主不嫌屈抑，索食物，食於徒前，使彼深信己真復活。因斯復活之理，實爲聖教憑依，而諸徒將傳之於天下者焉。余靈師法吾主之表，凡事能有益於他人，有利於昆季者，雖謙卑煩雜，本性所難，亦可行之弗辭。且見人居憂患之中，或自處艱虞之境，弗忘以復活之理，堅心勵志。俾望身後福樂，而奮力前修，慶賀宗徒之福。求主增我信德。祝言

第十三 吾主三祝平安 瞻禮六

定像 想見吾主立於徒中，祝彼平安。

特求 求主賜我與主與人與己，皆得和睦，常享平安。

第一端 與主平安 平安於爾等。路加二十四篇此吾主現於諸徒時，首出之言。夫靈之平、心之安，乃人生最大最真之福。故於復活後第一主日聖經一篇之中，三致意焉。其所以三祝平安者，因我當有三等之平安，卽與主平安、與人平安、與己平安。是也。與主平安者，卽我與天主心意之間，毫無異致。凡天主之規誡教令，師長之訓諭，本身之職分，既識爲天主之聖意，卽謹慎奉行。是卽與天主相和，而得平安。且常思明徹主旨，翕合主心，眞福人也。求主賜我時防諸過，不失其平安，并精進於德，常享其平安。

第二端 與人平安 人既與主平和，又當與人平和。人在主前，皆爲兒女，故我與人皆爲昆仲姊妹。自當一心一德，無詐無虞。而與同行仁愛，同事救靈者，爲尤甚。吾主受難前，諭徒彼此相愛，今又祝以平和者，因徒等皆有牧民之職，宜引羣羊咸歸一棧，訓人信望愛之德，咸遵一律也。倘有心思乖舛，意見不同，卽大不合於主徒之分。無論人家與堂宇，公所與修院，能修斯愛，能享斯平，其福大矣。然其福非易得，必須謹行二事。一、含忍人過。二、無致人煩悶。如此，則福將自至。問我平日言行，果何若耶。在修道者，每有世間難得之平，尤當感激主恩。言語中，戒傷和氣。方寸間，貴有和衷。求主賜同人輯睦，天下和平。

第三端 與己平安 除與主與人平和外，猶有一己之平安。卽心志

安和、俯仰無愧。五官隨靈性之主裁、肉情隨良心之指示、三司服信德之導引。人在世間、私欲偏情、每欲奪靈性之主張、拒天主之聖意。而欲得此心之平和、殊覺爲難。必也具堅強之力、蓄果銳之氣。遏其物欲、禁其肉情、然後可以有濟。輕世金書曰、人不節欲、奚得寧哉。傲妬貪吝、竟罔平也。神貧謙士、時享寧輯。一卷六章此其明證也。當思何物搖撼我心、定志除去之。向調變兩間之耶穌聖心、求賜我內外之太平。祝言

第十四

耶穌發遣諸徒

瞻禮七

定像 想見吾主立於徒中、授以神權。

特求 求主賜我寵照、能明識主所賜之恩、而善用之。

第一端 耶穌遣發聖徒 耶穌再祝宗徒平安後、謂之曰、聖父遣予、

予亦然遣爾。若望二十篇卽言行事之間，同斯意向，如光榮天主，拯救萬民，是也。且同斯行法，如祈求講教，不避苦難，是也。我父爲我預備之國，我亦爲爾預備，欲爾且飲且食於我天國之筵。坐在高位，審判義撒爾爾十二支。路加二十二篇榮哉，主之寵命也。諸聖徒匡襄其救世之功，爲其遣使於人間，幸何如乎。故修道者，得主聖召，有榮主救靈之志，無論何往，如受吾主簡命，步宗徒後塵，自當振拔己心，勉盡其職。而奉教者，亦當感主信德之恩，恪遵傳教者之訓誨。因此皆自宗徒傳授者也。務遵保祿宗徒之訓，曰：倘爾偕耶穌復活，當求天上事，當知天上味。致哥羅森人書三篇

第二段 耶穌嘯與聖神 主遣宗徒奉行之事，出乎人力之上，非超性之佑，不足爲功。於是嘯之曰：領受聖神。同上因此神異之嘯，吾主

付宗徒以天主聖神。斯聖神卽在吾主，亦發於吾主，一如其發於天主聖父。宗徒領此聖神，乃能死於世俗之心思，而活於天主之心思。卽所謂克己謙遜，苦刻甘貧，仁愛諸德也。問爾心思奚似，保祿宗徒又曰：凡隨天主之神者，乃爲天主子。致羅瑪人書八篇亦爲吾主之友與弟。余靈當力圖在此數中，而恒存吾主之神。

第三端 耶穌授赦罪權 吾主旣付其聖神於宗徒，又謂之曰：爾赦人罪，則赦留，則留。若望同上吾主於斯，卽定告解聖事。付宗徒赦罪之權。且因宗徒傳授，亦付此權於後世司鐸。其循規遵律，承奉主使者，皆得有此奇特之權。凡人領洗後，所犯諸罪，無論如何衆多，如何重大，悉歸斯權掌握。噫，吾主之仁慈度量，真大矣哉。試思人性劣弱，最易顛墜。若無此聖事，靈魂一陷於罪，將奈何。是以聖教會，稱之爲

濟溺之桴也。余靈爾感恩之情，能符斯恩之洪大乎。果隨時記憶主恩，而奉謝之乎。抑視此聖事爲重任，而憎厭之，忽其規矩，而冒瀆之乎。愧悔已非，謝主赦罪，賜寵之恩。祝言

第十五 聖若瑟大主保

耶穌復活後第三主日

定像 想見吾主謂我曰，往赴若瑟！
特求 求主賜我熱心倚賴聖人，恒能受其庇蔭。

第一端 聖教會總主保 設有一國，當存亡危急之秋，太子母后播遷失所。若有一個臣親承顧命，孤忠護國，歷數十年艱難，卒能使冢君得所，國母安全。是臣也，功成而受上賞，其顯耀可不言而喻。然則聖教會，一天國也。吾主爲天地大君，聖母爲萬世母皇，而聖若瑟屏藩捍衛之，其功實爲最大，而其在主前之恩榮權位，不從可想見乎。

溯吾主降生以前，有古聖若瑟在厄日多國，善治荒政，國人咸沐其恩。今耶穌爲聖教會中，千萬年之神糧。推究其始，深賴聖人願復提攜之力。而我靈魂上之荒政，亦自聖人治之。則凡我信民，安得不歌功頌德，奉爲主保而賴其轉達乎。按教宗依諾增爵第九位於一千六百七十九年，定聖若瑟主保瞻禮，嗣於一千八百七十一年，比護第九位，奉聖人爲聖教會主保。我爲聖教子民，謝主因聖人轉達所賜諸恩，求聖人保護教會，當與祭領主時，勿忘此意。

第二端 中國大主保 我中國於若瑟聖人，有何所欲。曰：未奉教者，開其心，明其目，使反邪歸正。昔厄日多國，素爲主民之仇，崇尚異端，而耶穌入其境，魔像多爲之傾頽。以後聖賢繼起，隱迹精修者，累千盈萬。當思攜主至厄日多國者，聖若瑟也。伴主居厄日多者，亦聖若

瑟也。則欲望中國聖教廣揚，異端消滅，亦須求聖人爲主保，代爲轉祈。念我中國人民，多入迷途，如居幽谷，亟須照以眞光。聖西默盎見主而讚曰：其來如光，因照異教人兮。其光何來，聖若瑟攜來也。卽求聖若瑟憐視中國，一如當年之厄日多國。

第三端 善終主保 聖衣會修女依撒伯爾將死，見四天神分立牀隅，調弄清音，咏依撒義亞經言曰：諸義人善望。三篇夫修女臨終，尙有如此之福。則聖若瑟終時，更不知幾許天神，歡歌頌賀。想其見吾主與聖母侍奉左右，心靈如何欣慰。旣而與聖母話別，以靈魂託付耶穌，如何神樂。後吾主謂之曰：父，吾暨吾聖父之平安與爾偕。出離此世，往靈薄作我先驅。於是聖人瞑目謝世。我不能望聖人如是之福，必須求其於我終時，鎮抑邪魔，庶能安渡此津。昔有人死後現其

友曰：予本難逃地獄，因在世時，素敬聖若瑟，賴其轉達，得主矜憐，以免永苦。我當思何修以效法，不愧爲其門下。祝言

第十六

憂愁喜樂殊途

瞻禮二 此係上主日聖經之義

定像 想見吾主謂徒曰：汝將涕泣憂愁，世將喜樂。
特求 求主賜我輕視世福，樂受世艱。

第一端 俗人喜樂 吾主受難前夕，將去世歸天，謂徒曰：俄時弗得見予，俄時復得見予。予將詣予父故，汝將涕泣憂愁，世將喜樂。若望十六篇是吾主將死時，分人產業也。與善人以十字苦難，與世俗人，卽聖經所稱今世子者，以眼前之財貨歡愉。何則？天主至仁至義，欲以世苦煉善人小過，增益其功。而以世福報世人本性之善事。故俗人雖似有福，而功名利祿，羈絆其心，患得患失，絕無一日之安。以無

厭之貪心，求瞬息之僞樂，何福之有。故修德者勿羨人享世福，勿怨己走苦路。若自謂在世爲正人，享正福，亦可救靈敬主。則知其進德之心已冷，聖召之恩，亦將失矣。求主堅我聖召，深我輕世之心。

第二段

主徒憂愁

吾主以貧乏困阨諸艱，分與己徒，爲彼世業。世

人觀之，若不堪其苦。因不知苦中有真樂，十字架上有奧蘊之瑪納，瑪納爲愛主而嘗苦辛者，有無窮之神味也。保祿宗徒曰：我於困苦中，歡忻充溢。致哥林多人後書七篇聖奧斯定嚴行補贖，人見而憐之。聖

人曰：爾見我涕泣墮淚，不知其中甘味，更飴於日前世俗之樂也。故主所謂涕泣憂愁者，從世人之稱，以別於世俗之樂，犯罪之快，非真憂愁也。保祿宗徒曰：有世俗之憂愁，有天主之憂愁。同上天主之憂愁，名爲憂愁，實含天上之味，致人神樂。俗人則不得而嘗之。故又曰：

吾儕似爲憂愁，而時覺忻樂也。同上六篇謝主聖召之恩，爲諸福樂之緣，願爲主甘受一切艱難。

第三端 身後殊途 爾曹今痛，乃予復來見爾，是時爾心忻喜。爾心

之樂，無人能奪於爾。

若望

十六篇

此主日聖經末語，蓋訓善人卽聖

經所稱天主子者，爲主暫受貧窮憂苦，後有天堂永福，長生真樂。所謂涕泣者，乃真福，爲其將得安慰也。今世子之後報，則異是。今日之悅樂，將變爲悲傷哭泣，及地獄之刑。經曰：憐爾嬉笑者，因將涕泣。路加六篇是固不易之論。噫，今得瞬息之歡，將受永遠之苦。今忍暫時之苦，將享無窮之樂。何先後之不同，永暫之迥異若此乎。求主賜我於今甘受苦辛，將來獲享長生之歡樂。祝言

第十七 多默不信耶穌復活

瞻禮三

定像 想見多默不與眾人共處，獨行其好。

特求 求主賜我謙遜之德，無妄恃己意。

第一段 多默離眾 吾主復活本日，現於宗徒，賜以歡忻神慰，充滿彼心。獨多默不在，不得其福。經曰：耶穌來時，多默十二徒中之一，別名弟弟末者不在室。若望二十篇人喜離羣索處，無故不與人同行功課，每不得天主之恩，而罹陷溺之危。如修道者無真正緣故，不與人同刻起身，同時默想，同行省察，同誦經文，同堂閒散，每失其間主寵。因其行己所欲，而不行主所欲之時之地也。求主賜我常以此理，深入我心，善守公規，謹避特異之行。

第二段 多默不信 多默既遠離於眾，不得見主，又墮於不信之罪。雖諸宗徒及諸聖女，忠告善道，聖母亦丁寧訓誨，胥言吾主實已復

活，已現於眾，眾皆見其容，聞其語，撫摩其手足等。而多默竟堅執不聽，不信吾主復活。蓋人犯罪，每不孤立，而以類至。既犯其一，再犯其二，又犯其三，纍纍相增。後惡之重，每更甚於前犯。試問爾於往時之歲月，未嘗親試其事乎？慎毋復蹈前轍，再陷於罪。如不幸而失足，求主竦動爾心，速即興起，不至愈流愈下。自今以後，務當免陷於執一之偏。

第三端 多默傲慢 吝嗇陷茹答於罪惡之尤，驕傲引多默於固執之愆。蓋其視己明哲，勝於同人，視人識淺，好異矜奇。執一己之見，違眾人之信，且妄言曰：我目非見其手釘之迹，我指非入其釘穴，我手非探其肋孔，必不信。若望二十篇一若欲與吾主訂約，欲渠信復活之真，必如此而後可。噫嘻，多默之言行若是，其不遭主怒者，亦幸而

免耳。試思多默三年受主訓誨，尙不免過於執持己意。則我於行事言語間，當如何謹慎謙虛哉。我亦言行驕滿，應受其福，而主仍至今宥我，我當如何感激。嗣後與人談論，除信望愛諸德有關者，定志弗逆他人。求主賜我心謙言遜，不敢自恃。祝言

第十八 耶穌顯現於多默

瞻禮四

定像 想見宗徒共聚一室，吾主立於其中。

特求 求主賜我聖寵，認識己罪，而速卽改遷。

第一端 主助多默離罪 主復活後第一主日，宗徒同聚一室，如八

日前，多默偕在。經曰：八日後宗徒仍聚一室，多默俱。若望二十篇斯多默之與他徒俱在，實爲主意所注。聖史誌之，有深旨焉。蓋主欲乘機挽回多默之不信，覓斯亡羊，歸之己棧。噫，大哉主仁，人旣獲罪，主

不但不棄、且先行尋覓之。以多默之倔強、主若置之不顧、將伊於胡底耶。先後八日、不信吾主復活、豈不愛其終於不信、而永害其靈哉。此次多默與他徒共聚、未始非吾主啟迪之也。夫吾之陷於罪惡、恐亦多有時日。乃不死於罪中、而得驚醒回頭、脫免主罰。非主之眷顧、誰之恩歟。讚美天主仁慈、與日肋米亞並誦曰、謝天主免我烈焚。

第二端 主助多默補過 主在眾人前現於多默、亦有深意。蓋欲多默於眾前、謙卑痛悔、補前日之罪、慰同伴之心。故既欲其認過、又欲其悔改之誠、昭於眾目。經曰、天主之工、至爲完善、而其慈憫之工、尤爲無缺、卽於多默宗徒、亦可想見矣。倘爾言行有所獲罪、致人心戚、速宜乘機補贖。庶幾眾人見我前日之過者、亦見我今日痛悔之誠。將曰、昔偶錯誤、今已改悛、是可無傷。我今痛悔前愆、慎於言語中勿

傷規格，勿煩數同儕。

第三端 主護多默聲名 室戶亦閉，耶穌進立其中。若望同上經紀。吾主此次閉門而現於徒者，不但顯其復活之奇，亦遺我人一大聖訓。凡人之過，我不應知者，亦不應洩之。卽於知者之前，亦不宜顯責。多默之罪，惟諸徒知之，吾主亦惟於諸徒前糾繩之。我於此公義愛人之規，曾如何遵守乎。恐有誨人之職，而能箴人之過者，反不之訴。而於不應知之人，反託友誼之名，而之以相告，此豈吾主之心哉。聖賢於斯，甚爲戒慎。傳記聖依納爵以一修士之不善，商之二鐸，當如何處置，後卽深自追悔。因質之一鐸，亦已足也。今當合前端之情意，誠求吾主，祝言

第十九 多默回心認主 瞻禮五

定像 想見多默跪主足下、愧悔已罪。

特求 求主賜我聖寵、能覺當日多默所有之情。

第一段 主喚多默撫傷 多默忽見吾主立於目前、自知獲罪已多、不勝驚恐。蓋主明言死後將復活、今不信其復活、卽不信其言語之真也。且嘗云、非見其手釘迹、非我指入釘穴、非我手探肋孔、必不信。若望二十篇是苛求於主、強主就已也。愈形其傲慢於前、愈懼主義怒於後。然而吾主何如哉。仍以至仁至善、俯順其情、惟以一語稍懲其失。謂多默曰、親指入斯穴、親視予手、親手探予肋孔、勿爲不信輩、可爲忠徒。同上可見主欲救人靈、得人心、每降心以從人願、其仁慈固如此也。當思主平日之待爾、當初之召爾、隨爾性格、順爾氣質、逞爾心志、漸漸引爾入德。其於爾之聖恩寵愛、尤爲何如也。驚奇愛慕

之餘、將爾身心全獻於主。

第二端 多默信認吾主 吾主聖身之光明、固已耀多默之心目、而言語之溫良、尤足使其入於耳、而感於心。故霎時間、多默梗戾之心、悉爲鎔化。卽呼曰、我真主、我天主。言雖簡而義甚宏、蓋明認吾主之人性與天主性、而內含恭敬、愧悔、謙下、切望、熱愛、忠懇、諸情。吾主鑒其真誠、悅其情意、因斯二語、卽赦其罪愆、而忘其舊惡。於此可知祈求之神效、不在煩言巧語、惟在心善意誠。亦可知吾主之溫良、其俯聽人求、赦宥人罪、迅捷如斯。夫吾之不獲所求、神靈匱乏者、無乃我信望愛諸德之有所不周乎。當深我恃主之情、同多默向主曰、我真主、我天主。務於隨時隨地、深我恃怙之心。

第三端 吾主勗人信德 多默旣認吾主、證其信心。主謂之曰、多默

以見我信我。乃有不見而信。斯果真福人。同上此吾主明示人信德之功勞。與其賞報。不係事迹之顯晦。耳目之聞見。而在明司之謙抑。誠服主言之真實。主所稱揚之信。乃天主聖寵之效。超性之恩。吾當求主堅我信德。且增我信德。偕宗徒同禱曰。主。增益我信。路加十七篇迺我自幼迄今。信德柔弱。且荒於救靈之業。聖德之功者。非因我不求信德之堅。信德之增乎。當讚美稱頌主仁。求主賜我活潑之信德。祝言

第二十 耶穌現於海濱

瞻禮六

定像 想見伯多祿等七位宗徒。在舟張網。不獲一魚。
特求 求主賜我聖寵。扶佑我諸凡行事。能立功於永世。不至徒勞。
第一端 諸徒往漁 聖若望記西滿伯多祿及多默別名第末及

納達納厄爾加理勒亞人。及則伯德阿二子。及他二徒。俱往西滿。伯多祿曰。予欲往漁。僉曰偕往。卽出下舟。二十一篇觀諸徒之行事同心。甚爲可奇可愛。伯多祿一人有意往漁。告之同儕。彼卽登舟偕往。何其和也。因念公堂修院中。人能捨己所好。凡主命與規矩所不禁者。隨他人意見。順他人願欲。殊足動人鑒賞。實爲愛德之助。亦卽愛德之徵。余靈爾之言行。能如是乎。抑好惡拂人之性。執持己見。故與人違乎。且言語間。無端口角。致傷仁愛乎。保祿宗徒曰。吾於眾人。卽爲眾人。致哥林多人前書九篇言舍己從人。與眾合和交好。無有不

同也。當思於諸事。專務克己之工。與人時能和協。

第二段 竟夜無魚 徒等終夜勤勞。無魚入網。天主上智意中。別有深旨。吾主未至時。徒勞無益。既現後。一網卽得多魚。示人無主聖寵。

則辛勞皆係空虛。蒙主神恩，則心身自多裨益。嘗有救靈及修德之人，受多難多苦，而靈魂毫無實益，或身後少見其功。問斯人爲誰，曰：有重罪於靈，失主聖寵之人。若是者，奉教人中不止百千萬億。卽有主寵於靈，行善工，作善事，而心不善，意不誠者，主前亦不得有功。或有所得，寡且微耳。謝主召我在斯地位，易存主寵，易契主心。求主賜我日增聖愛，行事常思救靈榮主。

第三端 主現海濱 次早，耶穌忽現立岸，惟徒弗識。耶穌謂之曰：小子，或有助飯味。答曰：無。若望同上徒等終夜無獲，腹飢力軟，吾主憐之，施行奇跡，濟其困乏。吾主旣自願之，然猶問其有無食味，使其親口認己貧餒。何哉？欲醒其望，主救助之心也。天主每欲人謙卑自賤，認其困窘，訴其愁苦，預備受主恩寵。吾之所以鮮得主恩者，或於謙

卑訴苦之情，尚有所缺。自省之餘，當知因我罪過，愈無望於主，愈當賴主仁慈，求主憐憫。且愈當存必獲之心，而堅望於主。護守天神，每以默啟，免我陷落，佑我興起，正我心志，挈我進修，可向之誠求。祝言

第廿一 一網多魚之異跡

瞻禮七

定像 想見吾主立海濱，徒等在舟張網。

特求 求主賜我聽命之全，心靈之清，愛德之熱。

第一端 徒等聽命之賞 吾主既使徒等謙認己困，以備領受主恩。

語之曰，張網舟右，卽得。伊等如命，魚爭入，徒力不足起網。若望二十

一篇時徒猶未識主，惟於詞氣間，視爲尊長。故聞張網舟右之語，卽從而行之。可想徒等之聽命，敏速而如瞽。此魚出入意外之多，蓋賞

其聽命之功也。凡我行爲，主前欲有功效，必須善行聽命。而於代天主位者，常存信愛之德。效法宗徒不問難，不置辨。旣聞其命，行之迅速，從之如響。忠勤誠樸，憑依主言。經曰：信者罔弗克。瑪爾谷九篇又曰：聽命之人，將言得勝。喻經二十一篇問我如何守規循職，如何遵行長命。求主賜我能超卓於順命之德。每承長命，不究命令之緣由。

第二端 愛徒心清之報。斯漁之異，實令徒等速卽認主。然惟若望得先見之明，語伯多祿曰：是主。欲知若望之目，何從明於眾人。聖日羅尼莫曰：爲其童貞也。惟童貞之弟，識童貞之師。因其身心清潔，故愈樂主心，親主愈密，而主言愈驗。曰：心淨者乃眞福，爲其將見天主也。我每憾神魂昏昧，心志枯樵，而寵光之照人靈，樂人心，堅信德，增聖愛者，不見多得。究其故，恐不加修心清之德耳。或因怠於沉靜克

己之工時有小過耳。斯過雖微，已足玷污心身，而矇靈性之目。可借達未聖王曰：天主重化我心潔清，再求多洗予逆行。定志專務修潔心靈。

第三端 徒等愛德之熱 伯多祿聞是主披裳下水。同上蓋伯多祿熱心愛主，急欲往前，以爲棹舟而去，太覺遲緩。且因愛情之熱，不暇計蹈海之危。於是躍入水中，心之所願，惟急赴主前，而萬事不覺爲難。觀伯多祿之所行，實有愛德奇妙之情。聖多默更比曰：愛由天主而生，不得不舉於萬有之上，而安息於主也。愛主者奮飛焉，奔馳焉，喜悅焉，自由而不受束縛焉。愛德每不知限，而其炎熱也，超乎諸限之上，不覺重負，不計苦勞。其所願者過乎其所能，蓋以諸事爲可行而無難。師主編三卷五章問：我能有斯愛乎？按特求之意，求主賜我。

諸德。祝言

第廿一 吾主許遣聖神 耶穌復活後第四主日

定像 想見吾主與宗徒談論遣發聖神之事。

特求 求主賜我愛主之純心。

第一端 主心純愛 耶穌謂徒曰：予誠語爾，爲爾宜往。若望十六篇

此見吾主愛人之心，純一不雜。身將升天，不念己之榮福，惟思人之利益。試思吾主自生於馬槽，至死於十字架，無日不以愛人爲事。在馬槽中呱呱啼泣，非哭己苦，實哭人罪。將死，有婦女哀之。主乃謂之曰：勿哭予，當哭爾。噫，主何愛人若此乎？余靈爾之愛主，多雜自愛之心，較主愛爾之情，自覺不得爲愛矣。卽有時奮發勇敢，免犯罪過，或強修德行，豈非概存畏罰冀賞之心而然乎？當深謙遜慚愧之情，願

於愛主之德，更將登進而勤勉之。

第二段 主許聖神 倘予弗往，聖神弗降。往，則遣彼來。同上主不升天，何以宗徒不能得聖神之恩。解經者言有多故，一爲宗徒愛主之情，太繫於主之人性。聖奧斯定論之尤詳，謂宗徒愛主，限於五官，太屬本性，其愛德有不得純全之憾。蓋吾主人性，爲愛情有形之準的。若不去之，不可得聖神之充滿，不得爲精於修業之神人。余靈念之哉。倘吾主之形性，與宗徒偕居，爲其寵滿聖神之阻，則爾之多戀世物，而不忍捨，或捨之而心愛者，果何爲哉。又爾之柔情密意，友愛斯人，又何爲哉。斯情斯愛，每根於本性，緣於五官，繫於嗜欲，離於規格，損於心靈，多偏私之投合，廢珍寶之光陰，亂心志之和好者也。且觀人性之偏向於惡，豈不當常憂本性之情，或生於五官之嗜，而易染

於罪過乎。問爾生平閱歷，可知斯言之有自，而亟宜戒慎矣。以爾情之不由於理，不合於主者，置主聖愛臺前，定志屢屢回視爾心情之動。

第二段 聖神之工 彼來時，責世以罪以義以判，教爾各等誠實。同上聖神之在人靈，其效有二。一、聖神爲聖德之神，責人罪惡，雖細微之愆，不容累及。責人義德功行，日求精進，萬事各得其宜。責人臆判公平，心思正直，不致誤於分歧。二、聖神爲光照之神，訓人超性之奧理，聖經包含之妙義，修身事主之中，德意日新，玩索不盡。此聖神之工，爾曾覺之否乎？其有所教，曾能受之否乎？否則知爾未精於內修，而於聖神寵佑，未能善用。將受斯德望之責言曰：堅頑者，爾常抗逆聖神也。今當深心痛悔，求主憐憫。 祝言

第廿二 炭火上餅魚之異蹟

瞻禮二

定像 想見七位宗徒自主手中接食饅頭。

特求 求主賜我聖寵，使領聖體時，備諸聖德，克盡虔誠。

第一端 吾主賜食登岸，見炭火上有魚一尾，併有饅首。耶穌語之

曰：出今獲者魚。若望二十一篇方宗徒終夜勤勞，腹飢力乏，欲取火

煮食，尚須時刻，而主已行聖蹟，備其急需。且欲其知所獲之多，增其

歡悅，令出所得之魚。後又呼之曰：來食。同上可知吾主心周情細，無

微不至。吾主今日之待人，亦無不如是。既以己全能上智，使人所種

植者，獲利多倍。而因人培植之勞，任其得意歡欣，一若自食其力。凡

人修德行善，其超性之功，皆主聖寵之力。然主賞報吾人，亦視人勤

勉之多寡。一若欲人自慶己功，自喜己德。實則如聖奧斯定曰：天主

賞報其自賜之恩也。宜效法保祿宗徒之言曰：我之爲我，賴主聖寵而已。致哥林多人前書十五篇感主洪量，隨時憶念主之寬仁。

第二段 主現之奇 此次主現於七徒，有特異之奇。經曰：席間無敢問爾爲誰，蓋俱知爲主。若望同上可知吾主顯現之時，宗徒所目見者，有異於平日之景象，所見者似非吾主，而心知其實爲吾主。何以知之？曰：外有聖跡之奇，內有聖寵之光也。此等奇異，於聖體聖事中時有之。視之不見吾主，有麵酒形蒙翳我目。而信德之光，照耀我明，聖寵之味，涵養我靈，得知吾主實在麵酒形內。可效當日之宗徒，深我恭敬愛慕之心，屢發信德，認麵酒形內，隱藏吾主全體，而於聖體前，證我信心。

第三端 吾主析餅 耶穌親執饅首付彼，併分魚。同上此尤見吾主

待宗徒之慈惠，出人意想。徒等既見一網之魚，多至一百五十三頭，又見炭火上餅魚，適充枵腹，乃更爲之析餅分魚。斯時心中歡樂，尙可言罄耶。夫宗徒與主同席而食，卽吾人日後宴於天堂之像。主嘗謂徒曰：我今在爾中，如爲僕役。爾與我歷受多艱，我父爲我預備之國。我今亦爲爾經營，欲爾且飲且食我天國之筵。坐高座，審判義撒厄爾十二支。路加二十二篇斯天國之賞，雖爲宗徒言之，而吾人亦在其中。思主洪恩異賞，能不寬廣我心，而樂於事主乎。謝主獎勵之宏，倍我忠誠，獻我身心。 祝言

第廿四 主三問伯多祿 瞻禮三

定像 想見吾主謂伯多祿曰：爾愛予甚於斯人否。
特求 求主賜我聖寵，得優於愛主之德。

第一端 伯多祿之愛 吾主初召伯多祿之時，謂之曰：從子，予使漁人。瑪竇四篇猶言使爾化人，引入吾教。今在地白利亞海濱，一網多魚之異，蓋其先徵也。此次漁事，聖人之勞爲最多，則化人之業，亦可知聖人之功爲最盛。然聖人旣得爲宗徒之長，教皇之首，爵位旣如是尊重，斯愛德宜如何超卓乎？故聖若望記旣膳後，主一再謂之曰：西滿若納子，愛子甚於斯人否？對曰：主，爾知予愛爾也。主曰：牧子羔。二十一篇然則修道者，因主聖召之恩，似較世人爲尊，亦有漁人靈魂之職分。卽於天主及眾人前，亦宜有更大更真之愛德。倘主問爾曰：愛子甚於他人否？爾將何辭以對？今當熱我愛情，庶可謂主曰：主，知我愛爾，併望增益我愛。日內屢誦曰：盡甘耶穌聖心，賜我愛爾日深。

第二段 伯多祿之謙 耶穌三問曰：西滿若納子，愛予否？伯多祿曰：主，爾知全，爾知我愛爾。主曰：牧子羊。同上主以羔羊及母羊付之。卽以普世信民及斯民牧伯，託之而屬其權下，定爲聖教會可見之元首。使其一身及後世之繼位者，爲天下信民與諸民牧之長。然其答主此問，殊形謙退，不是受難前夕之自恃，惟言主識其愛主之誠而已。蓋自前日之陷落，深知本性之劣弱，因而謙以存心，不敢自信，一惟依賴主仁。余靈效之，庶可自禍取福。且聖人乘主問之機，三次顯然認己愛主，補前三番背主之差。可知我有過惡，深辱名位，亦當乘機滿補。求主扶佑，賜我愛主，能盡我分之所宜。

第三端 伯多祿之愛 伯多祿因耶穌三問曰：愛予否？愛之。同上夫以加理勒亞之漁父，被天主聖子陟於最高之位，宜其喜而不寐，今

聖史記其不免殷愛者，何故？曰：恐已愛情不能確實，或自以爲愛主，而於愛情內尙有所失。是以當主三次之間，而愛心忡忡也。福哉！信靈、福哉！修士、誠心愛主，併願超卓於愛主之情，而於救靈修德中，除愛主情疎之外，別無憂懼。今賀聖伯多祿之榮位。求主以其聖愛等情，熱我心靈。祝言

第廿五

呼徒從責徒問

瞻禮四

定像

想見吾主謂伯多祿曰：從予。

特求

求主賜我聖寵，隨從主命，忠於易事，庶亦能勝其難事。

第一端

告伯多祿來事

伯多祿雖顯然明認愛主，然未免心愛。誠

恐再逢艱險，不知能免如前之陷落，而持守至終否也。吾主欲慰其心，堅固其志，告以異日能忠誠剛毅，而恒其德貞。曰：我誠語爾，爾年

既老，將伸爾手，人引爾於不欲往之所。聖史解之曰：主言此，示其將如何受死，以顯主榮。若望二十一篇卽將致命於十字架，以證其愛主之忠。是故我於主所賜之十字架，當習視爲主愛我之憑，亦爲我還愛之機。至於尊榮高位，修道者未嘗求之，惟有時勉強受之。受之者實爲艱辛之職任，致命之十字架，以報主聖愛，顯主光榮耳。問爾平時意見，果如斯乎？認己愛主，不敢自恃，求主寵佑，能證我愛於艱苦之中。

第二端 呼伯多祿隨從 吾主既告伯多祿將堅忠至死，先行數步，而謂之曰：從予。同上既預示其被釘十字架，爲義致命，又出如此易行之命，何故？曰：訓吾人欲盡忠於大事，宜先篤信於細事。欲於造次間，行超特之祭獻，先於平素時習細微之苛刻。主嘗曰：忠於細行者，

乃忠於大德。路加十六篇斯理也。隨時可以徵之。凡謹小慎微。全守規範者。從未見其陷於大咎。況每見其於艱難誘惑中。忠貞毅勇。雖捨生致命不辭焉。夫此致命之恩。無人可以僥倖。乃爲忠於小德。與恒行克己者之賞報。欲爲信德致命。宜先爲規矩致命。故聖教讚致命聖人曰。諸聖人受幾多艱苦。使能穩得致命之榮。大日課對經旨哉言乎。鼓勵己心。步武善守修規之士。求主助之。

第三端 責伯多祿之問 伯多祿回顧。見耶穌攸愛徒。問耶穌曰。若斯者何。主曰。尙欲留之於世。待予復來。於汝何與。汝第從予。若望同上此訓吾儕勿干預他人之事。人之常情。每自荒己事。而好察旁人。且竊議他人之行。互論尊長之言。此等弊病。卽一堂一院之中。亦所不免。倘爾遇斯誘惑。可以主言自勉曰。於汝何與。汝非尊上。無治人

之責。日後主不審爾以他人言語。將判爾一身行事。爾惟從主。循規修德爲是。此退敵誘感之美法。爾當時時用之。且留心克夫喜見喜聞之癖。求主輔翼我勤於自治。祝言

第廿六 主現五百人眾 瞻禮五

定像 想見五百人眾。得吾主在其中。不勝欣悅。
特求 求主賜我能覺主與我偕。而得心靈之樂。

第一端 徒眾見主 瑪竇聖史記吾主升天前數日。十一宗徒往加理勒亞。至耶穌預示之山。二十八篇保祿宗徒曰。於此見主顯現者。共五百餘人。致哥林多人前書十五篇。惟此次吾主之顯現。其地其時。業已預告之。天神亦轉言之。故見主者多至五百餘人。想此眾人自主復活後。概未嘗見。今聞其顯現。凡意存本性者。無非欲覩復活

之人。而其中意志之尤美者，則欲顯己敬愛感恩於主而望主降福施寵於靈。假如今者，主將顯身於某時某地，吾知之，能不思親炙吾主，鼓舞前往乎？雖道阻且長，亦所不畏。然吾主日在吾人中，幽居堂內，而反不思往就之，斯真事之不可解者也。問爾拜主勤怠如何，并於拜主時，情志如何。尙其愧悔謙卑，熱心勤拜。

第二段 徒有懷疑 徒等見主，敬拜之，其間有人仍疑之。瑪竇同上疑者，疑主復活之非真也。蓋因信德不堅，愛情不熱，則惶惑冷淡，未免猜疑。較之信德活潑，愛情炎熾者，所得之神慰迥異。諒吾主聖心，亦深爲痛惜。試思修道之人，同居一院，其間固多善士。然每有劣信者，忘己重任，常懷疑慮，有於遵規守願，克己省身諸事，不能決意勇行。其可慨也，更爲何如。今懇切求主，賜我永不在其數中。務在吾主

之前、不敢少虧忠信。

第三端 徒受教戒 聖瑪爾谷紀吾主責徒不信之非。十六篇吾主責之者、非出於中心憤恨、實因憫其昏昧寡信、而規訓之也。徒中之不信者、疑主之死、緣於力弱、出於不得免、而不知其全能自可復活也。今吾主爲之發明聖經之旨、解釋先知之訓、言基利斯督先須受難、然後復活、而享其光榮。路加二十四篇則徒等亦無可疑矣。設我不得已而有責於人、終不宜著暴戾之形、顯情欲之偏。惟據愛德、盡本分以匡直之、規誨之、使人能知己過、急改所行。問我果曾如是乎。求主賜我行之於將來。 祝言

第廿七 遣徒往誨萬民 瞻禮六

定像 想見吾主謂徒曰、予已全受天地權、汝輩往誨萬民。瑪竇二

十八篇

特求 求主賜我聖寵，俾功行能符主召之尊高。

第一端 主受天地全權 吾主曰：予已全受天地權。此言之意甚廣，殊足令人想其人性之榮。一、主受天上權，統御天庭，爲天國之帝，天神之皇，隨心所欲，可賜人以天上寵錫，天上光榮。如昔所謂：予父經營之國，予亦經營也。路加二十二篇二、主受世上權，操人死生之柄，莫能抗違其意。其所保護者，合世人獄魔之力，不能毀其一髮。念吾主以己謙卑苦辱，得此權能榮福，固當竭誠致慶。而我得天主聖召，脫離世幻，能致身竭力，事奉至大之主，將來必得天主所許之無窮賞報。經曰：人爲我而捨其田宅，將獲百倍，而得長生。瑪竇十九篇如是，我亦可以自慶矣。發我倚主愛主之情，復獻善志聖願。當遇誘惑

畏蒞之時。可以保祿宗徒之言。自勵曰。我於堅強我者。無不能也。致

斐理賓人書四篇

第二段 遣徒往誨萬民 吾主告徒。已受天地全權。所以預備宗徒之心。使信已將諭之事。自可成功。其所命於宗徒者。卽分行天下。傳道四方。使普世人民。咸歸一教。共成一會。惟此教會。吾主於受難前。復活後。已屢言之。今立已徒爲斯教之基。普世之師。特謂之曰。汝輩往誨萬民。夫化民之大業。主不自行。而託付已徒。以本性論。徒固萬難勝任。然主竟託之者。訓爾尙爲人上。可不必諸事躬行。一若爾外。更無有能者。更訓爾凡奉長命。莫因己無能。而過於退卻。每見天主喜以菲陋之材。成大器。作大用。爾惟賴全能之扶佑。足矣。噫。主每佑人。人多忘卻。我當頌主仁愛。更謝主賜我生於教內。擢於修途。以助

拯世淑人之事。

第三端 洗因聖三之名 付聖水、因父及子及聖神之名者。同上此
吾主欲人信聖三之奧旨、領洗時、以聖三之名、得爲新教信人。亦欲
人稱聖三之名、伴以十字聖號、使人生前得攻勝仇讐之器具、洵可
謂退却誘惑之妙訣。處險遇危之衛護。信聖三之證、開天庫之鑰、記
諸恩之標、而最契聖父聖子聖神之心者、我願獲奇妙神恩、當虔恭
謹慎、作此聖號、誦此聖名。向天主聖三、求賜此恩 祝言

第廿八 底定聖教事宜

瞻禮七

定像 想見宗徒環立主前、聽其垂訓。

特求 求主賜我信德之堅、救靈之熱、使能勉效宗徒。

第一端 付宗徒正道 吾主欲以信德正道、連合普世萬民、使天下

萬世人同此信心，同此聖事，同此規誡，至世終成一教會，故升天前，將斯道預爲防閑，使其永不能錯。何以言之，曰：一、令諸徒教守諸端，如其所命。瑪竇二十八篇無增無減。二、許遣聖神，曰：誠實聖神既來，教爾各等誠實。若望十六篇三許伯多祿及繼位之教皇，凡於信德教化之事，永無誤謬。曰：西滿，予爲爾求，使爾信無缺。路加二十二篇吾主立教至今，千有九百年餘，世代迭更，盛衰變易，而教會獨於窘厄中兀然不動。且所訓當信之道，與所誨當修之德，亦毫無損益。故在此教者，可信爲至真至正，自勉忠信篤行，而望享榮福於天也。動情感激，尤願聖信廣傳，聖教廣揚。時以保祿宗徒之言自勸曰：善戰信德之戰，獲享主召爾享之永生。致弟莫德前書六篇

第二端 許信者長生 人信兼領聖洗，乃昇，不信者必墮。瑪爾谷十

六篇細味此言，未免一則以喜，一則以懼。喜者喜永生有路，使人得循路安行。懼者懼審判必嚴，不但異端與不信者不獲上升，卽第有死信，如聖雅各伯所謂信而無實行者，二篇亦將下墮。蓋主嘗曰：按各人功行，以定賞罰。瑪竇十六篇：吾人之信心，內省之下，不多便少，恐不免有所缺失。試問修道之分量，本身之職司，以及敬主之寅畏，誦禱之虔誠，清晨之善志，行事之誠意諸端，爾信果爲全活否？自度信德與功行之間，特於何事不符當自訟自承，自深愧悔。求主赦宥，速行整修。

第三端 賜能行奇跡 吾主許宗徒顯行靈跡之能，以證教道之真，堅信人之德。曰：信者倚予名，便行多奇，能驅惡神，能談異語，放蛇龍，飲鳩毒而不被其害，撫病人而立痊。瑪爾谷同上。凡此種種靈跡，厥

後悉皆徵驗，史籍可考焉。蓋聖教之始，多顯聖跡，使新歸化者信根易固。及其信德已深，卽輟其奇跡，以增人信德之功。我當讚美主之仁智，措施咸宜，以成其非常之事。兼謝主所賜信德之恩。 祝言

第廿九 祈主宜有倚望

耶穌復活後第五主日

定像 想見吾主謂徒曰，爾尙倚予名，求予父。予確云，予父卽諾。特求 求主賜我於祈禱時，常深倚望之情。

第一端 倚望緣於主 天主全能，必能允准我求。天主全知，必知我意願，聞我祈求。天主全善，其欲我善，必勝於我自欲善。且天主嘗曰，倚予名，求予父，予確云，予父卽諾。若望十六篇主旣如是仁慈，而祈主者心無倚望也，何故？蓋先存天主不允之見，或以己與天主相懸太甚，求之恐無益。或思主至公至義，己罪觸犯主怒，求之亦不足以

動主慈。如此諸意，雖非故蓄於心，然每於不知不覺時，潛滋暗長，而損其祈禱之誠，致蹈不恭之咎。豈不謬哉！蓋思主降生救贖，果何爲乎？彼倚望不切者，念主仁慈，亦可稍知自勉矣。求主堅我望德，自深怙主之情。

第二端 倚望緣於己 吾人依賴之心，固緣於主，然返身自問，尤不可無倚望之心。蓋天主本意，原欲救靈者守規誠，修道者臻全德。特是救靈修道，必須聖寵扶持。主嘗曰：無我聖寵，爾無所能爲。若望十五篇此固示我愈弱愈無能者，愈當祈求也。又曰：爾求，我將與爾。瑪寶七篇則我之本性劣弱，靈魂困苦，安知非天主增我倚望之一助乎。當深倚望之情，求主賜佑，憐我力量虛微，助我神靈柔弱，遇艱苦時，偕達未。聖王曰：予心困厄已加多，主救我於攸需。聖咏二十四篇

第三端 倚望緣於人 試由己而推之於人，凡我爲人祈求，另爲罪人祈求，有三念可增我倚望之情，而所求更易有驗。三念者，一、行甚悅主心之事。二、亦行我分中之事。三、更行愛人之事。若爲他人祈主，不思利己，惟求益人，則天主更易俯聽。且人而愈苦，我爲之求，愈可望感主慈心。爾見四方無數人靈，錮於心迷，流於罪污，經好善者費多少心力，望其遷改，不見挽回，爾卽視爲不可化之人。誦經祈禱時，不思爲之祈主，一任其居於幽冥，坐於死影。此豈愛德之行，吾主之心哉。今而後，亟宜愛人如己。按七祈求之意，向耶穌聖心，虔誠倚望，務得所求。 祝言

第三十 三天祈禱之禮 瞻禮二

定像 想見教眾隨從主教司鐸遊堂，恭行祈禱之禮。

特求 求主賜我善行祈禱、克遵聖教之意。

第一端 三天祈禱之由 天主降生後四百六十三年、聖瑪默爾爲

維恩納

今法蘭西城主教時、國步艱難、荒疫兵戈無寧歲。主教欲挽

上主義怒、矢願每年於所轄地、迎聖遊堂、公行祈禱禮、民衆樂從。於是耶穌升天瞻禮前三日、嚴守大齋、行迎聖盛禮、誦經祈禱、遊城外三聖堂以爲例。天主納斯祈禱、未幾民安患息、四鄰主教相仿行之、胥蒙大益。至降生後八百年相近、教宗良第三位、命普世舉行。惟因在復活瞻禮節候、寬免大齋、准定守小齋而已。此亦可見天主上智、如於偶然之事、漸引人於救靈敬主之功、以涵養人信德、增益人熱心。吾當稱頌主智、定將虔行斯禮。

第二端 三天祈禱之向 三日內行祈禱禮、欲得聖會之心思。須知

此祈禱之意向，不但求免目前諸患，兼求護身靈於諸害，賜神形之急需。更求降福田穀，以致年豐物阜。因此春夏之交，小熟將收，大熟將種，肉身餬口多所資賴焉。觀此聖教之心，孰不當奮志以求遂願乎。況修道者，在天主前爲世人之中保，更宜加倍熱心，以祈禱補贖苦刻諸工，求主霽威錫寵，寬宥人罪，憐恤斯民，馴伏聖教諸仇，生存田地百穀。遵聖教之意，自勉爲平息主怒，補贖人罪之犧牲。

第三端 欲得其向之法 聖教會定此三天祈禱，欲得其向，卽命以當行之事。如非有正故，而得免者，概守小齋，遊堂迎聖，公行祈禱，咏唱聖人列品禱文。在此公禱之中，聖教會以普世急需，諸人冀願，列陳於天主臺前。上自教宗皇帝，下至普世萬民，遠至已亡信友，近至兄弟親戚，無不爲之懇求。倘諸信人，能忠行教命，而以此聖教所定

之經、虔誠求主、何求不得。我中國信民、得教宗免守小齋、亦不便行迎聖之典。既蒙分外之恩、自當分外熱心、以補不行之禮。至少宜恪恭行此瞻禮、誦此禱文、與普世聖教會同心合意、求主恩賚。按目前之時事、選禱文中相稱之句語、向主虔求。祝言

第三十一 吾主末次顯現

瞻禮三

定像 想見十一徒用膳、吾主坐在其中。
特求 求主賜我得有宗徒當時之情意。

第一端 吾主特愛宗徒 瑪爾谷聖史記十一宗徒饗膳時、吾主末次顯現。十六篇吾主此次顯現、惟宗徒見之。是時茹答已死、瑪弟亞未補其位、故徒數惟十一。主昔將死、偕徒同餐。今將升天、亦與徒同席。一堂話別、語摯情深、如表朋友綢繆之契、如顯父子慈愛之情。所

以然者。一、因宗徒等爲聖父所與之人。主曰、父、爾所付予者、予護之。若望十七篇二、因宗徒等速應主召、棄諸事物以相從。主曰、爾曾離棄諸有、而從予。瑪竇十九篇二、因宗徒等將勤勞教事、辛苦過於他徒。我亦爲主簡召、以膺助人救靈之任。我亦且離鄉棄井、願與主生死相依、則亦可望主愛我之彌厚也。今須熱我事主耐勞之願、事係顯主光榮者、定志奮不顧身。

第二段 吾主永偕宗徒 吾主與宗徒及諸弟子永訣之時已近、嗣後在世再無相見之期。諸徒興念及此、能不黯然魂銷乎。主爰慰藉彼心、勉勵彼志、言雖顯與之相離、實則隱與之永偕、常施護助。語之曰、予恒居與爾偕、至今世沒。瑪竇二十八篇噫、主何慈愛若此。夫主與人偕、不但論天主性、爲無所不在、卽論人性、亦恒在聖體之中。且

在聖體內、較升天前未離世人之時、於我更爲利便。蓋前日惟在一處、今則何處有聖體、卽何處有吾主。其所在之地、勝前萬倍。前日與人締交、必進其屋宇、與之飲食。今者臨我胸中、作我神糧、供我飽飫。經曰、領予體、飲予血、伊懷予、予懷伊。若望六篇求主賜我識此恩寵奇奧、更勤於拜主、而虔於領主。

第三端 許聖神將降臨 吾主命宗徒敷教萬方、開聖教之基。徒等自知愚弱、思主命之艱鉅、已任之重大、未免意怯心疑。主乃壯彼志、安彼心、告以聖神將降、且隱示聖神之來、卽在目前。語之曰、居京、迨爾備自上之神勇。路加二十二篇此訓人事無所難、惟當求聖神默佑。能知己身無用、神魂匱乏、固爲善人自謙之事、而有益於靈。然或過於畏憊、萎靡不振、不知趨赴主前、倚恃吾主、以求聖神降臨我心。

光照我明，堅定我志，則必將流於自暴自棄。此亦吾人所當戒慎者也。今後須思如何求主，遣聖神於我，使得剛毅勇果，正謀義行。祝言

第三十二 總思吾主顯現

瞻禮四

定像 想見主徒每見吾主顯身，滿心欣樂。
特求 求主屢現我靈，賜我亦得聖寵之慰。

第一端 主現之數及主現之緣 四聖史記主現於徒等者，爲數共九。卽以上默想諸端皆是。然聖路加宗徒行實首章曰：耶穌受難後四旬期內，在宗徒前，顯證甚多，證其生活，恒論天國之情。可知吾主現於徒等，不止此數。敢問吾主何故屢現曰：欲徒等堅信復活之真，慰徒等離主之痛，并欲徒等知吾主雖不常在目前，而究竟未嘗或

遠。今者吾主往矣，而其待義德之靈，亦未始不若是。雖冥中默佑，常與之偕，然有時更顯格外洪慈，賜以寵光，加以熱愛，令人知主在其靈，而自饒神樂。又於聖體內，使人覺所食者，乃自天而降，自含諸甘馨，而生踴躍焉。余靈，尙宜熱心求主，日備爾靈，庶得時蒙恩顧，更思何事爲阻主降格者，速圖去之。

第二段 主現之地及主現之時 四旬中吾主屢現於徒，其地其時其序，人不得而知。此現至彼現，或晨或暮，或晝或夜，或堂內，或室外，時地俱無定限。然其顯現之多寡，每視人心靈之若何整潔，願望之若何懇切，而異。蓋訓人不論居何地，任何職，行何事，雖勞心勞力，亦不可阻人與主交遊，更不可拒主施人恩惠，又訓人勿以久不得主慰藉，而卽失望。亦惟急於滌己身心，切己意願，以備領受主恩，偕達

未聖王呼號曰。天主盼視。將活我等。爾民將歡慰於爾。望主示我等爾慈。而與我等爾救世者。聖咏八十四篇日中每誦此類經句。養我熱心。

第三端 主現倏忽及主現暫時 吾主顯現。概於宗徒及弟子之前。忽往忽來。爲時不久。其來也。適於諸徒不備之時。其往也。適在諸徒快覩聖容。恭聞聖訓。滿心歡慰。不忍舍去之候。推其故。一。欲人知吾主恩寵。惟施於盡心竭力。勤勞主事之人。二。訓人望主降臨。加我神慰。不宜過戀。因我靈永久之樂。惟在天焉。三。示人隨地隨時。小心翼翼。整治心靈。庶常有以備主俯顧也。求將棄世升天之吾主。至本國時。記我一念。路加二十三篇爲我留下一位於天。謝主爲我畢生所歷之苦勞。 祝言

第三十三 耶穌升天瞻禮 瞻禮五

定像 想見吾主自諸徒中騰空直上，冉冉而升。
特求 求主賜我聖寵，能覺諸徒當時所有之情。

第一端 吾主升天 經記吾主升天情狀，曰：耶穌受難後四旬日中，顯現於徒，證己復活。後引之出城，至白大尼亞，舉手降福於眾。降福時，聖身離地騰空而上，至空際彩雲遮蔽，升天，坐天主右。徒等仰天依戀時，見白衣二人立其前，謂之曰：「加理勒亞人，在此瞻望何爲？」耶穌已升天。爾今日見其何如去，異日將何如來。徒等叩謝天主，下山，回至日路撒稜，歡欣殊甚。路加二十四篇。瑪爾谷十六篇。宗徒行實一篇。我今行此瞻禮，如見主騰空而上，羣聖扈從，天神簇擁，直上天主坐右。聖父冠以榮福之冕，授以天地之權。語之曰：坐予右，俟予伏

爾仇於爾足下。聖咏一百九篇求主使我等以心靈居於天上時加恩佑，以行天上之事。賀主榮樂，爲其苦辱之報。重定我與主甘忍苦辱之願，庶得同享主福。

第二段 諸徒愉悅 吾主升天離世，諸徒正宜心痛，而乃歡欣殊甚者，何也。曰一、爲吾主戰勝仇魔，如征逆寇，今奏凱旋也。二、爲原祖獲罪，以致天門久閉，今吾主爲眾人啟其門也。三、爲吾主提其人性於天廷之頂，使吾人亦與其榮貴，而得享天主性之福也。四、爲吾主先言己之升天，爲徒預備區處，并代求聖父也。若望十四篇慎思此理，以之銘刻於心，爲我神樂之緣。則可望如主所云，爾心之樂，無人能奪於爾。若望十六篇卽在艱憂之際，可念保祿宗徒之言曰，我於困苦中，歡欣恒滿。致哥林多人後書七篇感我心情，據聖依納爵曰，瞻

彼昊天，視斯地爲汙穢。又據保祿宗徒曰：吾願解肉身之繫繫，而與吾主偕也。致斐理賓人書一篇定志於八日內，仰觀俯察之間，引心靈於神樂。更據聖額我略教宗曰：竄流之地，尙有如斯麗景，在家鄉，將何如哉。

第三端 斯日之益 宗徒憶此日所見之奧，念吾主所許之恩，便覺心志剛毅，樂受艱辛。謂爲主名而被窘辱，殊以爲福祉。宗徒行實五篇且謂此世之苦，不足準異日在天之榮。致羅瑪人書八篇其神效爲何如乎。我今行此默想，苟能善念此日之奧，善思吾主之訓，亦當有相類之效。求主賜我明其義，獲其恩，喜慶吾主，與之同樂。更求吾主降福於我，亦如昔日降福諸徒。 祝言

卷五 五月

月省之思 審判 見卷三第三十四題

首瞻禮六 聖心之神火 見是卷第二十七題

天主聖神九日敬禮

第一 九日敬禮之緣 瞻禮六 敬禮第一日

定像 想見聖母與宗徒教眾共聚一堂。

特求 求主賜我熱心誠意，行此九日敬禮。

第一端 敬禮之貴，其緣一 主既昇天，宗徒遵主前命，回日路撒稜，同聖母與教眾共一百二十人，聚於吾主建立聖體之堂，誦經祈望天主，待聖神降臨，如是者九日。嗣後聖教每於瞻禮前，加誦經文，增修神業。行九日敬禮之制，實昉於此。故此敬禮，可謂傳自宗徒，亦可

謂吾主親定。從此可知其貴。凡諸信人、胥當熱心鄭重行之。況修道者步宗徒後塵、捐棄世有、思勤主事、求顯主榮、更當虔恪奉行、以裨益身靈。我亦奮志敬起斯功、以之託於聖母、預思欲得何恩。細定敬禮神功、卽日忠信行之。

第二端 敬禮之益。其緣二 吾主命宗徒九日誦經祈禱、欲彼善備心靈、領受聖神恩寵。倘宗徒無此恩寵、則昔爲何如人、後仍爲何如人。於己毫無足用、於人亦一無裨益。而淑己淑人之業、至終不得有成。故恩寵爲宗徒至要之需。果能受之、則諸事無難、而功可預定矣。吾宜虔行九日敬禮、其緣與宗徒相似。況吾之品行賦性、未嘗勝於宗徒。若無天主聖神寵佑、而欲繼宗徒之業、欲修我聖召中當修之德、欲言行交著、有益世人、不亦難乎。今認我力弱無能、思保祿宗徒

之言曰、主、吾有善行之心、而無善行之力。致羅瑪人書七篇、卽誦伏求聖神降臨、爾爲貧乏之恩主。日中念此誦句、向聖神求恩。

第三端 敬禮之要。其緣三 宗徒急需聖神寵佑、而當預備己靈者、因世人梗逆、時際艱難、三仇之陰計、內外之窘厄、甚多也。故吾主將遣聖神降臨、卽以此急告宗徒曰、汝將涕泣憂愁、人絕爾而不許入殿、又人殺爾以爲立功於天主前。若望十六篇使彼祈望之心、不得不切。然則世俗與吾主相反。忠於主事者、被人憎厭。慕義者、每多艱苦。修道者、更多困頓。古今同然。今我欲善處憂患、克勝三仇、立聖賢之德業、而不求聖神寵佑、可乎哉。念宗徒行斯敬禮、偕同聖母、我可虔祈聖母、轉求天主。祝言

第二 九日敬禮之式 瞻禮七 敬禮第二日

定像 想見聖母與宗徒教眾共聚一堂，預備聖神降臨。

特求 求主賜我聖寵，能識宗徒何如預備，而則效之。

第一端 宗徒靜默 聖奧斯定曰：天主願盛加我人以聖神恩寵。然亦欲人預備己心，方能領受。問如何預備？曰：觀宗徒之表，可知矣。聚於主建立聖體之堂，遠避塵囂，澄心淡慮，或守緘默，或談神業，或省己心身，或思主遺訓，懸想聖神奇妙。我若冀望多受神恩，在此數日內，宜端莊靜默，謹守五官，無使細微愆戾，亂我內心之安，致損將受之益。求主賜我寵佑，能免心志紛紜，能得心靈沉靜。

第二端 宗徒祈禱 宗徒於靜默外，又虔行祈禱，無間斷，無懈怠，憶主昔日之言曰：聖父將付己神於求之者。路加十一篇既知所求必應，而盡力以求，自能悅樂主心。且主心之所以悅樂者，因其心志相

同、意氣和合、而咸歸一德也。不觀吾主遺訓乎、曰、爾等中如有二人、在世合意有求、在天聖父將與爾也。瑪竇十八篇故我於此九日內、當同心求主、善行祈禱之工、切求聖神寵佑。我與同人、苟能如宗徒一心一口祈求、亦可如宗徒得主俯聽、而獲異常神益。求主增我信德望德、於祈禱之端。且定稍加經文、求聖神降臨。又定何經誦於何時、以免遺忘。

第三端 聖母轉祈 宗徒知聖母最爲主心寵愛、賴其轉禱、最爲得力、故不但效其虔禱之懿表、且懇聖母代補不足、代獻己心、轉達天主聖子、速遣聖神。宗徒行實紀伊等恒心合意、偕耶穌之聖母而禱。聖師亦謂聖神加恩寵之速而多、因聖母大能之轉達。我亦當敬求聖母、常與我偕、補我不足、代我轉祈、獻我祈求於聖子。庶望聖神恩

龍、在降臨瞻禮日所欲賜我者、實能領受。毋因我之過犯、而失之也。經云、天主聖母、爲我等祈、以致我等幸承基利斯督所許之洪錫。向聖母咀味此經。 祝言

第二 聖神偕徒證主

耶穌升天後主日 敬禮第三日

定像 想見主謂徒曰、聖神來時證予、爾曹亦並作證。
特求 求主賜我全心修德、不畏艱辛、恒爲主證。

第一端 聖神證主 聖神爲吾主之證、何以見之。曰聖神假手於宗徒、令天下萬世知吾主爲天主眞子、救世恩主、審判萬民之大主。且斥才人之驕妄、訓彼欽崇被釘十字架之天主、而亦願釘其肉身、及肉身之偏私、挫奸雄之強暴、使聖教遍傳普地。卽幼童女子、亦得堅剛果銳、雖被刀鋸鼎鑊、不失其信德。噫、此皆聖神證主之奇也。主在

升天之前，早已告諸己徒，謂無聖神，不足以行大事，有聖神，始足以建洪功。然聖神非無故而自降，必須恭行祈禱，熱心預備，以待之。我欲立功修業，若無聖神恩寵，雖心疲力乏，究屬徒勞。故歷來聖教會，或修道院，凡舉行要事，卽平素功行，必先求聖神光照。我誦此經，熱心果何若乎？認己之失，求主寬赦。定志日後誦聖神降臨祝文，加倍留心。

第二端

宗徒證主

吾主旣言聖神爲證，又謂徒曰：爾曹並爲證。自

如德亞至遍地末境。

宗徒行實一篇，其後宗徒奉行斯命，如何忠懇，

歷歷可考。自日出至日沒處，幾無地不聞吾主之名。惡眾雖力阻，邪魔雖力攻，而聖教之傳，普世者，不至頽圯，今已一千九百餘年矣。夫十二宗徒，類皆柔弱愚鈍，而天主用以開斯教者，正欲人知斯教爲

天主親手之工。又訓人欲榮顯主名，救靈淑世，不可以本性劣弱，而恆怯不前。求主提振我心，增益我力，明識倚恃主佑，事雖難爲，亦可成功。時以保祿宗徒之言，自勵曰：我於堅強我者，無不能焉。致斐利賓人書四篇堅強我者，天主聖神是也。

第三端 吾人證主 觀聖神與宗徒之證主，既若是其美備，而吾人亦有證主之道，卽竭力榮主聖名。盡我心志，用諸方法，使人認識之，愛慕之，事奉之，是亦證主也。人能如是，卽契合聖神，并偕宗徒行至尊之事，立至聖之功，而實獲吾主之心。吾居吾主麾下，欲立功修德，自當專心致志於斯。顧斯道也，不必職爲司鐸，不必胸多學問。惟善言善行，虔誠祈禱，得其要領，可耳。試問我之證主，果何如乎。從今以往，庶幾自知其非，而思補過。向聖神念伏求聖神降臨。 祝言

第四 宗徒祈禱之式 瞻禮二 敬禮第四目

定像 想見宗徒教眾共聚一堂。

特求 求主賜我聖寵，善能祈禱。

第一端 宗徒之禱信而敬。按路加聖史紀耶穌昇天後，宗徒行九日敬禮，其祈禱之工爲最著。蓋大顯信德，如見天主在鑒，內外恪恭而祈禱也。吾主去世昇天，論其人性，宗徒已與別離，然天主性，仍與相偕。深信吾主鑒觀在上，聽我言而視我行，透達我心曲之隱，洞徹我神靈之蘊。於是皇皇穆穆，特昭如之誠。道則恭默以思，經則端莊以誦，不敢稍失禮儀。凡人果能有此信心，則儀度自然莊重，言語自然留心，此固不易之理。然而我之儀度若何，言語若何，姑不暇論。卽主前誦禱時，亦多不敬之失，謂非寡信之證乎。求主矜憐，賜我於

誦禱前、定志信而且敬。自問曰、我將與誰語、欲行何事。

第二段 宗徒之禱謙而望 宗徒之求、不但信而敬、且有自謙望主之心。自謙者、憶已往時之過、認己柔弱無能。將爲廣傳聖教、成主所托之事、知非己力所能。望主者、因愈知己力之弱、愈恃天主之能、愈切虔誠祈禱、不忘主求則受之之訓。經曰、謙遜者之求、透達雲霄。辨德經三十五篇 至爾之所求、多不見諸者、非因爾謙之未深、望之未切乎。然而道固不遠於人也。溯前時之多失、念後日之難恃、皆是增爾謙望之情。偕達未聖王向主曰、回視我、憐憫我、蓋我子然而窮。聖咏二十四篇 每於誦經前、或祈禱時、當思己之爲己、主之爲主、而發深謙切望之心。

第三端 宗徒之禱忍而恒 宗徒之求、又不但謙而望、且忍而恒。蓋

雖知聖神將降恩寵於己靈，而究未知何日何時，方允己之祈求，滿己之心願。苟不能忍，則憚煩者必將苟安。苟無恒心，則始勤者必將終怠。而宗徒安心以待主恩，忍己勞也。堅念以邀主寵，恒己德也。無怪其果獲酬報，而於第十日，得聖神充滿其靈也。爾之祈求，豈如斯乎。無乃淺嘗而中輟乎。抑若限主以時刻，而未能久待乎。若然，則無忍而不恒，求之所以不得也。今求宗徒，更求聖母，偕爾行此敬禮，熱備爾心，不敢稍懈。庶望聖神，亦將充滿爾心。祝言

第五 選徒以補茹答之缺

瞻禮三

敬禮第五日

定像 想見聖伯多祿於眾人前，談論選舉補缺之徒。

特求 求主賜我聖寵，能忠於事主，無失聖召之恩。

第一端 伯多祿開議 吾主自諸弟子中，選十二宗徒，欲彼敷教萬

方證己復活之真。證己聖教之正。今茹答獲罪被黜。宗徒之數已缺其一。然天主之謀。不因人罪而敗。宗徒潛心祈禱。預備聖神降臨時。亦不忘己身之事。聖伯多祿得主默啟。謂眾曰。諸昆。同儕。中向與吾親炙主訓者。當選一人。代茹答爲吾主復活之證。如聖咏經書曰。斯人牧職。他人任之。宗徒行實一篇。若修道者不忠於主。失主聖召。莫謂因己被黜之故。而主事有所不便。修院有所虧損。此心適足以自誤。實無傷於天主。蓋天主自能選拔他人以補其缺。享其榮冕。可憫者。惟被黜之人耳。恐我之聖召。或因他人黜後而得之。主之納我於修途者。殆卽選補他人之位。且我若不慎。亦將被黜。而更爲他人得之。未可知也。當如何感激。如何謹慎。以望善承主寵。永不失墜乎。毋忘若望宗徒謂一主教曰。爾所有者守之。爾之冕旒。勿令他人獲之。

默照經三篇

第二端 眾人舉二徒 眾舉若瑟及瑪弟亞二人，惟舉者人數相同，不知何從何去。眾人卽誦經祈禱，求主指示曰：主，爾識人心蘊，此二人中，請示孰爲爾選，以任荅之職。宗徒行實一篇此訓人決疑之良法。念我平生亦有憂疑難決之事，不知當求斯恩乎？請免乎。與長上商量，易斯地，調斯職乎？於斯疑慮之間，務當效法宗徒，祈主明示己意。我能如是行之乎？不匆忙處事，以一己之心，加於主旨之上乎？伏求聖神賜我上智，明徹主旨，迪我心履，解我心疑。賜我行不涉於鹵莽輕脫，而慎守聖依納爵決疑定事之規。

第三端 瑪弟亞得選 眾人聞之，得瑪弟亞，遂列於十一宗徒。天主之旨已明，眾人之疑亦解。尊敬瑪弟亞爲天主所選，一如十二徒之

一。同上當是時，在瑪弟亞不聞稍有驕矜之態，而若瑟亦毫無悲憤之心。可見聖賢之度量，一本於至公無我，而幾微之私意不參焉。聖奧斯定曰：於未定之事，可各從所好。於已定之事，宜咸歸一德。旨哉是言，人能遵斯言而行，自能彼此輯睦，而不失昆季之愛。賀聖瑪弟亞，并祈轉求。祝言

第六 聖神恩寵之需 瞻禮四 敬禮第六日

定像 想見宗徒等聚於一堂，誦經祈望天主。

特求 求主賜我上智、聰敏、超見之恩。

第一端 上智 上智者，能辨物之輕重，及事之宜否，并明徹事主救靈之理。宗徒未得聖神降臨，不透徹敬主修靈之事，不深究永遠長生之業，惟圖目前財貨，此身衣食。觀於主將受難，相爭同儕中，孰爲

尊大。路加二十二篇主將昇天，猶問何日復興廢國。宗徒行實一篇而爲此世之王。主曾諭以醒寤祈求，而徒不之顧。可以知其愚矣。故人無聖神上智之恩，多不知研求靈魂之業，不能行謙忍苛刻之工。凡神修功課，亦必隨意缺畧。而有形之物，快身之事，則神專志銳。一若不可不圖。此上智所以爲至要之端也。求聖神賜我上智，能珍愛靈魂與天上之事，踰於世間諸有。今日與祭拜主時，更當切求聖神上智之恩。

第二端 聰敏 聰敏者，能通徹聖教中深奧道理，聖經內包含妙義。聖神未降時，主常以天國事告宗徒，宗徒茫然不悟，時參以世俗粗鄙之思。故主曾責之曰，爾猶無知識如是乎。瑪竇十五篇一日，吾主語徒受難復活事，聖史記門徒弗達。路加十八篇其餘可類推矣。若

無聖神聰敏之恩。吾之不敏。恐亦猶是。蓋我原無能振拔心思。以注想天主之奇妙。雖天地中。所見所聞者。皆示我以天主神奇功用。而我不能覺察。且誦神業之聖書。聞修省之至理。我又覺淡然無味。是何異瞽者在法書名畫之前。而不知寫手之高超。伏懇聖神。自天降發爾光之銳。庶幾亦能闡明主道。定志數日內。屢念聖神誦句。以求切要諸恩。

第三端 超見 超見者。超性之見識。能分別思言行爲。所當行之善。所當戒之惡。萬事翕合天主聖意。宗徒初無此見。心志迷離。每不知何去。何從。身雖隨從吾主。然意念間。究有世俗虛浮之想。我無聖神超見。亦覺心志遲疑。不能自主。一身之內。一日之中。忽愛忽樂。乍晦乍明。而於繕靈修德之途。一若進退維谷。像司之惶惑。魔誘之艱險。

人事之危疑，皆需超見之恩，以鎮定之。伏求聖神降臨。祝言

第七 續思神恩之要 瞻禮五 敬禮第七日

定像 想見宗徒共聚一堂。

特求 求主賜我剛毅、明達、孝愛、敬畏之恩。

第一端 剛毅 剛毅者，能恒心行善，克勝三仇阻礙也。宗徒未得此恩時，固爲善士，然志氣柔懦異常。吾主建立聖體夜，無不自認爲效忠於主，甘願偕主羈囚繫獄，至死靡他。豈知一轉瞬間，見兵卒蜂擁而至，卽鼠竄而逃，不知何往。所以立功修德，非剛毅不能。凡人無主寵佑，志雖大，言雖美，及見諸行事，則畏葸也，無恒也，缺其規誠，失其職守，與曩日之美志，全不相符。卽有人詰以前定之言，必將飾辭以自解。有時撫躬自問，亦無能自解，而竟漠然不顧，悉付東流。以致數

刻之時、欲振作精神、恪行祈禱、亦不可得。若此者、爾豈未嘗犯之乎。當自訟自認、愧慚求恕。曰、賜我剛毅勇果者、矜憐我等。日中屢誦此經、望聖神堅勵我心。

第二段 明達 明達者、通曉本性事理、世間學問、以裨益敬主救靈之業。天主欲人知聖教之興、非人力所致。故選十二門徒、立其始基。其間大半業漁、概屬魯鈍無知之輩。若非天主聖神、授以真全學問、恐亦終身如是已耳。夫人自幼攻苦、專心學業、講求天文地輿、格物窮理諸事、原可稱才高識廣、博覽古今之通儒。而於事主救靈、進德修業之功、漫不留意。則本原未達、亦何足指爲講求實學、崇尚真修者乎。求主賜我聖賢遠大之學、曰、真道正理之根源者、矜憐我等。定志於課讀前、誠心懇意、伏求聖神降臨。

第三端 孝愛敬畏 孝愛者、如孝子愛其慈親。敬畏者、如純臣敬其國君。宗徒初意惟思一身目前之利、以及世上之榮。其從主與愛主之緣、半由於此。故一有艱險苦辱、被難受死諸事、卽陷於不忠不信者居多。而求其如孝子純臣之心者、甚少也。夫我之愛主、果爲天主乎、抑將自爲乎。我畏獲罪、非畏罪罰、避地獄煉火之苦乎。我加工行善、非因求永福之賞乎。此心此念、雖不爲不善。然較之以孝子之心、純臣之意、而愛敬吾主者、已爲卑下矣。懇求聖神賜我恩寵、使我愛主敬主、思主無窮美善、可愛無比。自宜修德進善、專務倣效主美、求悅主心。祝言

第八 聖神降臨之向

瞻禮六 敬禮第八日

定像 想見吾主。諸宗徒曰：予弗往，聖神弗臨。

特求 求主賜我，恒得聖神寵照，而善用之。

第一端 慰藉宗徒 將欲勉我至終熱心，行此九日敬禮，當知吾主許徒遣發聖神於世，有何意向。吾主昇天後，若無聖神臨格，則宗徒在世，誰爲其伴侶，誰慰其憂苦，誰勗其勤勞。故吾主曾謂徒曰：未幾弗得見子。然子弗忍爾爲孤獨子，子將求聖父別遣安慰者，來與爾偕。若望十四十六篇此言卽指聖神也。當宗徒始敷教時，卽被人鞭撻囚繫。然其心不但不以爲苦，反多神靈之慰，而覺有不可勝言之樂。蓋得於聖神之力者，深矣。吾步宗徒後塵，欲善盡我職，自有艱虞橫逆之遭。若亦得聖神相偕，必能抑情含忍。將見十字架之苦，諸艱之困，翻作內心無任之歡，豈不懿歟。伏求聖神降臨，愛者之慰，苦者之安，勞者之息，涕者之樂，吾心之怡客也。遇艱難憂苦時，當向聖神

求慰我心。

第二端 訓迪宗徒 吾主遣聖神降臨於已徒者，不但有以慰藉之，亦欲充滿彼靈性之光，申明已前日之訓也。且更訓示以急需之理，佑啟彼後日之事。嘗謂之曰：予尙多有攸言於汝，惟汝今弗能勝。誠實聖神既來，教爾各等誠實，誨爾未來事。若望十六篇其後，悉如主言云。夫宗徒之聖神，亦卽吾儕之聖神。昔聖神所加於宗徒者，今亦欲加之於吾人。惟吾人當虔心以求之，清心以承之耳。聖會良規，凡於行事之先，須求聖神降臨，有深意存焉。問我之行斯祈求，誦斯經文，意果虔誠，志果懇切否？抑惟脣舌之工，而心不知何在否？謝聖神寵照，訓誨諸信者之心。求賜發其聖光，常照我靈。定志以後，請求聖神時，再不徒循故事。

第三端 溉澤宗徒

論宗徒之職、應光榮吾主、不惟修一己之身靈、

且宜普化萬民、使天下人信奉真主、聆主聖訓、味主聖道、痛改前愆、歆慕實德、成爲吾主肖徒、而優入聖域。然宗徒欲盡己職、苦無其力、非得聖神不爲功。此聖神所爲於慰藉訓迪外、更施以溉澤之恩也。主嘗謂徒曰、聖神來時證予、爾曹亦並作證。若聖十五篇自如德亞至徧地末境、宗徒行實一篇爾爲予作證。非爾自語、聖父之神語於爾也。瑪竇十篇凡爾仇敵弗克抗、且弗克對。路加二十一篇噫、主澤之洪、一至於此。我靈乎、爾若效宗徒之虔禱、亦可望得與於斯恩也。悔已往之多疎、願從今以力改。向聖神祈求。祝言

第九 聖神降臨之近備

瞻禮七 敬禮第九日

定像 想見宗徒教眾聚於吾主建立聖體之堂。

特求 求主賜我聖寵、能沉靜祈禱、倚賴聖母、以備明日瞻禮。

第一段 沉靜 九日敬禮將畢、當加倍熱心、以領聖神恩寵。凡德業之可助我獲寵者、從新篤志力行。其中靜默之修、當推第一。因此靜默可得心志平和、與主契合。故宗徒等避塵世之囂、而潛居一室也。我今日當與物應酬、恐難得幽閒恬靜。且因有瞻禮之備、反覺事務紛煩。然當留一靜地於心、以爲主安憩之所。是卽謹持此心、慎行諸事、步不輕舉、語不妄發、善守耳目之官、無失端正默靜之規。庶幾時得締交於主、而爲精於內修之人。切求聖神爲我神師、訓我沉靜之方。庶幾外則因應咸宜、內則沉靜自若、而能兩全其用。

第二段 祈求 九日敬禮之初、已明言祈禱爲預備聖神降臨之要法。宗徒雖蒙主許以聖神恩寵、然猶不遑稍逸己志、而謙心熱意

以求。因知天主之恩，雖出於天主仁慈之量，亦爲吾人祈禱之驗。且於祈禱之外，另加補贖神工。蓋聖教於是日，原有大齋之例也。回思九日內祈禱之工，能無懈怠乎？能有恒心乎？其中虧缺，今日自當加工以補。莫謂諸務紛冗，無暇祈禱。按聖經明訓，事雖煩，不足爲祈禱之阻。辨德經十八篇且行祈禱者，非手足也，心也，工作之中，心能向主而求，則動作皆爲祈禱，不亦懿歟？求主聖神之火，灼熱我等冰心，以能貞身服勤主命，並能淨心翕合主旨。日間每誦此類誦句，以激勵我心。

第三端 倚賴聖母 倚賴聖母，爲得主聖恩之妙法。九日中固未嘗忘之。然今日爲九日之終，尤當格外虔誠，趨赴聖母座下，求其轉達。救世主因聖母而降於人間，聖神恩錫，亦因聖母而賜於人類。聖伯

爾納爾鐸曰。諸凡福寵。天主欲人因聖母而得。然則欲求恩寵者。安可不倚賴聖母乎。願我日常注望於大能之母。願我心時向慕於仁慈之母。懇祈聖母代獻我求於主。如昔日代獻宗徒之求。并祈聖母轉求聖神。加我神恩。亦如昔日爲宗徒轉求。瞻禮七。本爲特敬聖母之期。今日於誦句中。宜不忘多參聖母聖名。祝言

第十 聖神降臨瞻禮

主日

定像 想見聖神降臨時。宗徒等有何景象。

特求 求主賜我聖神光輝。以長至智。以恒安樂。

第一端 聖神降臨 吾主昇天後十日。踐前日之所許。遣發聖神。充滿諸徒。經紀五旬期已滿。眾徒聚一處。天忽響。如風大作。充盈彼所居之堂。分現多舌如火。坐各人頂上。皆因聖神盛滿。始能講異地。

之音，各因聖神界之語焉。宗徒行實二篇聖路加述聖神降臨之異，不過如是。而宗徒之所以前後如出兩人者，卽在斯也。平日囿於本性，愚魯無知。霎時間，徹通正道，充盈上智，似爲學深德粹之神人。堅強剛毅，心切救靈，竟能行吾主所託之大事，而普化斯民。噫，聖神感化之功效，何若是之靈且速也。夫他瞻禮日，大抵頌謝吾主已往之奇奧。而其奇奧之跡，不復再見，所存者，惟奇奧之效。至聖神降臨瞻禮之奧，則常留於聖教會，常施於信者之靈，迄於世終無間也。吾人行此瞻禮，當不但記念其奇奧，且倚恃吾主之聖訓，望聖神降臨於我，錫我神恩，庶得與於宗徒之福。嘗有許多信靈，虔行九日敬禮，雖外形不著火舌之光輝，而內心必得聖神之寵賚。問我果何如耶。亟須篤信吾主所許，仰望聖神之恩，懇切祈求。

第二端 廣布福音 當日聖伯多祿卽出而宣講福音。宣講之餘，痛悔領洗者共三千人。以後宗徒分行，傳教萬方。卽彼在生之日，已見各國有人信從聖教，敬奉吾主爲救贖恩主。而先知若厄與達未之言，已驗。蓋彼等曾代主言曰：予將發吾神於世，而地面爲之一新。且代不乏人，教皇主教神父祖述十二宗徒憲章。七十二弟子，聖聖相承，賢賢相繼，遞傳以至我身。嗚呼，福音之廣布，其誰之力歟。今日者，適當記憶此恩，而顯然謝主之日也。故凡修道中，有救人之職守者，更當熱以救靈之火，勤修省之工。自問能以嘉言善表，祈禱苦工，或別用智能良法，以廣揚天國，匡拯斯人乎。如或神火冷澹，尙其懇求聖神增熱吾心。

第三端 始基聖教 古今來服宗徒教化，而從其道者，雖言語不類，

地位不等。然共成一會，猶如一身。信德同，規誠同，聖事及教皇，亦無不同。此會繼承勿替，遍傳於萬國五洲，確係至聖至一至公之教會也。今日憶其開創之始，亦知如此大業，罔不由於聖神之工。吾幸得領洗寵恩，爲聖教義子，當自忻自慰，感謝吾主特恩，更當自奮自勉，整修一生德業，不愧爲天國良民。向聖神虔求賜佑，克副所願。 祝言

第十一 聖神降臨之時地效驗

瞻禮二

定像 想見宗徒充滿聖神，愛情焚炙。

特求 求主賜我忠誠懇摯，愛慕耶穌及聖教會。

第一端 降臨之時 聖神降臨，適遇主日，爲耶穌復活後第五十日。

耶穌復活在如德亞巴斯卦大瞻禮之翌日。聖神降臨，亦在如德亞

五旬大瞻禮之翌日。此見天主上智處事之宜。而以新教繼古教也。如德亞人性情頑梗。天主於雷電中。授彼古教之律。使之恐懼。其律爲奴僕之律。刻於石板。天主聖神付人新教之律。則異是。以神恩寵愛。印於人心。如待兒女一般。使人亦具好兒女之真情。愛慕天主。事奉天主。謝主賜我得此典律。并思有以守之。守之若何。一。行事當有倚主之情。如孝子之於慈父。二。非因畏懼而事主。當以愛德爲我諸行之基。三。事奉天主。惟爲天主無限美善。不爲天主無窮賞報。聖保祿宗徒曰。爾非愛奴僕之神而畏懼。乃受愛子之神。而呼天主爲父也。致羅瑪人書八篇。求主賜我能明此義。偕聖方濟各沙勿畧曰。天堂地獄。未足以動我衷。主爲吾主。吾天主。斯我心愛戴於無窮。

第二端 降臨之地 聖伯多祿首領羣徒。偕聖母聚於耶穌建立聖

體之堂。得聖神臨格。充滿彼心。斯堂也。按聖師之訓。卽爲聖教之像。普世男女信人。咸在其中。遵救世主之規。聽教化皇之命。由是可得永命之源。可領聖事之恩。我旣幸在聖教。得其無數神恩。當思何以爲報。報之何如。潔我身心。以榮顯之。求主馴伏其仇。以廣揚之。又賜異端歸化。而誠服之。竭我力。致我身。盡我才能學問。使人認識之。助人信奉之。此皆我分內之事。問我果嘗切心行之乎。求主廣賜聖教會。教化衍盛。異端消滅。云云。

第三端 降臨之效 經云。因聖神盛滿。始能講異地之音。各因聖神界之語焉。宗徒行實二篇宗徒之滿聖神。滿於心身。能倏忽間。學行兼優。且彼之滿聖神也。悉按各人本分與心量而分。故宗徒之滿。過於他人。而聖母之滿。較衆人爲尤甚。宗徒語異言。如聖神界之語者。

卽保祿宗徒所云、吾儕不混天主之言。然由誠實、由天主、在天主前、因基利斯督所語也。致哥林多人後書二篇是可知言語之宜有四、一事宜實、而意宜誠。一宜由於天主、不出於偏私。三、宜如言於主前、聞於主耳。四、宜因基利斯督、論身心有用之事。求主賜我慎於言語。

祝言

第十二 聖神降臨之形像 瞻禮三

定像 想見舌形如火、坐於宗徒等頂上。

特求 求主賜我聖寵、能明大風火舌之奧蘊、而沾其神益。

第一端 風聲 經云、五旬期已滿、眾徒聚一處。天忽響、如風大作。宗

徒行實二篇此蓋天主聖神示人降臨之氣象、使眾人奔走偕來、宗徒得以宣傳聖道、爲多人領洗入教之機、而新教卽繼古教而興也。

且此風之大、表宗徒既得聖神恩寵、將風動萬方、聲聞四表。天之所覆、地之所載、凡有血氣者、莫不被聖教之風化、聆聖教之聲名。存神過化、上下與天地同流。百世而下、尙皆聞風而興起。非聖神而能若是乎。吾今者當奮乎百世之上、效宗徒所發之熱情。求聖神之風、化我心。聖神之聲、提我耳。聖神之寵、滿我神靈諸司。將見頑廉懦立、無異宗徒親被其風。倘猶未得我求之效、仍不宜灰心敗志、惟靜以待時。因主嘗曰、風任起任發、作於倏忽之間也。當慎於思言行事、無礙聖神之寵照、靜待聖神之吹噓。庶亦能奉揚仁風、惠彼黎庶。

第二段 舌形 宗徒既聞風聲、卽見多舌如火燄、分坐各人頭上。天主聖神、以舌形表己降臨者、因宗徒有傳授主言之職、而舌爲布化之具也。觀宗徒肅得聖神降臨、卽通萬國方言、非其明效歟。吾儕之

舌、恐無宗徒之大用、亦無司鐸之職分。然亦當用之以稱頌天主、光榮天主。我雖不能盡通異地之音、然當知舌柔言便、亦係天主大恩之一。審判時、將訊我用之如何。嗟嗟、白圭之玷、尚可磨也、斯言之玷、不可爲也。經曰、人無言失、斯爲完人。反身自問之餘、其能免於言失乎。求主赦我口舌之愆、再新我慎言之志。

第三端 如火 經紀聖神降臨、有舌形如火、分置於衆人之首。火之爲物、光也。熱也。能煉物也。能化物也。而聖神降臨於宗徒之功效、實有如是。以聖寵與信德之光、照耀彼靈。以愛主愛人之熱、炎炙彼心、煉淨彼纖微之愆忒、化彼肉人爲神人、使前後如出兩人。凡若此者、非特宗徒有是效、卽善靈之得聖神恩寵者、亦有斯驗。我旣盡九日敬禮之工、而聖神又甚樂加人恩德、自可望其或朝或夕、俯允我求。

也。念聖母前日助宗徒得聖神之充盈，今特懇其爲我祈主，賜我亦得聖神寵錫，更得靈魂最急之恩。 祝言

第十三 聖神變化宗徒 瞻禮四

定像 想見宗徒充滿聖神之火，有如現於形色。

特求 求聖神變化我心，亦如宗徒得其聖寵之效。

第一端 宗徒變化之奇 宗徒既有舌形火燄，坐其頂上。而愚怯驕傲無恒之罪人，卽變爲聰明果毅，深於謙德，精於神業，堅於聖寵之奇人。謂非聖神化功，充滿彼靈之明效哉。吾主教誨宗徒，歷三年之久，未見成效。而聖神忽於瞬息間，著其奇驗如此。彼善士之靈，忠於主寵者，特於領聖事時，得聖神恩佑，雖不常形於外，而其神效亦必相似。然我屢領聖事，而鮮得靈性之明，遇誘惑艱愛，猶覺柔弱無恒。

惡不能改，德不加修者，豈非我心淡行曠，不善用聖恩之故耶。自謙自媿。祈主仍賜寵照。定志善備己心，以領聖事之恩。

第二段 宗徒愛人之火 宗徒既得絕大聰明，能通異語諸恩。卽用其恩，以光榮天主，助人認識聖子。心滿救靈之火，口溢愛主之言。此言也，實爲聖神之言。而大異於世俗之言。蓋聖神之言，惟知愛人事主，而世俗之言，則躁妄浮誇，譏評謠諑而已。我之言語，果能論主事，榮主名，談救靈傳教等事。是則聖神在我心，卽爲聖神之言矣。若惟論世上光榮，一身利便，則非聖神之言。其能免俗氣薰心之累乎。求聖神常居我心，常引我舌，常熱愛人之火，不失善言榮主之機。

第三端 宗徒義勇之恒 宗徒因救靈心熱，多遭困苦艱難。怙惡者，譏諍之。明經士，誣罔之。司教等繫縛之，錮於獄，威以刑，禁彼傳耶蘇

之名。然諸徒之心志，不爲之挫折。且增益己之堅剛，行主寄託之命，作主復活之證，終身毫無間斷。曾謂若輩曰，爾擬於主前，宜聽主命乎，抑曲從人意乎。吾不能以目覩之事，默而不言。與其聽人言，寧聽主命也。宗徒行實四篇，我隨聖神之寵照，發救靈之神火，恐難免如宗徒之艱虞困苦，受人譏疑誣害。然我於此，益宜固我心志。因我行事之模範，非世人之思願，乃天主之旨意，教會之規條，本身之職分，師長之指引也。苟能忠信於斯，堅持不屈，則我之神火，亦不爲不熾。將被主降福，而富於功效也。亦如昨日，向聖母虔求。祝言

第十四 聖伯多祿講道

瞻禮五

定像 想見如德亞羣衆，環立宗徒前聽講。
特求 求主賜我聖寵，能宣主訓，善聽主辭。

第一端 聽講之衆 聖神降臨時，天空忽響，風聲大作。衆人聞聲，共聚宗徒所居之堂。按路加聖史紀其間有各國修士，卽謂十餘國中，有比衆虔誠，每年朝禮聖堂者也。當其時，諸國之人聽宗徒宣講，各聞本國之語，各明宗徒之言。想彼旣歸故土，必以所見所聞，告之鄰里。故聖伯多祿初次講道，卽可謂向天下萬民，講福音之種。而在宗徒未散時，已播於普世。至其分行各國，則培植旣勤，以致生花結實。蓋信奉之民，從此漸廣矣。且宗徒有開創聖教，廣布福音之職。初時誠不知何以行之。今以講道之事觀之，可見天主處事之奇，真有出人意想外者。我行長上之命，或於修德之途，恐不無艱棘，當堅心倚主全能。如果急需神力，天主將行聖跡以成其功。不忘亞巴郎謂己子依撒格曰，天主自有權衡。

第二端 宣講之道 聖伯多祿所講之道，有意義，又有格式。蓋其意義，多取證於古經。論聖神之臨格，證其恩寵之奇妙。論耶穌之生死復活，證其爲天主所許於先祖之救世者。侃侃而談，無有一意一義之不透徹。至其格式，則始引先知之言以動聽，繼明真實之理以解惑，後乃動憐憫之心以責彼非。謂彼受司教之愚，忍置救世主於死地。其言剴切詳明，故能感人心服，動人悔悟。此皆聖神導之之恩功也。然則人有過失，凡職當規訓者，宜引彼自知己過，亦可借端以從末減。勿以粗厲之詞，觸彼忿怒。誠如是，斯天下無不可化之人矣。若吾受長上訓責，尤當謙心領受。諒彼訓責之意，原以盡己職，而輔吾德也。求主聖寵，使我能如是行之。

第三端 講求之效 聖伯多祿講道之驗，最神最奇。蓋眾人聽講後，

卽心開目明，因而得見信德恩光者，共三千人。是日卽在宗徒之手，領受聖洗，兼領聖神恩寵。數日後，又得隨其表而入教者，五千人。是知宗徒未曾分散之先，聖教已開其基，而廣傳於多國矣。我聽長命，或存善心，而行救靈愛人之功，不可以一時無效，遂致失望。亦不可恃本性之力，而忘求助於聖神。茲賀聖伯多祿道化已行，向聖神求賜廣揚聖教。祝言

第十五 聖神感化新進之人

瞻禮六

定像 想見初時信友，同宗徒共聚一堂，誦經讚美天主。
特求 求天主聖神重新我德，重熱我心，一如當初信友。
第一端 不戀世有 神貧輕世，爲真福八端之首務，爲教友修成之基址。然當聖伯多祿講道時，吾恐新信友，習染已深，世間一切財貨

顯榮、仍不免橫梗胸中、重爲修德之阻。然據聖路加所紀、則皆售其產業、攜值入公。宗徒按各人所需、分其財貨。於是割截俗纏、專心致志於天上事。若非得聖神聰明上智之恩、孰肯視財貨顯榮爲空虛之物、毒人之酖耶。故修道者得聖神恩寵、有志精修、捐棄世俗一切、務甘貧之德、矢絕財之願、亦大幸事。果能始終如一、如當初信友之全然變化、亦將得天國無窮真福矣。伏祈天主賜我恒心之德。

第二端 共相愛慕 初時信友不戀世有之德、已足稱羨。而彼之共相愛慕、則更動人觀感。蓋性情雖各異、習俗雖各殊、而語言無不脗合、意氣無不相投。祈禱同、飲食同、愛樂亦一一相同。彼此敬愛親睦、舍己從人、如路加聖史所謂一心而一靈者、誠非虛語。故當時外教人、見其德而感服於心、知聖教爲至一至公、因是羨慕者多、而信奉

者廣也。噫，此種愛人之德，非由聖神恩寵而來歟。若今日修院中，誠不敢謂無此和愛之人。然以合院而論，果皆以超性之愛，汎愛眾人，善與人同，忠誠勤懇乎。避無端之爭競，屏私好之締交，而一無虧缺乎。求聖神增我熱愛之德，甘願便益於人。

第三端 虔誠敬主 甘貧爲克己之德，相慕爲愛人之功，二者固可尙已。然未能虔誠敬主，則二德雖美，未免虛文外襲，而缺內心實德之工。吾主在世時，嘗責信友之不誠者，謂其脣雖敬主，心實遠主。瑪竇十五篇因世俗多所牽絆，肉身多所營求，欲望其敬主虔誠，豈不難哉。乃同是人也，轉瞬間內修忽精，神業忽勤，冷心忽熱，非聖神感化之功效，孰能至於此乎。路加聖史紀其時信友，恒守宗徒之訓，恒領聖餅之糧，恒行祈禱之工。宗徒行實二篇可見彼虔誠倍著，而足

爲後人之師法者矣。求聖神賜我神貧和愛虔誠之德。 祝言

第十六 聖神恩寵之奇 瞻禮七

定像 想見吾主謂倪閣德睦曰，受生於神，神也。

特求 求主聖神之火，爍熱我心，使我時時事事，翕合主旨。

第一端 恩寵之效神妙 凡物各以類生，禽生禽，人生人。雖初生時，視聽言動，不及長成者，然其性體，究不出乎生者之類。聖若望紀吾主謂倪閣德睦曰，受生於人，人也，受生於神，神也。三篇聖奧斯定曰，爾若生於神，是亦爲神。蓋人得天主聖恩寵愛，生於聖神，如得天主本性流溢，而亦肖似乎神。聖教會有神人肉人之稱，所謂神人者，嗜欲不動其心，偏私不擾其行，明司常得神光之照，願欲常燃神愛之火者也。而肉人，則事事與之相反，惟爲肉身所累，難得天主聖恩。故

凡修道者，務當修己神行，而爲神人，毋使人稱爲肉人也。

第二端 恩寵之行任意 吾主比聖神於風，謂倪閣德睦曰，盍視風乎，任起任發。同上言聖神欲施人恩惠，無人強迫，而於人於地於時，莫可得而限之，亦莫可得而問之。非但善靈多受其恩，多得其效，卽不之求者，無功德者，甚至抗逆聖神者，亦時或蒙其寵愛也。若夫義德之靈，常契主意，無奴僕畏懼之情，無傭人求償之念，無俗士憚煩之弊。雖無地獄，而自不願犯罪。雖無天堂，而自樂於行善。以天主之心爲心，以天主之意爲意，而萬事無不左右咸宜。此則聖神之奇效，特因至人卽義人也，而益彰矣。求主增我神愛，賜我能如善義之靈，定志於行事間，無不情深愛主。

第三端 恩寵之繇莫測 主續謂倪閣德睦曰，汝聞其聲，莫測何來

何往。同上。蓋謂聖神欲發其聲，施寵於人，無物可以阻之。故凡堂殿瞻禮，平時寤寐，誦禱工作，觀善書，聽主訓，起居動靜間，無在不有其聲，卽無在不可聞其聲。且聖神之聲，與他聲迥異，能令污者潔，枯者潤，硬者柔，寒者暖，弱者強，驕倨者謙遜，悍戾者良善，好貨者甘貧，縱欲者克己。若人能善用聖寵，則恩上加恩，其德量將不知伊於胡底。在我惟當傾耳以聆主聲，虛心以受主訓，隨地隨時，順聖神之指引。我若早能行之，心靈當不如是之貧乏矣。求聖母轉求聖神，賜我恩寵。祝言

第十七 天主聖三瞻禮 主日

定像 想見吾主謂徒曰，往誨萬民，付聖水因聖父及聖子及聖神之名。

特求 求主賜我真切知恩感愛於天主聖三。

第一端 聖父之恩愛 天主聖三瞻禮，爲聖教年初至今諸瞻禮之總束。論三位一體之理，微妙精奧無窮。經云我信全能者，罷德肋化Dei Patris Filius成天地，聖父爲聖子聖神原始，故三位雖屬一體，而全能之名，與造化之功，獨歸於無原始之聖父。是故我所得諸恩中，首先之恩，凡生養保存，及天地萬物，有裨身命者，皆當歸於聖父。若非天主生我，則我將永在無中耳。天主能自無中另造億兆人類，較我更善更美，而不必造我於世。然天主初不另造，而畢竟造我者，非其愛我之深，特加我以無窮之大恩乎。噫，天主真爲仁愛之大父，造我之後，又免我諸患，救我猝死，存我於今日。念我旣受主內外無數之恩，豈不當虔心愛主，而報其愛於萬一乎。當大發我欽崇感愛愧慚奉獻之情，且

定於日內，以此情意，涵養我心。

第二段 聖子之恩愛 聖子降生，爲救贖我眾人，甘屈己尊，甘受萬苦。則此救贖之恩，比造化之功，愈深愈大。蓋賴此鴻恩，吾人得免爲魔役，脫於永死，復還聖寵，及天堂榮福之分。如有朝廷元子，爲窮凶極惡之叛臣，代受千萬苦難而死，以贖彼之罪，救彼之命。則天下萬世，當如何驚其德，而頌其仁哉。觀此，亦可上推聖子之恩矣。聖保祿曰，消耗己而取奴僕之性，自謙聽命至死。致斐理賓人書二篇又曰，凡生者無生於己，惟生於爲我而死者。致哥林多人後書五篇然則我將何以感謝其恩乎。當思何事可證我知恩感愛之情，而勉力行之。

第三端 聖神之恩愛 聖神於我領洗時，寵照我靈，洗滌我罪，賜我

愛德及聖寵諸恩。賴此恩寵，得爲天主子，而與基利斯督共享其產。此乃保祿宗徒之明訓，致羅馬人書八篇亦聖教會之定論也。不但如是，且於堅振與別件聖事中，加多聖寵。又於聖事外，賜我嘗聖寵之味，進修省之途。此皆聖神愛我，而加我之神恩也。我雖無德無功，獻主臺前。然念主如是我，亦宜效達未聖王向主曰：賜我諸恩，何以酬主。聖咏一百十五篇感謝聖三位之恩，欽崇讚美。祝言

第十八 信靈締結聖二

瞻禮二

定像 想見一熱心信友，敬畫十字聖號。

特求 求主賜我能明識我與聖三所有之誼，益精德業。

第一端 信靈與聖父之誼 凡信靈賴領洗之恩，卽爲天主義子。雖與吾主之爲天主子相異，然吾主於無始際，因本性得之於聖父者，

而人因主超拔之恩，亦得之於聖父，故可並稱爲天主子。保祿宗徒曰：吾儕得爲天主子，稱天主爲父，同享吾主之產。致羅瑪人書八篇蓋如寡人子擢爲王嗣，其所有榮祿，一如王嗣，則寡人子之福祉大矣。然則我於無窮可愛之大父前，有何職分耶？曰：全心愛之於萬有之上，且徵我愛情於行事之間，一凡不快主心之行，俱宜遠避，卽纖微之過，細規之犯，亦宜慎防。二、謹行喜悅主心之事，勤修諸德。三、按各人地位，專務修成，以符主訓。曰：爾當爲全人，如在天聖父爲全美。

瑪竇五篇

第二端 信靈與聖子之誼 凡信者與天主聖子之誼，亦甚奇妙。蓋以本性而論，則與吾主爲昆弟。以聖洗之恩而論，則與吾主如成一身。保祿宗徒曰：爾爲信友，皆成吾主之身，而爲其肢體。致哥林多人

前書十二篇且人因主聖體之恩得與主和合爲一體。主曾曰領予體飲予血伊懷予予懷伊。若望六篇既能與主爲一自能通其生命如聖伯多祿所謂通共其天主性是也。伯多祿後書一篇然則人之榮幸至於與主密締洵無以復加矣。我當砥礪功修遵聖史若望之訓曰吾主何如行人亦宜何如行。前書二篇聖濟彼良曰基利斯當者基利斯督之貳也。求主賜我深明此理更思奮力於修身事主之功。

第三端 信靈與聖神之誼 凡信人因得領洗聖事其靈魂即爲聖神之宮殿。保祿宗徒嘗屢囑當時信友曰予昆爾不知爾爲聖神之堂而聖神居於爾乎。致哥林多人前書六篇故於聖教廣揚之地主教行祝聖聖堂全禮其禮典與人領洗之禮相同。若夫人於聖神宜

行之事。宗徒既言人爲聖神之堂，卽續之曰，故榮爾主，亦懷爾主於爾身靈。同上猶言用此身，爲榮主之具，諸事晶瑩玉潔，整修諸德以飾之，不啻爲祭主之瓊宮琳宇也。問我素行，果何如乎。定志以後，益當潤飾我心，向天主三位，虔祈賜佑。祝言

第十九 聖號提憶聖三 瞻禮三

定像 想見一修德善士，盡其虔恭，作十字聖號。

特求 求主賜我聖寵，俾畫十字時，不失敬於聖三。

第一端 因罷德肋 人作聖號，誦因罷德肋之句，卽記憶自無中造我之天主。此言雖簡，而奧義殊多。蓋造我者，以其全能之工，聖愛之情，特於無中化育我者也。造我肉身，得爲人類。造我靈魂，肖似主像。天神見此人性之尊美，亦驚奇歎羨，而樂爲護守者矣。又造我於世，

能立功行善，以得天上光榮，引我死後上昇，享主永遠無窮之福樂。斯何如大恩歟。修德之靈，誦天主罷德肋聖名，能無動其衷情，而發其熱愛也乎。向主曰，在天我等父者，我等願爾名見聖。願因我虔恭愛慕之誠，爾名見聖於我心靈。務於誦聖名時，不忘此端之旨。

第二端

及費略

誦費略之名

可憶主以己寶血

及無窮之愛

救贖

我

我，而我更宜報其恩愛焉。蓋我困於永死，陷於魔手，除天主外，更無能救贖者。乃吾主因己至純之愛，垂憫吾人，不以金銀珍物，而以己寶血慘死，教贖我出永死之厄，離魔鬼之害。若是者，於天主本性初無損益。而我卽能復得聖寵，受享天主榮福焉。思念及此，知我爲主所贖，卽我爲主所有，而我身不能自主。又知我當爲主而生，爲主而死，服主役，勤主事，修德以效主，救靈以榮主。更知主旣爲我而自作

犧牲，則凡有命於我，雖覺艱辛，絲毫不可違忤也。求主賜我明其理，而行其事，更將立志以勉之。

第三端 及斯彼利多三名者 誦聖神之名，可念天主施恩寵於我，而超拔我爲天主子。施恩寵於我者，卽聖事之功用，如領洗堅振時，以寵恩加於我。又隨時隨地，以其恩光寵照我。賜我聖召，引我前進也。超拔我者，實賜我出類殊恩，得爲天主之子，吾主之弟，而享其天國之產也。細想此意，當不忘我領洗堅振，及聖召中所有之職司，而慎用主之寵光聖佑。又當時時振我心志，端我品詣，而不愧爲天主子也。半遍聖號經中，誦聖三之名，其包含大略之義，有如此。願我誦聖名，作聖號，時懷於心，時咀其味，并獻我志願於聖三。 祝言

耶穌聖心九日敬禮

第二十 敬禮聖心之意義 瞻禮四 敬禮第一日

定像 想見吾主顯露己心曰：汝視此心，如何愛人。

特求 求主賜我聖寵，善行此九日敬功。

第一端 敬禮聖心之歸向 敬禮聖心之歸向有二，一有形，一無形。有形者，卽耶穌血肉之心，結合於天主第二位者，宜用敬天主之敬以敬之，一如天主之宜欽敬焉。無形者，乃耶穌之至愛，而心爲斯愛之官，斯愛之主也。故不論有形與無形，斯敬禮之歸向，乃至仁至聖，至貴至尊，實爲天主，極愛人之慈心。亦實爲吾主人性最尊之一體，與天主性最美之一德也。人性最尊之體，卽耶穌之心。天主性最美之德，卽耶穌之愛。人能身懷口親吾主遺物之一，如寶木茨冠鐵釘等，卽爲深幸。然以之比其聖心，不可同日而語。願我敬禮聖心之虔

誠相符此心之尊貴。而於此九日中，深我殷勤愛慕之情。向主曰：盡甘耶穌聖心，賜我愛爾日深。以後勿忘時誦此經。

第二段 敬禮聖心之緣由 其緣由有在吾主者，有在吾人者。在吾主者有二：一爲耶穌之無窮恩愛。人能常憶主恩，而思酬報於萬一，此敬功之最愜主心，而亦爲主深望於人者。蓋主心原類我心，我有德於人，我固願人不忘我德。吾主於人，旣施無窮恩愛，受無數艱辛。自欲我思念之，以稍慰己心。受難前夕，吾主授宗徒成聖體之權。二次語之曰：爾當行此，以憶我。路加二十二篇二爲耶穌所受之辱。吾主以己至愛，留聖體於世。然自有聖體之恩，卽有侮辱聖恩之痛。茹答負恩之後，繼踵者實繁有徒。異端人褻瀆之，冷心人輕棄之，儔類中多有玩忽之。卽吾主所特寵之人，亦有傷其心，負其愛者。言念及

此、自當動情感泣、思報吾主盡聖盡仁之恩、補我負主負恩之罪、須定志每日誦何經文、行何善功、以敬禮聖心。

第三端 在我敬禮之緣由 敬禮聖心之緣由、在我者有三。一、涵養我內修之功、倍切我事主之誠。二、盡我感恩之職、一如吾主之願。三、望聖心盛加聖寵於我、及我所受託之人。追溯我平日敬禮之功、能無冷淡怠忽之憾乎。今當提振吾志、記憶吾主向真福女瑪加利大之言、曰、汝視此心、如何愛人。奈何仍辜負其恩愛也。又曰、凡敬禮我心、且輔翊人敬禮者、我心將寬廣其量、大施寵愛於其人。求主賜我識聖心之蘊、增益敬禮之功。 祝言

第二十一 聖心之至愛

瞻禮五 耶穌聖體 敬禮第二日

定像 想見聖若望宗徒謂我曰、耶穌愛人若是其甚。

特求 求主賜我明識聖心於聖體中愛人之奇妙、而知還愛。

第一端 耶穌於聖體中爲我竄流之陪伴。耶穌因愛人而情甘受死、亦因愛人而不忍別離。此盡人智慧、極難思擬之端。吾主定聖體聖事、早已解釋之。以此可知此聖事之奇。吾人於聖體中、目雖不見吾主之形、然吾主之性體、實居聖體之內、伴我於竄流之地。并化其身、充夫普世之聖堂、使人人得親炙之、而蒙其恩澤。且日夜在聖龕內、爲憂苦者之安慰、患難者之蔭庇。謂人曰、苦難者、荷任者、俱來邁予、予慰之輕之。瑪竇十一篇噫、愛人若是、豈不奇之又奇乎。乘今日瞻禮、感主心至仁至愛。獻我知恩敬慕之情。愧我屢辭主召、屢慢主寵、忘其聖愛、少拜聖體。痛我冷心懈怠、多拂其意、致傷其心。定志日中、虔誠勤拜聖體。

第二端 耶穌聖體爲我祭主之犧牲 聖心全能之愛，於聖體中寓其第二奇跡，卽在彌撒中，日新其加爾瓦畧山之祭獻。雖借主教神父之手，實自爲獻品，而且爲獻者。故彌撒之祭，與十字之祭，原爲一祭，初無二致。所別者，流血與不流血耳。聖金口若望曰，十字之祭，值幾何，彌撒之祭，亦值幾何。我雖不能如司鐸之行祭，然能與祭，又能輔祭，甚爲利便，甚爲榮幸。問我與斯禮時，如何堅信，如何恭敬，如何熱心。苟初入德門時，謹慎奉行，今不至因循怠忽。自省之餘，能無愧悔。亟宜稱頌主仁，振作我與祭之熱心。

第三端 耶穌聖體爲我神靈之飽飫 吾主於聖體內，更顯其罔極之愛，甘願作我神糧，使能與人合而爲一。奇哉主恩，余靈盍聆吾主之言，而慎思之。曰，爾領而食此，蓋此是我軀體。致哥林多人前書十

一篇又曰，領予體，飲予血，伊懷予，予懷伊。若望六篇從可知其味無窮，能充靈魂之飢渴，能長靈魂之神力。善領者味其道，而沾其恩，則終身用之，有不能盡者矣。我屢受聖體殊恩，而靈魂仍多愆失，昧於神修，不能肖似吾主者，何哉？或於預備之時，或於領主之際，或於謝恩之候，有所歉乎？思維日後，更當如何？求真福瑪加利大，轉祈吾主，賜我愛火數星，報主無窮仁愛。 祝言

第二十二 聖心之潔淨

瞻禮六 敬禮 第三日

定像 想見吾主謂我曰，心淨者乃真福。

特求 求主賜我聖寵，能於濁世之中，常保心清神潔。

第一端 聖心無罪過之濡染 聖心成於聖母無玷淨血，不染絲毫穢德。以常情而論，心爲諸罪所由生，污人實甚。獨吾主之心，至清至

潔、嘗謂其仇曰、爾誰能誣予以罪。若望八篇受難時、主仇雖誣以多罪、而比辣多明知其誑。曾數謂眾曰、我不知其辜。蓋吾主人性既合於天主性、其聖心自不稍蒙不潔。而其德行之光輝、常照耀神聖之目也。瞻仰聖心、反顧我心、相去何啻天壤。蓋我心受造之初、卽污染原罪、又加以自幼至壯所犯過惡。我雖不見其醜、然由天主公義、目中視之、實爲穢濁難堪、斷難免補贖及煉獄之罰。求主重化我心、潔清、而重化誠直之神於吾五內。聖咏五十篇慎防心情之妄動、嚴禦私欲之偏倚。

第二端 聖心無罪過之混淆 聖保祿雖堅定於聖寵、然自認自怨、言有罪惡之思、搖撼其心神。至於吾主之心、雖許邪魔試誘、而此誘皆自外來、毫不能進心動志、擾其神靈之恬靜。卽此恬靜、愈可想其

心境之澄清、心德之美麗。奈我心志之偏、雖幾經戒慎、而終不能久享平和、本性之嗜欲、罪過之牽纏、常誘我於惡、而搖惑我心。惟當時拒敵之、抑制之、爲要耳。古聖若伯曰、僑世如戰卒、攻闢靡息、然而不可敗意。蓋戰愈力、勝愈榮、功愈大也。且主心爲我神戰之礮臺、可堅持以無恐。定志凡遇憂危之際、卽趨赴聖心。

第三端 聖心無罪過之思念 聖母因無染原罪之故、無一不善之念起於心、擾其靈。而聖子耶穌以天主上智之性、爲己心思念慮之主。凡心情之動、或憂或懼、或哀或樂、或拒之、或納之、皆在其把握。他無一念、可擅入其心。吾人則不然、偏私之念、雖非所欲、然不能禁其勿來。卽於神業之中、領主之時、亦難免其縈絆我心。此情此景、殊足令人歎恨。況敢自縱五官、而重速其禍乎。五官中、目最致累於人。聖

經比爲靈魂之窗戶。曰。死亡進自吾窗也。求護守天神。轉祈上主。賜我急需之寵。能在喧囂濁世之中。常得澄心滌慮。翕合主心。祝言

第二十二 望心之謙遜 瞻禮七 敬禮第四日

定像 想見吾主謂我曰。法子。予性良善。心謙遜。

特求 求主賜我聖寵。能識主謙遜之表。法主謙遜之德。

第一端 耶穌心謙 謙遜有心謙與神謙之別。神謙者。認識天主之大。己身之渺。心謙者。心思習慣自忘。行事常求天主光榮。死於己。活於天主。惟天主爲其心之宗。意之向。愛之的。行事之始終。因天主爲一切尊敬光榮之歸向也。觀吾主一生。莫非如是。嘗曰。予弗求予聲榮。若望八篇保祿宗徒一言以蔽吾主之生平。曰。消耗己。而自謙聽命至死。致斐理賓人書二篇。吾主乎。何心謙若是乎。我果有此心謙。

而心思行事，惟務天主之光榮乎。抑隱微之間，求一己之聲譽乎。若未效法吾主之心謙，則不類吾主聖心，何以上慰吾主聖心乎。當懇切求主曰：「仰惟耶穌聖心，至謙至愛，願化我等之心，如爾聖心。」定志於日內，謹持此謙遜之心。

第二段 心謙著於言 真謙藏於心志，亦著於言語。因口所言，出於心所盈也。瑪竇十二篇吾主聖心深於謙，故與人談論間，從無干榮釣譽之言。曾謂如德亞人曰：「予榮空虛。」若望八篇且常言在天聖父光榮美善奇妙等事，使宗徒亦有欣慕聖父之熱情，故受難前夕，謂主曰：「主，允弟視聖父，弟願滿矣。」若望十四篇試向同爾往來者，問爾之爲人。彼將曰：「聞爾言，知爾心。」爾心不圖天主之光榮，惟自誇往日之事迹，平生之才學，指摘他人之過，執於一己之見。如是，則爾之言，

果謙否耶。求主賜我謙抑之心。定志不揚己善。效聖方濟各撒肋爵與若望伯爾各滿之令範。而謙於語言。

第三端 心謙著於行。吾主一生。實爲窘辱之集。謙抑之聚。而其所甘心受之者。一、爲補聖父之光榮。二、爲贖人驕傲之罪過。三、爲訓人謙德之表率。故生於馬槽。隱於下邑。三十載無人知識。三年傳教。備受諸艱。被人誣以誑謬惑人。并指爲負魔者。後釘於二盜中。死於十字架。觀此。豈非主以自卑爲事。自抑爲心哉。我欲修心謙之德。當奉此爲規模。不圖人世之榮譽。但願人不我知。隱藏己善。含忍諸艱。專心切望者。惟天主之光榮。更望天下萬民。亦皆光榮天主。誠能如是。心志自能常享平和。卽受人譴責誣罔。亦可不爲之動矣。向主謙之耶穌。求賜於思言行爲中。克效其謙。 祝言

第二十四 聖心之順命

主日 敬禮第五日

定像 想見吾主示其聖心。謂我曰：我豎聽命之表，爾視以師。特求 求主賜我聖寵，能時效聖心順命之表。

第一端

順聖父之命

順命爲謙遜第一大支。主心因深於謙德，故

常以聖父之意爲己意。曰：父，請勿如子願，惟若爾意。瑪竇二十六篇

又於時時事事，惟致力承行父旨。曰：凡父所悅樂者，予常遵行。若望

八篇卽事有人性所不能堪者，亦不之辭。如於山園苦懇之時，可取

徵焉。且聖心順命之德，最爲美善。因其繇於最善最美之原始，出於

愛慕聖父至切之真情。曰：父欲如是，悉繇於父無測之意。瑪竇十一

篇聖心遺我順命之範如此。問我能時常師法，行事以天主聖意，爲

我意之規格乎。不論有何遭遇，能無尤無怨，以信心愛德處之乎。深

省之餘，自多愧悔。向耶穌聖心曰：「因我罪人順命至死，矜憐我等。定於行事間，不失順命之心。」

第二段 順二親之命 路加聖史以屬下之一語，括吾主三十年之事跡。夫此三十年中，不知吾主作事幾何，出言幾何。然要在聖母及聖若瑟權下，而惟命是從也。噫，以造物之天主，屬於受造之二人，不將謂至尊無對之崇高，有所褻瀆乎？吾主曰：「非也。因斯受造之人，實代天主聖父，故屬其下，順其命，宛如屬聖父，而順聖父命耳。」主嘗言於宗徒曰：「聽爾者聽予。故聽代天主者，卽如聽天主。此之謂有信德之聽命，亦謂有實德之聽命。凡人莫不宜然，而修道者更當用力專務。苟能如此，不但不爲卑賤，且甚爲榮貴。因與天主之心，合而爲一也。問爾之順命，果能如是純一，不顧長上才德，而敏捷果毅，多建功。」

於主前乎。如其未能，速宜愧悔。求主增益信心，賜卓越於順命之德。

第三端 願眾人之命 吾主順聖親之命，與聽惡人之命，事雖殊，而義則一。當被誣時，固守緘默。蓋法氏詐惡非常，然因其位居教首，呼天主名，問以是否爲天主子。主卽直言以告。比辣多原係教外，因其爲地方之總督，故命鞭之釘之，主無一言以拒。及兵役授十字架，則荷之。命伸手，則伸之。洵所謂聽命至死，釘死於十字架也。致斐理賓人書二篇所以然者，爲愛我而爲我立表也。願我以釘死十字架之耶穌，常憶於心。自不怨上司之嚴厲，師長之苛刻矣。亦願以順命至死之耶穌，常置目前。自無有難聽之命，逆命之非矣。謝主順命之表，復我聽命之心。願求主心助佑。 祝言

第二十五 聖心之良善

瞻禮二 敬禮第六日

定像 想見吾主示己聖心。謂我曰：法子，予心良善。

特求 求主賜我聖寵，能明識聖心良善，益深愛慕而效法之。

第一段 良善著於心 人心懿德之中，惟良善最足動人愛戴。故良善人與人交接，人多欣慕依附，每有不忍捨之者。吾主一生溫溫可愛，寬裕和柔。聖經摹寫其良善之性曰：不競不羈，聲不聞於衢，不斷枯葦，不滅殘炷。瑪竇十二篇又紀有隨從吾主，三日忘飲食者，幾四千人。吾主慨然憫之，顯蹟以飽食之。其慈祥待人，洵可想見焉。欲知爾如主心之良善與否，可先觀人心之向背。爾之同人，喜與爾交乎？憂慮之際，樂於就爾乎？抑避爾粗鹵，畏爾梗戾，而爭遠於爾乎？對觀返証之餘，當深悔己之乖忤。祈望耶穌至仁之心，變化我心，如爾聖心。定志以後，力戒暴厲之性情。

第二端 良善著於言 四聖史記主行跡，兼載主良善之言，可謂連篇累牘。若望記曰：予爲善牧，善牧者爲羊失命。瑪竇記曰：嗟予屢召城人，欲覆之，若雞伏子，爾乃執迷擯却。又於荻答率兵捕主時，復記主言曰：友，至此爲何路。加記主將死，爲仇祈赦曰：父，寬宥彼，彼實不識所爲。噫，何主心之仁也。吾主嘗謂口所言，出於心所盈，故被人誣罔，仍溫語以答之。且爲害己者，減輕罪惡，而無一怨恨之言。人聆吾主之心聲，則慈祥之念，自當油然而生矣。乃我不明主訓，聞人指我過失，或稍有猜疑於我，卽怨人無禮，而有悲怒之辭。聽我言語，可知我心尙未良善，不類主心矣。今求良善之主，助我悔之改之。

第三端 良善著於行 吾主良善之行，尤足令我羨慕。而宜師法者，蓋司教明經士等仇恨之，而主不出怨恨之言。眾人謀桀石驅逐之，

而主不爲報復之舉。且交相詬誶者，指爲負魔。主仍善言解辯，和易近人。良善之舉動，不因眾人侮辱，而稍損其分毫。吾人觀若是之善行，而不稍化吾狼戾之習，亦適見吾冥頑不靈而已。夫人與謙和有德者共相交往，卽溫恭自勉，不足謂爲良善之功。惟能含忍污辱，不校橫逆，以德報怨，則合乎吾主之表。此固我當用心從事者也。主曰：良善者乃真福，爲其將有安土。今我揆諸躬行，果良善而無媿於主訓耶。正恐憤懣之氣，尙未盡平，可不力圖自新乎。念聖方濟各撒肋爵爲良善之聖，求其轉達，賜我同效主心之寬仁。祝言

第二十六

聖心之慷慨

瞻禮三

敬禮第七日

定像 想見吾主以聖心示我曰：汝視此心，如何愛人。

特求 求主賜我聖寵，明識聖心器量之洪，愛人之切，而知奮激於

主事。

第一端 聖心慷慨甘願爲人失己聲名 欲知人之慷慨、須觀其人之行迹。故論主心如何慷慨、亦可就其事而驗之。蓋主之於人也、諸苦備嘗、心甘祭獻。不但補聖父所受於人之凌辱、且捨尊貴之體、以救贖普世。人所樂享者真福也、主乃爲人啟天堂之門。人所懼懼者永苦也、主乃代人贖地獄之罰。況令名榮譽、盡人願之、而主乃受誣不辯、受苦不辭。卽衆人指爲煽惑、視之不如惡盜、一概恬然樂受。嗚呼、主心之慷慨、何如是之甚哉。天主未必欲爾全獻爾聲名、如聖人名十字若望者、囹圄冤死、而無一言之白。蓋欲爾抑止恚恨之情、凡被人訾毀、及長上訓責時、皆安心忍受。此類行實、雖非絕詣、然亦爲悅樂主心之德、定可望得主寵錫於身心也。求主寬廣我心、致有機

宜能行本性所難之事。如無係於榮主救靈者，毫不依戀於聲聞。

第二段 聖心慷慨甘願爲人失己安樂。耶穌聖心之聖也，一生無纖芥之罪，以有待於補贖。卽備享人世之安富尊榮，亦不爲逾分。然其畢世苦勞，內外艱辛者，何故？蓋代人贖嗜欲歡娛之罪，平息天主義怒。訓人勤行苛刻之工，以享真樂於無窮也。我爲罪人，宜行補贖。倘無力行大補贖，豈不能日於細微之事，稍行克己乎？當受纖微困乏，又不能默默以忍之乎？事雖渺小，然能謹慎以行，恒久以持，亦爲悅樂主心之一助也。讚謝主心慷慨，思有以報之。

第三端 聖心慷慨甘願爲人失命。按吾主聖訓，人之愛情莫大於爲人捨命，莫甚於自身受死，以免他人之死。吾主愛人最切，爲衆人死，實爲人人死。人皆宜效保祿宗徒向己自謂曰：吾主愛吾，而爲吾

捨己也。問吾主此情此愛，我能常懷於心乎。常動我感激之思，而知克己苦身，以報其萬一乎。抑託故推辭，或蹉跎怠忽，任失修德之機乎。噫，省之省之，何我心之不肖主心也。今當跪伏主前，傾我心情，獻我身靈。 祝言

第二十七

聖心之神火

瞻禮四

敬禮第八日

定像 想見吾主謂予曰，穡事多，行工寡，宜祈穡主遣工收之。特求 求主賜我愛人與救人之熱心，以仿耶穌聖心。

第一端 聖心神火之熱 榮主與救靈之神火，無他，卽愛主之情外溢，欲同類之人事奉主，而享主眞福於無終也。愛德何如深，斯神火何如熱，愛德之量，卽爲神火之量。吾主愛聖父，與愛人之德無窮，亦可知其救靈之火，如何焚熱。嘗云，予來置火於世，予何欲，詎不欲其

燃。又曰、予當流血受洗、方厥事未成、予悵奚似。路加十二篇此極言
己之願欲、甘捨生傾血、以救贖世人也。且廣榮天主、普救人靈、爲諸
聖所急務。因知斯靈、實爲天主所鍾愛者。如達未聖咏諸篇中、其頌
主救靈之願、殊多足徵也。曰稱頌主、義撒厄爾天主於無窮。四十篇
主、予淚湧流、因人忘爾教令。七十七篇天主、予望萬民稱頌主、一切
多眾稱頌主。六十六篇問爾神火如何、榮主救靈之功何在、須時誦
斯類經句、以養我救靈之心。

第二段 聖心神火之量 吾主聖心愛人雖熱、然其救人之行、惟限
於如德亞國、蓋聖父之命也。曰、義撒厄爾亡羊外、予未嘗受遣。瑪竇
十五篇究其愛人之心、包含普天率土、切願萬民信崇真主、以得永
生。故潛居納匝肋三十年、無一日不求聖父。敷教如德亞三年、無日

不爲宗徒化導斯民之備。且欲固彼心志，許彼永與之偕，至天地終窮也。瑪竇二十八篇，吾主於此，蓋訓我者有三：一、救靈之心雖甚切，當受順德範圍，悉如天主之意。卽潛藏一室，不能外試其才，亦無懷憾。二、見人化行業廣，無存忌嫉之思，宜與之同心合意，誠求主名榮顯。三、擴充救靈之志，心懷普世人民，虔誠求主，賜傳教者德化日隆，進教者遵教立功，異教者棄邪歸正。

第三端 聖心神火之驗 經曰：予已被舉離地，將引眾人就予。若望十二篇，魔像傾頽，主名揚於普世，卽婦孺輩秉性柔弱，亦知堅強剛毅，寧死不失其靈。無數修德者，多有勝三仇阻止，棄肉身榮樂，情願肩負苦架，隨從主後。是皆主心愛人之功，神火之效也。我賴主恩，得主聖召，能於救靈之事，效一臂之勞，豈非榮幸。然年長月久，少見成

功者其信德未能活潑愛德未能熾熱乎。趨赴主心諸德之泉源求賜灼熱我心賜我諸德。祝言

第二十八 聖心之慈憫 瞻禮五 敬禮第九日

定像 想見吾主示己聖心謂我曰苦難者荷任者俱來就予予慰之輕之。瑪竇十一篇

特求 求主賜我聖寵使我心彷彿聖心。

第一端 聖心慈憫著於淚 慈憫者心之情易覺他人困苦易施恩惠於人也。耶穌聖心最爲慈憫聖經多可取證。今先於其流淚思之。聖路加記吾主榮進都城之際念此城異日之艱卽望城而哭。十九篇聖若望記辣匝祿死後吾主往弔對墳墓而不禁淚下。十一篇可想主心如何慈善。吾也日見吾主苦像果曾念其苦終慘死情爲之

一動、淚爲之流一滴乎。見無數負心人、日犯重罪、日投地獄、重釘吾主於十字架、或踐踏聖血於泥塗、果曾爲之懷一痛、歎一息乎。今當至少傷心悔恨、痛我平素之寡情、日常之愆失。日中屢誦曰、至聖之心、今仁愛泉、垂憐於我。

第二段 聖心慈憫著於言 聖史記吾主之言、足顯主心慈憫者、幾在在皆是。曰、苦難者、荷任者、俱來就予。見上曰、子望、汝罪今釋。瑪竇九篇曰、京都之女、勿哭予、當哭爾、當哭爾子。路加二十三篇曰、予爲善牧、善牧者爲羊捨命。若望十篇曰、爾僉可體爾父哀憐心。路加六篇曰、吾尙仁、弗尙祭。瑪竇九篇余靈。爾之言語、能顯爾心之慈祥乎。抑談人長短、論人是非、貶責人行事、妄議人心意、殊形爾性之梗戾乎。悔爾言語之非、頌揚主心慈憫、思有以效法之。

第三端 聖心慈憫著於行 吾主一生所爲，無事非其慈憫之效。蓋其心見人神形困厄，未有不動憐愛之情，而加以恩惠者。今於無數聖跡中，可揭其一二，以驗吾主慈憫之行。聖路加記納應城有孀婦，惟生一子，病亡後，母哭之慟。主見不勝悲惻，遂命子復活以還其母。七篇聖瑪爾谷記四千人隨主三日，主謂徒曰：吾憐若衆，恐其枵腹而歸，疲乏道中，乃以七餅數魚充飫之。八篇大抵聖心最爲慈憫，若不望其聖恩之錫，或失望我罪過之赦，或嫌主任爲繁劇，或因心愛而敗興，是皆不識聖心，侮辱聖心也。宜防此類之愆，而常倚恃聖心。晚餐時，聖若望懋於主懷，多得主心慈憫之情。求聖人爲我轉祈，變化我心，如主聖心。 祝言

第二十九 敬聖心於聖體 瞻禮六 聖心瞻禮本日

定像 想見吾主自聖體龕中示己聖心。謂吾曰：子，付爾心於吾。特求 切求吾主以己聖心之火，炙熱我心。

第一端 主心於聖體何爲 一、爲人中保、祈求聖父。蓋人罪動天主義怒，喚天主降罰。而天主宥免人罪者，因主心常在聖體。祈父曰：父，寬宥彼。彼實弗識所爲。路加二十三篇二爲人司祭，日在千萬祭臺上，奉己身靈於聖父。三、爲人慈父母，日以己體血，飽飫人靈。四、爲人師傅，在聖體中，訓人緊要諸德，卽緘默、潔淨、謙遜、輕世、含忍、克己、抑情、熱心、自獻是也。主心愛我，於聖體內所爲者，我已知之。其有欲於我者，我亦知之。然我於聖體臺前，或於領聖體時，反漠然無覺察者，何耶？非因我自愛之私、戀物之情，累我心而不能騰振於主前乎。懇求主心，賜我心盡捐諸物，死於世有，惟生活於天主，而務恆契於主。

心。

第二端 主心於聖體何受 人受主罔極恩愛、卽摩頂放踵以報、豈曰不宜。然主之受於人者、果何如哉。異端人侮辱之、冷心人冒瀆之、更有修德士女、心身已獻於主、尤宜報主恩愛者、乃亦辜恩負愛、傷其聖心。是則吾主與福女瑪加利大所言、最難堪者也。問我素行、果能虔心領主、熱心愛主、與主心心相印乎。抑忘主心於聖體、不思敬拜、而令聖心戚然於我乎。痛悔己非、發我熱愛之心、勉力安慰聖心。

第三端 主心於聖體何求 主所求者、欲我格外熱心、補聖心於聖體中所受之辱、償世人辜恩負德之罪。緣此今日勤拜聖體、熱心與祭、情殷領主、當倍切於尋常。如有聖體降福、當虔誠懇摯、與司鐸同心合意、獻身靈於主、誦補辱之經。我宜竭忠敬慕聖心、其故甚多。聖

心前，多債未償，多過未補，多恩未獲。此外聖教多艱棘，人民多未化。如我稍有愛情於主，若之何不專心奮力，以光榮主心，而安慰之也。福女瑪加利大得主心殊寵，識主心奇奧，求其轉祈聖心，賜我生死與聖心如一，不再辜其無限愛情，不再負其無限恩情。祝言

卷六 附月

月省之思

罪害

見卷二十題

首瞻禮六

聖心之善良

見卷五第二十五題

初一日 人宜日進於德

定像

想見吾主山頭訓眾曰：汝當爲全人，如在天爾父爲全美。

瑪

寶五篇

特求 求主賜我聖寵，俾於德行之途，日有進境。

第一端

人宜進德之緣由

其緣由有三。一曰至要。吾主曰：人當爲

全人，如天主聖父全美，蓋與眾人語之焉。故凡爲主徒者，皆宜日修全德。而修道者，更宜以斯言爲吾主嚴命，以修成爲首務之急。我雖未能盡美盡善，造於純全之德。然亦須日就月將，勤修德業，方可功

底於成。二曰多益。進修於道德之途者，其靈魂於主前，聖功日盛，天堂榮福之資益富。三更易行。不論何地何時，皆可積功累德。況吾所有善機，較人愈多愈便。然德不見修，過不見改者，非因志願不堅，始勤終怠乎。夫業精於勤，荒於嬉，是精進於業者，非勤不得，非恒不可。故我勿再自欺，以致後悔無及。念避靜時得主寵光，所定善志，亟宜奮勇爲之。

第二段 德業進境之證 其證有七。一、每日珍己聖召之恩，時恐遺失。二、前時所犯小過，日漸減少。三、拒敵魔誘，殊覺易便。四、苦刻之工，愈見勤行。五、行神業，愈能謹慎，領主拜主，愈得熱心。六、視世俗愈輕，自愛之心愈淡。七、負十字架，受屈辱，愈得心安志固。余靈試思爾於德業程途，果何如乎。能自慰乎。抑自愧乎。求主加我神力神勇，勿畏

難不進。多默更比曰：汝宜常自警覺勸勉，無論他人如何，汝終毋自忽也。奮力幾何，進德亦幾何，爾其勉之。師主編一卷二十五章

第三端 修業進境之法 其法有三：一、練習於神戰之工。晨起時，即

圖日中增益功德。二、心志常存平和，盡在我之力，無失內靈之樂。惟此神樂，亦進德之一大助也。達未聖王向主曰：主，寬我心，我奔趨主道。聖咏一百十八篇三、保存疇昔之熱心。倘前此之心熱已失，當從

新焚爍。以上諸法，我當善用之。且凡能助我行善者，即日始行。庶得臨終時，有所歡慰，而增倚望。多默更比曰：專求恆主聖意，繼行善功，而至於成全。達未先知云：汝宜恃主而行善，居世而受厥貨材之養。師主編一卷二十五章斯皆切要之訓也。昔顯修聖人安德肋、亞完林發願日進於德，而終身踐之。求其轉達，俾能日進於德。祝言

初二日 耶穌受洗示表

定像 想見耶穌告辭聖母，往若而當河受洗，以興傳教之工。
特求 求主賜我聖寵，能棄絕一切肉身與世俗之牽連。

第一端 耶穌去家 吾主義晦多年，定時已至，遂出而用世，去幽靜而入塵囂。迺違聖母，離別親隣，藉哀矜以度命，日與蠢愚之輩爲伍。夫耶穌之心情，與我同類，以本性論之，不免爲難。然因恪遵聖父之命，心切救靈，而本性之情，不顧焉。我逢相似之境遇，奉天主之旨，受長上之命，宜去此他往，亦當忠誠從事。深信往天主欲我往之處，行天主欲我行之事，必得光榮天主，裨益人靈。修道之人，棄世間萬有，隨從吾主，豈可依戀某人某地，或貪靜室清閒，私用其已獻之心志耶。今復獻我身靈，不辭聖召中所有辛勞。定心善行己職，事事翕合。

主意。

第二端 耶穌受洗 吾主大彰謙德，以興傳道之工。經記耶穌自加理勒亞至若而當，詣若翰，欲受厥洗。若翰阻之曰：「予當受爾洗，乃爾就予。」耶穌曰：「姑容余，吾儕宜如是全諸義。」瑪竇三篇主言宜如是全諸義者，猶言如是行德義之全，以光榮天主。我以至深之謙遜，爾以極全之聽命，補天主所受於人傲慢之侮辱。主蓋示人謙遜爲諸德之根本，如領洗爲諸聖事之入門。亦示人謙遜聽命，可以悅樂主心。而於勤勞作事之中，每能邀主聖寵。人之鮮得蒙主降福者，或行事不遵主訓耳。謝主因其自謙自下，啟我寵榮之路，因其聖洗聖事，開我永福之門。務於行事間，恒存謙遜聽命之心。

第三端 耶穌受揚 經曰：「自謙必受揚。」瑪竇二十三篇，路加十四篇。

又十八篇。斯言已驗於耶穌受洗之時。聖史紀耶穌既受洗，卽出諸水。時天爲之開，天主聖神如鴿降臨，止其上。有聲自天曰：斯乃予愛子，予所喜悅者。瑪竇路加三篇耶穌雜於罪人中，謙下至極，受洗於若翰，然後得此顯揚。而我於天主顯恩，則安然得之矣。聖事之水，甫流於額，爲原罪所閉之天，卽開於我。聖神恩寵，卽降於我。天主卽認我爲己子。斯何如榮幸乎。謝主於聖洗內所賜諸恩。復我領洗時所發之誓。祝言

初三日 耶穌四旬嚴齋

定像 想見耶穌獨居曠野。

特求 求主賜我恒隨聖寵之指引，而日進於功修。

第一端 耶穌往野 耶穌被滿聖神，自若爾當返，被神引赴曠野，居

四旬日。路加四篇吾主人性，固已充盈聖寵。然於諸事常隨聖神指引，絲毫無間。聖神欲其何往，卽往。聖神欲其何爲，卽爲。非謙順之至乎。維此聖神，提我於紛囂濁世，引我於清修之曠野。以其聖寵滋潤，發生我德，欲我日臻完善。我苟時隨聖神指引，志毅力行，善承主寵，必多進境，而安慰聖神矣。事雖失於既往，猶可復於將來。當堅志奮修，安心靜默。蓋天主之聲，不聞於喧鬧之地。經曰：予將引忠靈於靜獨，而談於其心。阿塞二篇須發知恩愧悔之情。求主賜我時隨聖寵。保祿宗徒謂羅瑪人曰：人受天主聖神指引，斯爲天主之子。八篇宜細味此言。

第二端 耶穌齋禱 聖神攜引吾主，蓋欲吾主隔離人世，而入荒野，四十日無復往來，與雜獸同居。瑪爾谷一篇風餐露宿，晝夜誦禱。泣

世人之罪，憫其受罰無窮。求聖父之慈，賜其改遷有日。故吾主既經領洗，卽行補贖，整備己身，以興傳教之工。我於此可得二訓：一、聖教起初，奉教者以領洗聖事爲致命之資。我今當以此聖事爲補贖之勸。因聖教於忒理騰大公會議曰：奉教者之生命，須爲永常悔改補贖之命。十四支九章二。我於救人之事，若欲得其神效，必當靜默苦刻祈禱，以預備。自省我身，與吾主有何同異。求主賜我恒隨主表，受教於聖神。定志避囂愛靜，心神契主。

第三端 耶穌被誘 耶穌被神攜赴曠野，欲受魔試誘。瑪竇四篇吾主無惡無過，其欲被魔誘，受彼欺弄者，正所以勉示吾人，知誘惑非必爲害，適可以涵養人謙。警人醒寤，倍顯熱心神勇，而爲增功德，悅天主之時也。且誘惑之來，不由人一己之願欲，與德行之淺深，處境

之囂靜故誘惑雖多，未即可亂我心。聖額我略曰：馨液不動，則不噴其馨。不焚，則不發其香。然則善人不動以誘，不燒以苦，其德馨何由發乎？思於此，當欣喜奮振，深恃主之情。保祿宗徒曰：忠信之天主，不許魔惑勝爾之力，惟欲爾獲益，以得有恒。致哥林多人前書十篇向嚴齋苦刻，悲懇祈禱之耶穌，賜我善承魔誘。祝言

初四日 耶穌三被魔誘

定像 想見魔幻人形，持石誘主。

特求 求主賜我聖寵，明識魔計而避之。

第一端 誘以饕嗜 邪魔最爲狡猾，每探人身靈之情景，而後誘其怠善就惡。見主四旬嚴齋，知其枵腹，乃假人形狀，持碎石數塊，謂主曰：倘爾爲天主子，可命此石變爲餅。瑪竇四篇此誘主饕嗜，欲主顯

跡、先乎聖父預定之時而食也。主以古經語却之曰、人生非獨繫於飲食、惟繫於天主口攸發諸命。申命經八篇倘我有貪饕之誘、或欲失節而食、或求佳肴而食、當自奮曰、人生非獨繫於飲食、惟倚天主、可存靈魂、肉身之命。靈魂宜患不豐、至於肉身、則備其急需可耳。諺曰、病從口入。經曰、腹果致染疾病。辨德經三十七篇誠恐身病而更多靈病也。求主賜我不忘此訓、自制飲食之度、慎勿違之。

第二端 誘以榮譽 仇魔與主一戰而敗、狡譎心深、復以榮譽惑主。卽携置聖府殿頂、曰、爾倘爲天主子、可蹈空自下。經云、伊命己天神手捧扶爾、使脚勿踏石上。瑪竇四篇蓋欲主行異跡、以逞其榮譽之誘也。吾主退之曰、經亦記云、勿妄試天主。同上又申命經六篇此訓人幸而一次勝魔、不宜放心、必勤備後患。誠以魔之爲敵、其鎗擲此

而悞。又擲彼以望中。非再四防閑。莫避其害。或乘爾得勝之機。謀使顛蹶。如爾既克鑒情。誘爾自滿。傲慢他人。或借爲善之名。引爾行惡。如動爾忿怒。以爲神火之熱。誘爾偷閑。以爲好生之德。竦爾妄爲。以爲銳志立功。今宜定志。凡遇此種誘惑。迅速驅之。

第三端 誘以尊位 魔又携主至高山絕巔。令視四方諸國。暨厥榮光。曰。此皆我將與爾。第屈躬伏地奉我。耶穌曰。娑彈去。經云。可奉可事。惟爾主天主。魔遂退。天神進而供具。瑪竇四篇此可見邪魔變詐。以世間尊富。動人驕傲利欲之心。而我能弗力行克制乎。且人既能剛強禦敵。主卽遣天神增益神力神味。而我能弗忠勤奮勉乎。向供具之天神。求其佑我勝魔。 祝言

初五日 人生難免誘惑

定像 想見聖若伯在艱難憂患中曰。僑世如陣卒。攻鬪靡息。若伯

七篇

特求 求主賜我聖寵。能忠於主事。常勝諸誘。

第一端 誘惑之由 人生斯世。皆染原罪。自不能無誘惑。人性藏誘惑之資。如大地蓄野草之種。推其由來。首因原罪貽害靈軀。性質有偏私之病。又因惡魔自己無望於天。不能絲毫害主。乃移恨世人。阻人上升。多方引掖。以陷於罪。兼以濁世頹風。見見聞聞。無非濡染人心。從惡之助也。故人不必要誘惑太多。惟宜思患預防。勿以年高力弱。外誘全無。勿以久進修途。攻誘甚密。亦勿以誘惑之來。悉委諸魔。致貪閒自適。放縱偏私。失守五官。自罹罪網。否則審判之時。始悔自欺。不亦晚耶。求主寵照。賜我神目克明。省察時。細思誘惑之由。而息

滅之。

第二端 拒誘之法 寤禱，免陷於誘惑。瑪竇二十六篇據吾主親訓，醒寤與祈禱，爲制誘要訣。蓋醒寤者，所以防誘惑之機。時當靜歛己心，內靈一有舉動，卽能覺察。凡誘惑萌時，務使根株盡絕，源流悉斷。雖宜謹守五官，尤須慎於視聽。誠以耳目爲窻戶，實死亡之所自來也。日勒米亞九篇至於祈禱者，晨興默想，既有善心，又求聖寵，以能立功免罪，制勝三仇。禱以心謙，禱以倚望，禱以熱心愛主，更禱於被誘時，稱呼耶穌聖母聖名。如是，而不勝誘惑者，吾不信也。問我於斯行之何如。求主寵佑，免我於顛仆之危。定志善用其法。

第三端 誘惑之益 人性甚傲，且甚弱。貪世利，忘天福，種種偏私，不勝悉數。然知爲魔誘，而力行攻退。斯傲者謙，弱者強矣。如是勤行祈

禱、虔誠恃主，不敢自恃，斯傲者謙矣。是誘惑之來，不但無害於我，正所以有益於我。譬如頑鐵，易銹易壞。磨之淬之，則光明精銳矣。又如止水，易污易臭，多生蟲蛭。激之導之，則滋枯潤物矣。天神辣法厄爾謂多俾亞曰：因爾悅樂主心，必須誘惑試爾。十二篇故人不可以被誘而憂，亦不可以多誘而虞。失愛於主，惟當剛毅我心，振奮我志。凡遇誘惑，務思戰勝。昔安當隱修，被誘最多，最久，亦最烈，大助其成聖之資。求主因其功德，勉我步趨。祝言

初六日 若翰顯證耶穌

定像 想見聖若翰手指耶穌，訓誨民眾。

特求 求主賜我忘卻己身，凡事惟求天主光榮。

第一端 若翰示主於眾 聖若翰被人忌嫉，時多艱窘。耶穌出自曠

野前往慰問。若翰見之，卽謂環立人衆曰：「斯乃予攸言，來予後者尊於予。蓋實在予先，予猶罔敢釋厥綦。」予見聖神借鴿形，自天降止其上。斯將以聖神洗人，予已見而證其爲天主子。彼須尊大，而予卑微。若望一篇又三篇聖人言如此，實爲後世楷模。蓋知人功隆德懋，爲人敬服，而能自卑自下，不恃己榮，惟求人認主榮主，則心有真謙，天主亦樂與之交，而多賚以聖寵。今我好干榮譽，詆毀是非，惟欲矜張己善，而猶憾主寵不增，不亦愚乎？求主賜我心謙，定志於談論間，罔談彼短，靡恃己長。

第二段 若翰稱主羔羊 若翰見耶穌就己，乃曰：「斯卽除免世界罪天主羔羊。」若望一篇吾主爲除免世界罪天主羔羊者，因其獨爲真實犧牲，足以祭獻天主，盡補主榮，盡償人罪。且其赦人過惡，待人改遷，被

人釘死，仍求聖父赦仇，一如羔羊之良善也。我當以此天主羔羊爲法，語言和順，行事溫柔，謹修仁良，含忍諸德，以求榮主救靈。雖年未老邁，效羔羊而爲主捨生，亦不辭惜。向主曰：爾爲愛我而死，我亦願爲愛爾而捨命。凡遇觸我怨怒，斷不形於聲色，而著我溫良。

第三端 若翰爲主集徒 聖若翰始以聖德，繼以教道，招集誠實樂道之人，爲己徒屬。每見耶穌，必稱其善，頌其德。令徒等識耶穌尊美，願徒等離己而從之，不思眾徒榮己。蓋聖人神火真熱，惟求光榮天主，普救人靈。故顯揚耶穌，而爲之誘掖徒眾也。然神火之真偽，大有不同。真者不憂己名爲人聲譽所掩，視人建功立業，揚主聖名，而中心喜悅。僞者隱忌他人所爲之善，見人聲聞事業，有過於己者，心懷悲怨，或微言諛語，時肆譏評。今我思及於此，撫躬自問。凡榮顯主名，

助人信從天主，果能如聖若翰之懇摯乎。欽其謙下榮主之德，求其轉達耶穌，賜我愛主熱誠。祝言

初七日 耶穌初召門徒

定像 想見吾主語斐理伯曰：從子。特求 求主賜我常爲其忠信之徒。

第一端 召四門徒 初，耶穌一人敷教，四閱月後，始召門徒，皆聖若翰之門弟子。經紀若翰與二徒偕，見耶穌行過，曰：斯乃天主羔羊。二徒聞言，遂從耶穌。二徒一爲安德肋，遇厥仲西滿，曰：吾幸已見默西亞，乃引見耶穌。耶穌目之曰：爾乃若納子西滿，厥後宜稱伯多祿。越日，耶穌往加里勒亞，遇斐理伯，謂之曰：從子。若望一篇安德肋若望伯多祿斐理伯四人，幸承殊福，蒙主特選爲其首徒。事非出於偶然。

實係天主預定。回溯主始召我時，似爲肇端於無因之事。然以信德之光，詳細觀之，則知天主殊恩特愛，簡拔我於眾人中也。宜深謙卑之意，發感恩之情，勉符主召之旨，證我忠心。

第二端 門徒地位 伯多祿等特承聖召，親炙吾主，其福寵不可量

矣。雖皆良善勤樸，而出身卑微，捕魚爲業，無才無學，名望不崇。然天主子首選是人者，自有故焉。一、喚醒世迷，勿以眼前榮富，視爲尊崇。二、陟舉貧人，因貧而樸素溫良者，主所喜也。三、免徒驕傲，勿以宗徒位高，私心自大。四、顯示世人，知聖教會基於如是愚弱之徒，決非人力所能爲。此係保祿宗徒遺訓。致哥林多人前書一篇倘爾能明此理，自不宜羞出身之低微，亦不可矜家資之豐裕。斯二者，或此或彼，皆不悅於主，亦不取於人也。天主於選拔敷教人士之中，其上智多

形奇異。我當讚美頌揚之。不論素位之貧富尊卑。惟思謙抑。日得親愛於主。

第三端 召徒之式 吾主召徒。非皆一式。亦非皆一呼。而卽離親捐業以從。觀伯多祿與安德肋。其始偕主暫居。欲知吾主之爲人。及其度生之景況。是初得聖召。而有意求道精修也。旣而締交吾主。朝夕親炙從遊。未卽謝別親族。是其初學之時也。末後聖召之恩益固。認主益明。愛主益切。乃決意捐離萬有。永獻身靈。以事奉吾主焉。追念我聖召之始終。實與主徒相似。卽一千九百年來。凡修會典律。長上收受新進規模。仍不異吾主所爲。我思及此。更當珍重聖召之恩。倍我熱心。副主厚意。感謝耶穌爲我聖召恩主。 祝言

初八日 納大陀爾見主

定像 想見吾主與納大陀爾相談

特求 求主賜我樸誠忠直，如主所譽於納大陀爾者。

第一端 納大陀爾之成見

斐理伯既識耶穌，卽以告己友納大陀

爾。大抵謂卽巴爾多祿茂。語之曰：經內梅瑟及諸先知預言救世者，

吾幸已得見，卽若瑟子耶穌。納匝勒人也。若望一篇斐理伯欲其與

分於己受之福，引之認識吾主，得與吾主交遊。奈彼執於成見，幾致

失此殊福。答曰：自納匝勒，豈能出美物。同上自來人心頑癩，不信吾

主，違忤聖教者，多矣。卽已爲教友者，聞人謂某司鐸足以指引爾靈，

乃意以爲素不交善，或以爲某神師殊形煩瑣，不知就正以求教導。

是因其拘執之見，而自失神靈福寵矣。求主能遵保祿宗徒之訓曰：

物可博覽，人可廣交，惟取善者而行之。致得撒洛尼前書五篇

第二端 納大阨爾之樸誠 納大阨爾之言、既辱納匝勒人、且深辱吾主。然吾主見其存心非惡、意求真實、不惟不加呵責、反譽其樸誠。謂之曰、斯真義撒阨爾子、無偽詐者。若望一篇納大阨爾自吾主之口、得此美譽、可謂榮矣。然修德者、能心存忠直、樸誠事主、求悅主心、翕合主旨而外、別無他願。亦何患不與分其恩寵也。如其不務貞純之德、惟慕虛幻之名、則心志已浮、衷情已偽、將愛主貶責之不暇、而何榮寵之有。於斯二者、吾固何似。當撫躬猛省、切勿自誤自欺、致驕傲自愛之翳、蒙我心目、而暗於責己。又求主賜我不行詐偽、行事間、每復我正誠之意、隱微內、時防心志之偏。

第三端 納大阨爾認主 納大阨爾與主素未識面、今因吾主一語、畢寫其性情、乃蹴然問曰、奚從知我。耶穌曰、斐理伯未招爾、爾在無

花果樹下，予已先見爾。若望一篇納大匝爾聞言，神目豁然，識主能知遠微隱，必非常人。乃呼曰：師，爾實天主子，義撒匝爾王。同上今我宜效法納大匝爾，誠心實意，謁見吾主，聆主神訓，且身既幸得認主，又願普世人咸能信主。則天主將倍我神光，增我聖寵矣。經曰：主喜與樸素者言談。喻經三篇又曰：於心直之人，主何善歟。聖咏七十二篇不可引以爲證乎？念我護守天神，心意最誠，諸事悉遵主意，求其默助。祝言

初九日 耶穌赴筵示異

定像 想見耶穌與聖母，皆在筵席。

特求 求主變化我心，顯其聖寵之異跡於我身。

第一端 母子赴宴 納大匝爾見主後三日，近納匝勒，在加納地有

婚宴、耶穌母與厥席。耶穌偕門徒、併見請而赴。若望二篇或問吾主何不登顯者之堂、而赴貧人之宴。解經者略舉三故。一、緣新婚者、概謂卽主宗弟西滿、後列於十二宗徒。吾主赴宴、所以敦親親之誼。二、凡寒素之家、卑微之人、苟能修飾以德、亦爲天主珍視。三、因夫婦之倫、係天主世初建定、且主將定婚配爲聖事。故訓人雖離親棄族、事苟無傷於救靈敬主、無礙於本分規條、時亦可盡友愛親族之情。況勢不分高下、位不分貴賤、無一可藐視。而我於待人接物、所當重者不在位之尊、要在德之厚也。可賀加納人有耶穌與聖母爲嘉賓。求主賜我行事間、存信愛之心、常如在吾主與聖母目前。

第二段 聖母殷勤 酒旣罄、耶穌母語伊酒罄。同上卽此一事、可想聖母誠心倚主、仁心待人。蓋見設宴者、醴酒無多、恐壺傾盃盡、難乎

爲情。故自就主前，告以酒罄。主曰：女人，予與汝何與？予時尙未至。言雖似乎嚴厲，而聖母仍語僕曰：從伊命，可悉行。耶穌稱聖母女者，示其將行聖跡，獨係天主之能，不涉子母之情，又當時人稱女人二字，非若今人有輕賤之意也。天主旣欲人因聖母而得恩寵，則聖母在主前，可謂聖子之全能，在其掌握，而無有不能。卽逾格之恩，亦可望其轉祈而獲。以是，吾人倚賴聖母之心，應益無涯涘矣。然勿忘其訓曰：從伊命。凡師長傳於爾者，可悉行，如侍僕之瞽然順命也。我因聖母轉求，得多恩惠，至今未曾知覺，尙其感謝，而思有以報之。

第三端 變水爲酒 耶穌雖語聖母，時尙未至。然因聖母之請，卽先時而行奇跡。乃語僕滿貯罈水，罈凡六，各容三兩肩，變水爲酒，以飲在席諸人。若望二篇耶穌於席間，所顯之聖跡，今隨時行之於彌撒。

中、變酒爲己血、變餅爲己體。令司祭偕與祭者、飲之食之、得永生不死。且其式更奇、其恩更盛。我當如何知恩、感愛、熱心、謹備、以赴主聖筵、得善領聖體乎。且因領主聖體、而同領其聖血也。問我領主先後之情何若。欽拜吾主爲元行之主、亦爲我五衷之主。求其變我冰石之心、爲熱愛之心。祝言

初十日 耶穌別母招徒

定像 想見耶穌謂我曰、從予。

特求 求主賜我熱心、能日進於事主之途。

第一端 耶穌別母 耶穌既去加納地、後偕聖母及厥昆季、本爲堂兄弟又係表兄弟暨門弟往加法爾納翁、小留數日。若望二篇吾主與聖母同居三十年、今將離別、是與親戚長別之日也。蓋吾主爲聖

父所遣，欲行聖父之事，故不得不毅然別母，去此他往。夫修德之人，雖爲光榮天主，拯救人靈，而跋涉風塵，行踪靡定。然千萬人中，間有一二，或不欲離鄉井而越關山，或不忍捨親戚而離故友。是則俗情牽絆，不承行大父母之命者矣。惟宜以吾主別母爲法，凡奉長命何往，卽往。務以榮主救靈爲歸，不致延誤。更宜求主滌淨我心，使我不戀世有。斯身靈既獻於主，賴主蔭庇，亦安見世上有畏途哉。

第二端 召安德肋、伯多祿 吾主捐棄世間萬有，斷絕本性牽連。身既立表於先，召門徒從之於後。欲彼同行聖父所託之大事，且繼述自身所創之洪業。據聖瑪竇紀，耶穌遊加理勒亞海濱，視西滿及安德肋昆仲二人，張罟於海。語之曰：從子，予使漁人。彼卽棄網而從。四篇夫捐離世間萬有，及諸能有之望，朝夕隨從吾主，樂貧甘苦，殊覺

相反本性之情。而二徒一聞主言，若草從風。蓋吾主聖表動彼心，聖寵感彼情也。我欲人修功進善，勸之以言，不如勸之以行。路加聖史紀主言曰：倘人勿棄世有，弗荷十字架而從予，弗克爲吾徒。十四篇求主賜我不忘此訓，知時時加勉，務以善表動人。

第三端 召雅各伯若望 復前行，見雅各伯則伯德阿子，及其弟若望，偕父居艇修網。主召之同從。彼卽捐網謝父而從。瑪竇四篇 瑪爾谷一篇雅各伯若望二人，一聞主命，卽毫無疑慮，應聲而起。其父見子應主召，亦絕不爲難。父子兄弟交相順命，善用主恩。嗚呼，此同列宗徒之福寵，皆因慷慨從主一念所由來也。今我幸承主召矣，亦受主無數恩佑矣。然至今猶不能善用主寵，日進修途，非我因循自棄，不知景仰前型之故耶。向四位宗徒，求彼轉達，賜我能師其表。祝

言。

耶穌傳教之初年 吾主在外傳教，共三年零有數月，此云傳教初年者，以耶穌別母後之巴斯卦瞻禮，至次年巴斯卦瞻禮，爲三年中之初年，至第四年巴斯卦瞻禮，適滿三年之數，而耶穌遂受難。

十一日 初淨都城聖殿

定像 想見吾主取繩爲鞭，自堂驅逐人眾。

特求 求主熱我神火，切心求主光榮。

第一端 耶穌神火之熱 如德亞巴斯卦已過，耶穌上日路撒稜。此一往也，不比常人赴堂瞻禮，實爲聖殿重振規模。且公然顯己權能，俾人易於知識。經紀主見殿內貿易牛羊鴿，暨兌錢者列坐，遂束繩爲鞭，逐諸人於殿，及厥牛羊，傾兌錢者金，倒厥案。若望二篇蓋時

人重利、上下交征、積習既深、恬不爲怪。吾主痛惡其弊、思欲革除。故震斯赫怒、在堂驅逐。然其動怒之時、心志和平如舊、可見怒之情與怒之用、不但可以無罪、且有時爲德行之功、修成之助。如欲屬下之人、識己罪惡深重、而痛改之。或因己身多獲愆尤、心神疲憊、而思振作之。皆係應動義怒時也。自吾主手中、取其鞭策、逐諸罪過於我心。求主賜我於喜怒好惡之間、恒能中節。慎無以偏情怒火、誤爲神情愛火焉。

第二端 耶穌神火之智 謂販鴿者曰、去斯物於茲。同上夫此販鴿者、固與兌錢貿易之徒、同在殿中、而主於驅逐之時、一似威怒稍霽。何者、以其貧困、甚於他人、知識不及他人、故過惡亦輕於他人也。况小民藉此謀生、若吾主待以一例嚴威、恐誤其餬口之資、而聖心有

所不忍耳。是以令其移去。勿許在堂貿易。可見雖爲正大之事。動怒亦當以智愛諸德相濟。否則傷情拂性。卽至怒髮衝冠。不徒無益。而爲害實多。今宜思主令儀溫威並濟。可敬可親。求賜我師法主表。留心於動情之始。無致發不中節。

第三端 耶穌神火之義 吾主欲如德亞人知己震怒之義。謂之曰。勿以吾父居。爲市肆。同上時人以牛羊鶉鴿。係祭主急需之物。故在殿中營販。而吾主尙怒其褻聖。嚴加斥責。今之聖堂。較日路撒稜大殿。尊貴何啻萬倍。人乃種種輕慢凌辱。亦何以逃主威。而避主罰乎。修德者。固宜內外虔恭。以補人犯主聖威之過。第捫心自問。凡在聖殿中。能盡誠盡禮乎。毫無怠忽。步履視聽。謹慎威儀乎。想諸天神於天主座前。如何端肅。自後常與之虔誠誦禱。 祝言

十二日 倪閣德睦問道

定像 想見倪閣德睦老宿名宦夜訪耶穌虛心問道。
特求 求主賜我愛欲之勇常準於知識之明。

第一端 倪閣德睦之怯弱 倪閣德睦如德亞之顯宦也。自吾主顯
超性之能，在殿中驅逐貿易諸人後，聞主異跡，思耶穌爲天主所遣，
分當謁見，以聆清訓。雖當時忌嫉吾主者衆，而彼之卓識，毅然認主，
紆尊降貴，虛心諮訪，不可謂非庸中矯矯者也。然經曰：夜造耶穌。若
望二三篇蓋其心雖堅強，志雖謙抑，但恐民間長老知之，情面多有
未便。此其怯弱之心，殆猶未豁然融化焉。吾人勇果自期，拋棄世間
名利，亦云美矣。而爲善無恒，多虧本分，被情面所累，致淡熱心。是何
異倪閣德睦之堅強認主，猶不能破除情面乎。今當自慚劣弱，求主

恩佑，使我明其原起，以勉奮興。

第二端 倪閣德睦之昏闇 倪閣德睦達人也，其心光固遠勝當時

之臣僚民庶。乃造耶穌曰：師，予識天主命爾降世，用爲世師。孰克行

師攸行，而天主弗與偕焉。若望三篇主曰：爾爲國師，尙懵茲理。同上

蓋深惜其猶有障蔽，而不識吾主爲古經預記之默西亞也。我於修

德之尊，知之已久。修德之訓，聞之已熟。卽克己遏欲之要，亦心領神

會，而欣欣羨慕矣。第恐爲人師長，訓人力行後，自身欲踐避靜時所

定善志，則凡抑己偏私，肅己視聽，忍辱耐勞諸德，反覺多未盡善盡

美。豈當局者迷耶。抑能慎思而不能篤行耶。自問心身，更當愧慚謙

下。求主賜我寵光，定心於神靈昏昧時，不移前志。深研天主之奧義，

務使知之透徹，行之精專。

第三端

倪閣德睦之疵瑕

倪閣德睦與主談道後。心志迥異從前。

誠心信主。熱心慕主。固爲主忠善之徒矣。然未負笈從遊。與諸宗徒朝夕親炙吾主。研求精進。此其疵瑕也。迨日後吾主受難釘死。始顯其忠勇。毅然赴比辣多。請主聖軀。爲之厚葬。以顯示其忠。丕揚主榮。蓋能始失終得。力掩前非。不使小疵以累大德。今我事主有善心。而不敢著於外者。亦多矣。然果有何功何德。能證爲吾主忠徒乎。夫倪閣德睦以葬吾主之勇。補未從吾主之失。卒致德臻聖域。八月初三日爲其瞻禮倘我能做其令範。不稍敗意。亦何患不蒙主無窮寵錫哉。求其轉達。向耶穌恪恭祈禱。祝言

十三日

若翰門徒妬主

定像 想見若翰門徒怨氣未平。聖人善言開導。

特求 求主賜我遺忘自己、誠求天主光榮。

第一端 門徒嫉妬

耶穌在日路撒稜講教顯跡後、與門徒往如德

亞境、偕居彼授洗。

若望三篇吾主名譽日彰、事功日盛。若翰門徒遂

心生嫉妬、造若翰、戚然曰：師、前日偕爾在若爾當外、爾所標證者、斯

人今授洗、而眾僉往就。同上蓋徒等意欲榮顯若翰、故見吾主聖化

日隆、未免中心憤懣。是則向善修德者、猶被妬魔所誘、借顯師之美

意、以洩恚忿之氣焉。我今見異於己者、或後進於己者、其事功過我、

聲聞勝我、我能絲毫無憾、妬念全消乎。自知愛德未純、求主賜勿再

犯。遇妬魔來誘時、以聖保祿之言、退之曰：無論何如、惟能顯揚基利

斯督。是我喜於始、而悅於終。致斐理賓人書一篇

第二端

若翰忘己

門徒意若翰聞言憤恨。豈知聖人心德、不思己

利惟求主榮。且稱揚我主，謙抑己身。謂之曰：予向言，予非基利斯督，惟受使其前。其自人格者在眾人上，予聞其音，悅樂滿盈。若望三篇若翰不求利己，固爲世人所難。然世人所難者，而聖人有之，已足動人驚奇。則凡修道人所當有而不有，不更令人駭異耶。今我默爲研究，果能實心稱頌才德過我之人乎。吾恐惟知自利，依戀於一己之聞譽多矣。求主賜我不迷於自愛之偏，無戀於一己之榮。日中每向主曰：尊敬光榮，歸於惟一天主。致弟莫德前書一篇

第三端 若翰抑己 彼須日長，而予日微。若望三篇若翰此言，謂耶穌之從者須日衆，其榮益顯。從我之徒，當離我就彼，而日顯予微。可見聖人心中，不徒忘己而求主榮，且能克勝己情，切願主榮愈盛，而已譽日衰也。故我欲治竊慕虛榮，妒忌人善之病，當效法若翰黜伏

傲心、克制己欲。樂人遺忘我，而藐視我，不啻爲眾人之末，罪人之首。庶幾步武聖人芳躅，愈顯天主光榮矣。求主賜我寵佑，明識妬病之惡，爲害甚大，而永絕其根株，不復滋蔓。祈聖若翰轉達。 祝言

十四日 傲爲諸罪之宗

定像 想見路濟弗爾自天隕獄。

特求 求主賜我心存畏懼，免染驕傲之病。

第一端 驕傲之性 經曰：驕傲爲諸罪之宗。辨德經十五篇又古聖

多俾亞訓己子曰：兒，無許驕傲入爾心，緣諸凡禍害，悉肇於斯。 四篇

蓋驕傲一入人心，則其性必自以爲尊美，無關天主之功。辱眾沽名，執拗矯飾，且指使他人輕視長上，凌虐屬下，以至幸災樂禍，種種損傷愛德之病，從此習與性成。即使明師益友，相與抑制，仍私心自滿，

顧盼自雄，而罔知悔改矣。嗚呼，彼亦知謙遜者爲主寵錫，而竟任性自縱若是乎。今我宜深愧悔，思何以芟除傲根，痛改志高氣揚之惡習，庶幾善矣。

第二段 驕傲之惡 天主爲萬物衆善之原，衆美之本。故保祿宗徒曰：尊敬光榮，歸於惟一天主。致弟莫德前書一篇又聖奧斯定向主曰：不求爾榮，而惟求己榮者，乃爲盜賊。審是，則驕傲者竊天主所賜諸恩，以爲己有，欲人尊己，其惡尙可言哉。伯多祿宗徒曰：主拒驕滿者。前書五篇蓋如古之帝王法鍊盜，納步各安弟哥等，悉因驕傲，受天主嚴罰。倘人檢點心身，不知加意痛改，將見天主革其寵照，任其昏蒙，愈流愈下，豈不大可憫哉。昔達未聖王與厄塞加，一矜庶民之多，一誇宮庭之富，遂被天主譴罰。則我安敢稍不防閑，致蹈覆轍耶。

綜觀往史，有才學者，往往爲驕傲受禍，卒陷於叛逆荒淫諸罪。求主賜我永勿罹此凶惡，而時深我謙下之心。

第三端 驕傲之害 傲人之思言行動，往往自以爲得意。然害及心身，誠非淺鮮。主謂法利塞無天福之酬，以其志在矜張。瑪竇六篇則驕傲之人，凡誦經齋素，施捨哀矜，悉歸無益，此一害也。本欲求人榮譽，反被人輕賤，受人侮辱，經曰：驕傲憎於天主，惡於人。辨德經十篇此二害也。傲入於心，神目遂昏，意緒無寧。正平之氣自亡，憂懼之情時擾，防人訾毀，畏人疑議。且外似行善，緣意向虛榮，則受賞之功，悉爲受罰之由，此三害也。我今既知驕傲之害，當加倍留心，格外用力，拔除受害根芽，慎勿再傷德業，致身靈受無窮之累也。求護守天神，助我拒勝傲魔，效法耶穌至謙之聖心。祝言

十五日 謙遜之性謙遜之要

定像 想見聖伯多祿訓人曰主寵錫謙遜者。前書五篇

特求 求主賜我聖寵能識明謙德之要而專務勤修。

第一端 謙遜之性 謙爲諸德之基而其性情實與忍德相表裏。蓋能謙則能忍。既自識卑微喜人輕賤必受苦不生怨怒受辱以爲己招。且能忍受魔攻。削除妬忌紛爭諸病。今爾於意念之間非不知謙遜爲美德。然隱欲人稱爾謙德。故語言行事雖有時拊躬責己。要非出於求悅天主之本心。又或聞人稱譽。卽外貌不敢自居。私心未免歡悅。聞有當前戒飭。面目雖勉爲退讓。心中乃敢怒而不敢言。是則情性本未能謙。惟掩飾彌縫以示謙。究難比存誠去僞之謙德也。夫人能視己穢同塵土。甘居人下。知天主爲眾善眾美之源。惟願尊榮

天主。則其謙必積中而發外，不假修飾。祇倚上主修其真謙，不欲他人以能謙稱之。此乃培養心靈，真實之謙，而謙德自純矣。求主增我神力，助我修此真謙，而時以此爲私省之目。

第二端 謙遜之要 謙與信二德，並行而不相悖，人無信德，不能悅主心。人無謙德，亦不能受主寵。蓋不謙則自尊自美，偷主尊榮，天主必不降福於其躬行。是卽爲己爲人，悉歸無用。經曰：主寵錫謙遜者。伯多祿前書五篇人苟撝謙自守，天主賞以福寵愈多。斯德愈醇，功愈懋，而其救人淑世之事，亦能持守至終。主曰：弗變爾爲若孩，天國靡入。吾主此言，適在諸徒求尊爭長之際。其意欲徒等如孩童之謙樸卑小，而後得入天國之門也。主又曰：法予，予乃良善，心謙，將得爾神之康甯。瑪竇十一篇可知吾主常望人效己謙遜，效之則有德，有

德乃有寵、有寵乃有功、此一以貫之之理。是謙德爲修成之最切要者、人可不留意哉。但欲修謙德、務克偏私、常居退讓、固爲本性所難。倘時以吾主之生於貧賤、居於卑陋、死於苦難、及凡一切善表、潛心勉勵、修之既久、持之既力、養之既純、則聖寵增加、而德功自懋矣。求主賜我恩佑、能識謙德之要、師法吾主之行。祝言

十六日 謙遜之利益性質

定像 想見吾主諾徒曰、弗變爾爲若孩。天國靡入。瑪竇十八篇
特求 求主賜我聖寵、能識謙遜之益、而知奮勉。

第一端 謙遜之利益 吾人從事修途、孰不求心身有益。既求有益、則知謙德之不可不修矣。今試卽謙遜之足以益人者、細述七端以思之。一、人心謙遜、則善志自誠。諸凡行爲、易得超性之功。二、人有真

謙必愛慕天主。且愛苦難及主苦架，以證愛主情切，是愛德因謙遜而益純。三、熱心光榮天主，願普世人民咸守天主誠命。四、持謙遜以盡卑下本分。凡師長所教所命，悉承之以誠樸忠直之心，毫無背誤。五、視己身所歷苦患，皆不足準己罪惡，以補主榮。則克己含忍諸德，亦因謙遜而自生。六、隨地隨時，務歸謙遜，於事一無妄想，於己一無滿足。卽有所作爲，悉依上主恩佑。七、心志平和，坦然終日，厚以責己，薄以責人。遇人之輕視己，毀侮己，雖旁觀以爲難受，而謙遜者每處之如夷，且以爲得意。昔一神師謂謙者不論處何境界，天堂時在其心。誠哉，是言也。又聖經稱謙德爲重寶明珠。瑪竇十三篇可知謙遜爲最貴最美之德。故願修德者，上求主佑，下省己身，務使謙卑自牧，則內外心身，俱沾利益，豈不美哉，豈不幸哉。

第二段 謙遜之性質 人始於無有，成於灰土。對越天主，謙卑自下，理本至公至正。而亦能思慕令譽，保護美名，因其心欲人感服，以便光榮天主。故保祿宗徒常自處宗徒之末，耐勞忍辱，毫不尊大。獨於傳教時，每述己艱苦，力護己榮，欲人尊敬。何者，蓋心在榮主，無害於謙德也。然謙遜者，非心有所畏，不足以行大事。因其倚靠天主，不恃己之才力，故外觀似怯。實則非驕傲者之營營於人毀人譽，反不足有爲者可比也。聖母至謙至遜，亦宣揚己所受之福寵。曰：全能者大展厥德於我，錫以異恩。且歸榮於主，曰：我靈感頌吾主，我神無任欣愉於救我者。今我懇求聖母轉達，望主賜我謙遜之德。 祝言

十七日 進修謙遜之法

定像 想見保祿宗徒訓人曰：基利斯督自謙至死，緣此天主顯揚

伊。

特求 求主賜我聖寵，俾能果毅恒心，用諸善法，以修謙遜。

第一端 戒傷謙遜之德 謙爲諸德之根，人能培植謙德，則諸德皆可由，此暢達秀實。一、思言行事間，勿存倨傲虛浮之氣。二、忘前日之事功德業，毫不私心自喜。卽思念及之，亦惟憶生平罪過，自抑於主前。三、遇驕傲之誘，卽行內心之謙，以拒傲敵。四、無正經大故，當躬事，或善或惡，皆無須道及。五、勿辭人譴責。六、勿以己言必是，已見必明，而欲制勝於人。七、衣裳冠履，起居行止，嚴戒矯同立異，動人指顧。總之溫良樸實，諸事皆出自然，毫無矜伐，致傷謙德。如是內外交謙，而謙之德蘊盡矣純矣。求主賜我毋忘己身卑陋。時深退抑，望主矜憐。

第二端 善用謙遜之機 天主每欲玉成我德，時賜我以謙遜之機。

爲我修德之助。譬如冬月舟向北行，非不知北風之寒冷也，然冒寒耐冷，則未幾達彼岸矣。又如兵卒閒居，非有晉秩之賞也，然戰攻奮力，則爵祿庶可獲矣。蓋其機非我自擇，而迎機奮勉，愈能鍼砭我病，磨礪我行。故當神魂憂擾，三仇誘惑時，務修謙遜工夫，以求善用機緣，修身改過。至於師長朋友之前，或因傳聞誤聽，或被旁人誣罔，致受上司戒飭。有時戮力從事，竭我忠誠，反無功效。有時誤會上意，自慶有功，反遭貶責。有時時地不能湊合，動靜輒拂心志，皆係天主所賜善機。我於是不惟無怨無恙，且正可假手於此，以求精進於謙德，而奮勇直前，降心相從也。求主多賜我謙遜之機，且賜我能善乘其機。

第三端 勤行謙遜之事 修道者不論何德何事，行之皆不可不勤。

況謙爲諸德之基，係修德救靈所最重者乎？夫曰勤行者，可知人於謙遜之事，非徒無年無月可不行，且無一日一時，可不行也。非徒善用謙機而行之，且宜尋覓謙遜之工而行之。居位無論高下，處境不分順逆，識己卑微，知己罪過，喜服賤役，樂受簡慢，無矯飾，無僞詐。如是，則內工既盡，外行自易，將得聖賢謙抑中之神樂矣。向至謙至遜之耶穌，求賜去傲存謙。祝言

十八日 耶穌乞水化人

定像 想見耶穌身憊，坐於井旁。

特求 求主賜我聖寵，或勞或息，皆得立功主前。

第一端 耶穌力憊 經載吾主傳教之始，聖若翰囚繫囹圄，如德亞人亦憎嫉吾主，於是由如德亞返加理勒亞，道經撒麻理亞，路遠且

艱。既至西加城，近雅各伯泉，耶穌身憊，憩坐泉旁。若望四篇人居世間，孰能無事。或在修院，或處公堂，或居家內，勞力勞心，各有本分。然當力疲心倦時，偶思休息，須臾務當自慰曰：我雖疲憊，實爲榮主救靈，與夫世俗之爲名利奔波，大相徑庭。况我之劬勞，可增天堂榮福，則是力雖疲乏，心究未嘗稍懈。聖奧斯定曰：作苦有終，酬報無終。獻我神形，願力役於吾主葡萄林中。求主賜我勤懇之心，務期實效可收，不致徒勞無益。

第二端 耶穌憩坐 吾主跋涉風塵，道阻且長，未免疲倦，困坐井邊，暫息片時。然卽此片時駐足之際，仍以善言勸導，感悟罪婦之心。且使彼都人士，歸化根基，漸開於此。可知凡諸修德者，宜效法吾主令範，或飲食歇息，或往外閒散，常勿忘天主召我進修之意向，及我榮

主救靈之要務。且略述往聖先賢事蹟，一以助人愉悅，一以養人熱心。使人於漫不經心之處，皆能受提攜之益，不亦美乎。求主賜我時懷誠潔之心，灼熱救靈之火。聖若望、伯爾各滿旁搜先聖嘉行奇跡，以助談資，我宜則效之。

第三端 耶穌善化 吾主與撒麻理亞婦人言談之頃，如何循循善誘，殊足動人遐想。始借其汲水之機，使其渴慕生活之泉。繼令呼喚伊夫，俾自認素行之穢。後訓以降生之奧，引其認己爲救世之主。於是荒淫婦女，反成爲幫助傳教之人，入城相告，率人信主。奇哉，吾主善誘之功也。然天主引我進修，始令我識己陋劣，繼示我世幻虛危，終使我離塵事主，固秩然有序矣。當謝主洪恩，且求主賜我善誘之能，使我於所屬之人，得待時乘勢，以成其美。回溯我有志淑人，而鮮

能見效者，得毋失之欲速，而虧於智慧乎。懇本名聖人，或本月主保，轉達天主，俾能化己化人。祝言

十九日 西加城人信主

定像 想見耶穌謂徒曰：予食，爲行遣予者之旨。
特求 求主賜我聖寵，俾諸事承行主旨。

第一端 耶穌蘊奧之食 撒麻理亞婦人入城，告人曰：一人悉示予，嚮予諸行。試往觀，庸非基利斯督時徒等市餉返，謂主曰：請師用膳。耶穌曰：予有食物，爾不之知。予食，爲行遣予者之旨，而終其事。若望
四篇今我細味主言，可知吾主欲救我聖我之心，極誠且懇，甚於飢者之求食。而我感恩報德之心，果何在耶。又吾主此言，亦訓我欲恆主心，必須明認主旨，忠信以行之。而我之行爲，果何若耶。且觀此，可

知宜熱我神火。爲榮主救靈。雖受飢渴疲困。不爲已甚。而我之神火。又何若耶。嗜義如飢渴者。乃真福。爲其將得飽飫。懇切求主。賜我在此真福者數中。省我神火冷淡之緣起。而求燦熱之。

第二端 耶穌留西加城 城內人聞婦言。往視耶穌。殊深悅服。遂殷勤留待。吾主僑居一日。人民聆訓後。信者益衆。謂婦曰。吾信。非因爾言。吾聞其語。吾知其實爲救世者。同上城中男婦。能首識吾主爲救世者。而欲留之。獲信德之寶。聖寵之珍。其榮幸固爲盛矣。然此彈丸陋邑。尙能請主勾留二日。俾衆聆聖訓。明識主美。今我幸蒙主召。屢承主旨。果能心虔志誠。精進我修爲耶。果何以得主樂居我心耶。吁。嗟耶穌。求爾訓迪我心。賜我知爾日明。愛爾日深。定志潔滌內外。祈主常留我胸中。

第三端 復往加理勒亞 耶穌去西加城、往加理勒亞、顯行奇跡、講道解經、令人悅服。宣傳聖化、作後人傳教之儀型。經云、耶穌去其地、往加理勒亞、始宣訓誨曰、悔改爾愆、蓋天國已近。同上、又瑪竇四篇、瑪爾谷一篇、倘我有誨人之職、亦須樹立聞望。蓋天主聖意、不欲我行靈異之跡、引人歸化。惟欲我純道誼之修、感人愛戴。且於日常講解間、當以緊要至理、根本大道、足徵於聖經所訓者、教誨眾人。庶可得以師主之表、行主之事也。向誨人靡倦、敷教靡息之耶穌、求訓我承行主旨。祝言

二十日 耶穌愈王子之疾

定像 想見有一貴人、跪伏主前。
特求 求主寬廣我倚主之心。

第一段 小王居憂求慰 救世主在加納地將顯聖跡，證己爲天主遣使感動眾人信德。故聖若望記時有小王厥嗣疾於加法爾納翁聞耶穌從如德亞，造加理勒亞出迓，請下療乃嗣，因病垂死。四篇王之認識吾主，躬親往迓，卒能蒙主洪錫，得救己靈者，因憂虞疾病使然也。故人遇艱辛逆境，卽以爲患難，而咨嗟怨恚者，無乃不智乎。然此王不知及早趨赴吾主，迨嗣子臥病垂危，始往敦請，亦不足爲人矜式。蓋人當身靈困頓，往往專其心志，求慰於世物之空虛。至不得已而叩求天主，亦無怪主不速加以恩錫也。我當讚揚天主仁智，每以艱憂爲福樂之端，投我神形於主手，定志於逆境臨身時，卽奔赴主懷。

第二段 耶穌訓責小王 小王望耶穌療己子病，信心未能盡善。因

不識吾主不往病人處。亦可愈其疾痛也。主故責之曰。弗目擊異行。弗信。王乃謙以受責。毫不推辭。求主愈殷。倚主愈切。曰。祈主速下。否則子休。主鑒其誠。賜以真全之信。給其所懇之恩。曰。返。汝嗣已痊。王信以別。同上主待吾人。往往如待斯王。有時似不允我求。或緩遲其錫者。欲我知其恩賜之珍。或欲我深忍耐。克己信望。恃怙之心也。苟能恒心切禱。主必不虛我所望。當向主曰。願主增我信德。訓我祈禱。路加十七篇。又十一篇。務於誦禱前。或誦禱中。虔發信主倚主之情。

第三端 耶穌恩賜小王 王之信德。雖真且全。然揆情度勢。可想見其歸志如飛。欲覩主言之效爲快。必深恨路較遠。而夜較長也。翌早起程。半途遇僕。告以世子之恙已痊。更不勝驚喜。詢疾始退何時。曰。昨日未初。瘡全退。厥父記昨耶穌允。適未初時。益信。舉宮僉信耶穌。

爲天主聖子，救世者主。若望四篇今我奇救世主仁愛好施，而欽崇讚美之。父愛子病，求主療治，主卽賜痊。又賜其父子及全家信德之恩，得敬主救靈，獲享永命。思於此，當益增我愛，勉勵我修。庶幾締交吾主，而獲其恩錫也。求主加我寵佑。祝言

二十一日 居加法爾納翁

定像 想見耶穌講教於加法爾納翁公所。
特求 求主賜我善聆主言，善用主寵。

第一端 返居之故 耶穌於加納地，既作數日勾留，復往加法爾納翁城居之。其所以捨納匝勒與加理勒亞諸城，而多留此邑者，瑪竇四篇解經師曰：因加法爾納翁，在若爾當河口，近地白利亞海濱，與諸邊城及諸鄰省接壤。人民最爲稠密，商賈往來，最爲繁盛。故吾主

居之、實有便於傳教淑人也。修道之人、有敷教之職者、惟有淑世救靈之望。不論何地何城、奉命皆須前往。然事有自能主裁者、亦可擇便於作爲之處而居之。究其心志、惟求榮主益人、未嘗以一己之利便爲念。此吾主之儀表、亦吾人行事之規程。當審悉其經權、而無或違悖也。求主寬廣我心、使不偏向於人物處所、而脫諸依戀之情。

第二段

耶穌講教

經載耶穌往加法爾納翁、瞻禮日卽入公堂、誨

衆。僉驚訝其訓、蓋如居尊誨衆。異於解經諸士。瑪爾谷一篇夫吾主

誨人、所以感悅人心、異於當時講經諸士者、不但以其居尊訓衆、宛如救世之師。且因其言行相顧、明顯不求己榮、惟求光榮聖父、拯拔人靈。非若解經者能言不能行、起居行動、惟圖一己之利、一己之榮而已也。今我爲人謀事、或施人德惠、能盡除干榮之念乎。否則何怪

人之鮮獲實益，而我徒勞於主前。求主賜我自忘，更於行愛人之事，尤能善於自忘。庶幾愈不念己，可愈邀主眷，愈顯主榮也。

第三端 驅逐污魔 公堂中人，有附污魔者，呼號曰：耶穌納匝勒諾，予於汝何與，曷來戕我。予知汝爲何人，爲天主之聖也。耶穌斥之曰：默，出自斯人。污魔暴挫其人，巨聲呼而出。同上觀此，則吾可會悟者，約有三端。一、人獲罪附魔，更染污魔，殊堪憐憫，我當戒懼自防。二、人能趨赴主前，則魔力悉成無用。故一遇誘惑，急宜倚怙天主而號求之。三、天主每自禍取福，如經紀污魔力虐其人，而吾主適用其機，以顯新教之真，鼓動時人善意。以故魔施暴戾，世遇艱屯，不可妄生疑怪。當思天主所以許之者，或將致榮聖教，裨益同人。吾亦惟虔誠懇主，得速獲神益已耳。按前二端求主之旨，向驅魔之耶穌，求加恩佑。

祝言

二十二日 起伯多祿妻母於病榻

定像 想見吾主携伯多祿妻母起於臥榻。

特求 求主賜我免染神形諸病。

第一端 主至徒家 吾主於加法爾納翁公堂，既顯神異之跡，可趁此時，與諸富貴者相交接，以便廣傳聖教。何祇偕雅各伯等往伯多祿及安德肋之家乎。吾主之所以然者，欲人知聖心惟愛樸誠節儉。意在慰人憂苦，救人急困。且其時西滿之妻母病瘥息偃。瑪爾谷一篇吾主思乘機療愈之也。今爾與世往來，同人交際，果乘機以救人靈乎。抑心意別有所注乎。況爾奉命在外，凡一行一止，果能以熱愛神火，甘貧美德爲務。不圖肉身快樂，飲食旨甘，及諸偏情之順適乎。

自省自責，未免多有慚德。嗣後宜慎宜改，求主佑我盡革私情。

第二端

主療瘡病

耶穌入西滿家，西滿之妻母患瘡甚篤。徒等遂

語及之，而爲之求。耶穌進榻前，携其手，起之，命瘡退卽退。同上，又路

加四篇吾主至西滿家，坐未煖席，諸徒不待病人請主，卽言及病人，

欲主加恩賜愈。吾人觀此，而知與人交接，猜人有何盼望，有何急需，

代彼預籌，先期輔助，爲愛德中極大功夫。且知人爲疾病患難者求，

最能悅樂主心，動主仁慈。故徒等甫求吾主，未及多言，而主卽施以

所願之恩。今我見昆季有疾痛艱辛等事，須曲從其意，爲之周旋。跪

伏吾主座前，代爲誠求。尤求爲本堂或本院疾病者，賜以平安得所。

日中更宜修神愛之德，以符聖伯多祿之訓曰：凡行，當以彼此相愛

爲先。前書四篇求主賜我有同德同心之美，毋徒有肉愛，以荒神愛。

第三端 人謝主德 病者卽起，而享耶穌及其徒眾。瑪爾谷一篇，路加四篇，病人既愈，起而供饗，以表知恩，實爲平常至性之事。蓋其幸延殘喘，克享天年者，悉由吾主所賜。今卽盡其心力，以事奉恩主，豈非理之當然。然則我之性命身心，以及三司五官之運用，無非上主格外寵錫。倘不專心致志，用以事奉光榮天主，則於知恩之情，公義之德，將謂何如。自訟自認前非，求主寬赦。向耶穌生養救贖無窮之大恩主，專誠讚謝。祝言

二十二日 愛人須間行禱主

定像 想見吾主自加法爾納翁城往野祈禱。
特求 求主賜我行愛人之工，常含祈禱之情。

第一端 醫諸疾痛 日既沒，人攜種種疾病者就耶穌。伊逐一手撫，

愈之。路加四篇吾主無窮仁愛，雖身力疲乏，時候不便，人眾稠密之間，凡來謁見求恩者，罔不如願以償。夫吾主本一舉手，一出言，已可愈眾人之病。然寧逐一手撫而訓慰之，以顯著其仁愛。故凡修德者，及爲人長上者，務宜心志和平，神恬氣靜，使人人皆可親近，以得神益。卽有時煩瑣不堪，而心當以慈惠爲歸。亦無庸峻拒，致欲見者必待之既久，始能晤面。保祿宗徒曰：天主簡越之人，肖似其聖子之像。致羅瑪人書八篇求主賜我效主仁愛，常存和悅之衷，以修碩德。

第二端 往野祈禱 瑪爾谷聖史載曰：耶穌晨起，往曠野祈禱。一篇
吾主於此立表訓人者三：一、在眾人前行善事後，須速離眾目，以避虛幻榮名。二、既勤勞於愛人之事，卽靜斂心靈，以免放心之累。三、欲立愛人之功，宜先行祈禱，且行之於清晨爲最美。蓋平旦之氣，壹志

凝神、謹行默禱、能致終日締交於主、而行事須可蒙主降福、獲多神益也。夫慕榮放志、怠善貪閒、諸弊、吾固應加意防閑。況上主洪恩、幸召我於此會、此院、豈無憂虞、豈無誘惑、吾安得不遵主懿表、勤行祈禱之工哉。自察何事有違犯主訓、尙其改之。

第三端

講教諸堂

加法爾納翁民衆、知耶穌出往曠野、遂覓而踵

至、留主無遠去。耶穌謂之曰、當往他邑、宣天國福音、緣予奉遣者、爲斯。乃周行加理勒亞諸地、講教於諸堂。路加瑪竇四篇吾主於曠野、旣行祈禱、今辭衆欲往他邑傳教、其立表以訓吾人者、約有三端。一、寬廣心志。一方一邑、未足以滿我胸懷。且旣行一善、旣修一德、不可拘墟自守、不求前進。二、旣奉長上之命、宜盡心力以行之。卽有知己留戀、或親密者、勸以稍遲無妨、皆不可順從、以誤長命。三、傳教救靈

之業、建於祈禱之間、而心恒契主。蓋保祿宗徒曰、種人靈之田、人藝植之、灌溉之。惟天主發育之、使之生花結實。致哥林多人前書三篇統前兩端之情致、向耶穌虔求要需。祝言

二十四日 從主宜別無依戀

定像 想見耶穌謂徒曰、人弗謝世有、非吾徒也。

特求 求主賜我心離世物、毫無依戀。

第一端 無戀世有 有一明經士謂主曰、師、任所往、予願從焉。耶穌

曰、狐居穴、鳥處巢、人子無枕首地。瑪竇八篇解經者謂吾主洞人心

蘊、今言如是者、因其人見吾主聲名藉藉、想從遊之餘、異日可望高官厚祿、故主對以直言。則貪求世福者、知主如此清貧、不禁志敗心灰、不麾而去。今日好善者、修道者、識主所訓神貧之貴、謙遜之珍、賴

主聖寵、捐棄世有、茹苦甘貧、殊爲美事。然未卽謂爲無虞也。因始善終惡、先貞後濁者、古來亦不乏人。惟以此爲前車之鑒、而惕勵其身、修斯可矣。求主賜我輕世安貧、能恒其德。

第二段

無戀父母

明經士旣去、吾主轉視一聽講者、欲其相隨。謂

之曰、從予。

路加九篇

是人願應主召、捐離世有而從、惟求遲緩數日。

曰、請主許先往葬父。

瑪竇八篇

意欲侍奉其父、爲之生養死葬、然後

隨主。主曰、任死者瘞死者、猶言任世俗之人、理世俗之事、爾惟從予、

往傳天主國。

同上倘我於父慈子愛之間、並無阻礙、主召、固爲我之

幸福、亦卽天主寵恩、當深心感激。然亦有旣受主恩、復自納於陷阱

者。如憂父母之熒獨艱辛、藉奉養爲名、復返塵世。卒之無慰親心、反

多自貽伊戚、良可慨也。我當向主曰、於魔隱計、主救我等。日以父母

或死或生者，託於天主。知爲主之故，愈卸依戀之情，主將愈加眷顧焉。

第三端 無戀親朋 聖路加述有第三人，意欲從主，亦求寬緩幾時。曰：主，我欲從汝，惟許我先歸，整治家務。耶穌曰：手扶犁而回顧者，弗克宜於天國。九篇猶言如扶犁而耕者，必前望，不得後顧。後顧者，必不得善耕。是修道者既從吾主，既入修途，不能干涉世事，顧恤親朋。惟宜忠勇前行，以獲進修之向。倘我於此能常遵主訓，無愧於心，果宜謝主洪恩，然不可自信自恃。蓋本性之弱，邪魔之狡，有出人意外者也。向耶穌專務修道之倡者，求賜克赴聖召，并不忘聖召之恩。祝言

二十五日 耶穌渡海止風平浪

定像 想見聖伯多祿小舟，搖蕩海中，耶穌安寢。

特求 求主固我倚主之心，能於患難時，堅持莫屈。

第一端 風浪大作 暮，耶穌偕門徒下小艇，謂之曰：渡湖往彼岸。遂

啟行，行時颶風作湖中，猛浪顛厥舟，水波充溢，人命傾危。渠在舟尾，枕而寢。路加瑪竇八篇，瑪爾谷四篇，三聖史紀海風狂作，適在與吾

主同行之際。身命既有可危，而吾主猶然熟寢。則其垂訓吾人者，亦多矣。一、凡遇誘惑，心志不寧，未可憾主離棄我等。二、境逢平穩，亦不可卽謂無虞，當思患預防。三、當心神擾亂，神靈失慰之時，切勿更改日前之善志，宜忠勇奮行。求主恕我向日畏怯過甚，多有怠忽。定志或處神樂，或有心憂，常務居吾主懷中，而深倚望之心。

第二端 主徒號救 當全舟危急時，徒等竭力支持，終難出險。遂近

主側呼醒曰、主、救我、詎弗顧、我儕將溺亡。曰、劣信人、曷怯。同土耶穌不責徒擾其安恬、惟責其劣信、不識耶穌之身、含天主性、形軀雖寢、神靈常覺、卽於寤寐間、亦能保護安全。此訓人於憂危艱苦時、宜效法宗徒之誠懇祈禱。卽有時主若不允我求、不遂我願、如高枕而臥者、正欲深我謙信諸德、勉我恒久之心、熱我依附之情也。恐我於此應受主責者亦多、求其憐赦、發我衷情。定志於艱難誘惑時、如達未聖王向主曰、主治子、予將無何乏。聖咏二十二篇

第三端 命海平浪 耶穌起、命風教海曰、默哉靜哉。風遂息、太平卽隨。同上吾主神勇神威、著於言、形於色。舟中人聞見之餘、不勝驚訝。是舟也、不但表我輩神靈、亦表今世之聖教會。顛簸海中者、表艱難窘迫、世俗頹風、異端充斥、裂教強橫、時事阻阨、種種波浪也。人意此

舟將爲沉溺者，不知幾十百回矣。然吾主在其舟，若罔顧罔聞，任其搖蕩。若是者何也？以試煉其德，砥礪其修，且使彷彿己身，先受苦難，後入上國光榮。路加二十四篇故雖有駭浪狂瀾，而主爲中流砥柱，決無覆溺之憂也。今當驚奇而感謝之。求賜聖教會，以人世弗能界之太平，俾我等盡脫仇懼，悉獲安靖。祝言

一二十六日 耶穌驅魔污魔求入豕羣

定像 想見一被魔者，跪伏耶穌足下。主謂之曰：污魔，出離此人。特求 求主賜我聖寵，能恒修純全之貞潔。

第一端 人被污魔之苦 耶穌顯己全能，既渡海止風矣，又欲示人知一切神靈，亦屬己之權下。經載渡海後，至熱辣塞諾地，遇二被魔者，力猛能斷繫縛，藏於墓穴，禍害行人。魔眾不啻軍陣，無衣無室，大

聲狂呼，以石自擊。瑪竇路加八篇，瑪爾谷五篇，聖史載其醜態如此，蓋訓人倘犯淫惡，苦楚與其相類。一、淫魔之勢甚猛，凡敗名傷身，棄善從亂，審判地獄，種種可懼之禍，皆不足遏止其狂性。二、犯淫者必有伴侶，身既投入火坑，且使與彼往還者，亦受其玷染。三、淫惡之罪，多難悉數，與污魔軍陣之多相等。凡心神寤寐，視聽言動，罔不穢褻，而懶惰、饕餮等罪，最易牽引。四、不知羞忤，如達未聖王所謂，等於蠢獸。聖咏四十八篇，愈流愈下，自戕自斲，無時寧輯。今我既蒙主佑，免陷此惡，獻己身靈於耶穌聖母，求賜堅志恒心，不論有何年歲，居何地位，常以污魔自戒，勉效天神之潔，而戰兢持守焉。

第二端 人得驅魔之福 耶穌見此人情狀可憐，曰：污魔，出離此人。魔哀求，勿驅之出境。時有羣豕，牧於山邊，懇主曰：願發我於豕，容入

其羣。耶穌許之。污魔出人，入豕羣。於是患魔者，無恙衣而坐。主令歸榮主名，曰：爾往親屬，可頌揚主，如何施恩於爾。瑪爾谷五篇，路加八篇。念我爲魔役久矣，罪惡之醜，與豕相似。幸蒙主佑，賜我改過自新，且能力拒魔誘，尙不至被如此污惡之魔。我當如何念主施惠而感謝之也。日中每發感恩之意，如保祿宗徒自謂曰：我之爲我，賴天主聖寵，再求吾主賜我不失此驅魔之福，并使邪魔永遠遠離於我。

第三端 人重世物之愚 熱辣塞諾民衆咸往視，見羣豕投海而斃，懼甚。懇耶穌去其境，恐主再行異跡，以不利於己。耶穌罰其人，乃如彼願，下舟返。路加八篇。世之不識耶穌爲無價珍寶，而速其離去者，多矣。修德者安貧茹苦，遠絕諸慳吝習染，惟善爲寶，惟主是親，豈非幸事。當謝主恩，求使我常得親近於主，毋致我神目昏盲，爲主所罰。

離棄於我。向本名聖人，誠切懇禱，代爲轉祈。 祝言

二十七日 耶穌起癱證赦

定像 想見一癱者臥榻，有人擡赴耶穌足下。

特求 求主賜我有此癱人信主倚主之德。

第一端 癱人信德之堅 耶穌返加法爾納翁城，人雲集歡迎，羣相就教。門外無容足地，有四人舁癱者於榻，欲置耶穌前，以人眾故，不得入。乃乘屋撤瓦，旣穴，縋癱人以榻，懸於眾人及耶穌之前。瑪爾谷二篇，路加五篇。癱人信主心堅，雖無門可入，乃設此乘屋之舉，以求愈己癱疾。然則我之德業，其癱廢者不爲不多矣。何以自閉痛悔之門，不敢改遷之路，不知用百計以求主療愈耶。況癱人急求病愈，而信主旣堅，主卽默啟以縋榻之良法，訓我勇於醫治靈魂之病。則吾

主至仁至慈，又豈不以愈癱之恩，而轉愈我之神病乎。求主賜我聖寵，俾覺我之病，銳意求痊。所有善志，迅速力行。

第二端 耶穌赦癱人罪 吾主視伊人信，謂癱者曰：子望，汝罪今釋。

瑪竇九篇，瑪爾谷二篇。癱者求主愈病，主不汲汲於此。然先動其心，使之真全痛悔，先得靈魂無恙。主之所以如此者，欲人知吾主降生於世，首欲拯治人靈。亦訓凡諸信友，宜以繕靈爲急務，毋徒想肉身安泰，而任靈魂困疲貧乏也。今我於言行間，果能專務內靈之事乎。能不貪形軀佚樂，致累己靈乎。且能晨興時，先注意於神業，思肉身之事少，思救靈之事多乎。自問之餘，知所痛改。定志凡誦，我等望爾，今日與我，我日用糧之句，不忘神靈之急需。

第三端 耶穌起治癱人 吾主既治癱人內靈之疾，將欲治其肉身

之病。且欲因此痊治神奇，使眾人及法利塞、明經士等，明知主有赦罪之權，實爲眞天主。乃曰：爾曹可知人子在世，有赦罪權。謂癱者曰：子諾汝起，肩爾榻，歸爾家。伊人卽起，眾前，肩榻而去。瑪爾谷二篇瑪竇聖史曰：僉視駭愕，僉頌天主。錫人大權如是。九篇我可效彼等驚奇主德，頌揚主能，感謝主恩，賜司鐸神權，得醫人靈性之癱，救人大小諸罪。向耶穌痊諸神痾者，求振我弱，并使我能振人之弱。祝言

二十八日 耶穌召瑪竇爲宗徒

定像 想見耶穌謂瑪竇曰：從予。

特求 求主賜我忠信之德，恒行聖召中當行之事。

第一段 瑪竇聖召之奇 耶穌出加法爾納翁，往海濱。見一人名瑪竇，又名勒未，坐征稅所，目之曰：從予。瑪爾谷二篇，瑪竇九篇，瑪竇既

爲稅吏，其心惟知理財聚斂。且職任卑鄙，居此者率多躬行不義，志驕體佚。乃吾主獨於其持籌握算時，以一轉瞬而加之聖召。是主心之奇妙，有萬分不可窺測者。而其所以遺訓後人，亦良非淺鮮也。今試追憶天主召爾之情形，凡才力勝爾，德性過爾者，主不之召。獨於爾，加以慈睇，錫爾聖召恩榮。且主召爾時，未必非爾迷心物欲，靈魂危險之時也。種種奇恩，爾今捫心思之，能勿急圖報效，不致虛其寵召乎？求爾主保聖人，及爾護守天神，偕同頌謝主恩。遇誘惑時，念主特寵，而知自勉。

第二段 瑪竇應召之奇 路加聖史載瑪竇一聞主語，卽起，捐棄諸事而從。五篇夫從主如此之速，可謂奇矣。有羅瑪總王儒良係背教者，謂此事非虛卽妄，彼蓋不明此理。凡求財縱慾之肉人，轉瞬卽變

爲棄世甘貧之神人者，係天主聖寵神妙之奇工也。然天主聖寵於爾，亦有可奇者矣。出爾意想，超爾心力，且亦反爾志願。正在爾抗違主寵，營求世務之時，天主神光照耀爾，使爾明識天主之外，萬物皆虛皆幻。玩味主言，而悟主旨，雖不能如瑪竇之敏捷，亦知順承主召。曰從予，今世獲百倍，後世享常生。瑪爾谷十篇偕聖母頌謝天主曰：全能者大展厥德於我，錫以異恩。吾願爾於畏怯之時，常思倚主聖寵，勇果直前。

第三端 瑪竇感恩之證 瑪竇以聖寵之光明，識主恩之奇妙，而顯己感激之情。故聖路加載其設盛筵宴耶穌。五篇聖瑪爾谷又言，稅吏暨罪人偕席。二篇夫彼所以邀斯人與席者，蓋欲眾認識吾主，服從聖化，而師事之。故設此筵宴，以證其感恩之誼也。予靈欲報主恩，

當效法宗徒，乘機引人歸附天主，以嘉言懿行，感人向善。且按超見之明，時宜之便，亦可動人求道進修之心。問爾能如是乎？賀聖瑪竇之寵榮。求爲轉達，使我心堅愛熱，依附吾主，力務修成。祝言

二十九日 精修聖召之尊貴

定像 想見吾主謂我曰，非爾擇予，實予選爾。

特求 求主賜我聖寵，行事常符聖召之尊。證聖召之尊，茲舉三理，

第一端 聖召之緣原 人當立身修域，苟時以聖召之原，置諸心目，亦可動奮勉而助修成。蓋人拋離父母家貲，以人世之榮，肉身之快，自主之權，一概置之不顧，且心志超乎本性。世俗每目爲愚癡，魔鬼每深加妬恨。則聖召之原，必不出於本性世俗魔鬼，而出於仁慈無限之天主矣。主曰，實予選爾。若望十五篇又曰，非盡人能悟絕俗之

言惟與之悟者得悟。瑪竇十九篇可知我既得主聖召，自當開拓心胸，卓犖行詣。凡呼吸之間，細微之事，切勿失其尊崇之意向，而好安佚，喜聲譽，怠惰克己祭獻之工，以負此聖召殊恩也。真福依納爵亞材物鐸曰：望主無許我行有不肖，而失爲天主子之貴介。尙其體味此言，奮志前修。

第二段 聖召之意向 我之棄世進修者，非爲邀同儕之稱羨計，亦非爲名分之尊貴計也。蓋世途多險，濁習易污。旣難完眞守樸，又易獲罪喪靈。今幸得天主加我聖召，非欲我榮主救靈乎？我之始應主召，非爲師隨主表乎？且我所深欲者，尤非在更高之榮福，而以此世爲煉獄，滌蕩我身靈，修成我德業，以便爲神聖之人，天主之人乎。聖伯爾納鐸每清晨自問曰：聖伯爾納鐸，伯爾納鐸，何爲來斯？我當以聖

人爲法，且時問我聖召之向何在，我來此地何爲。庶幾動我熱心，催我前進，不忘主召之向，不失進修之意。

第三端 應召之賞報 世有爭名求利者，心本欲安富尊榮，得名利之報。卒之榮祿不能久享，而地獄之苦辱，旋踵隨之。是不知其所報者，爲何矣。惟人能忠於主召，勤精德業，則其賞報，直超越諸賞報之上。蓋其功德之尊貴，亦非諸善工所可比焉。昔聖伯多祿向主曰：吾輩謝諸物而從爾，將如何。主曰：從予者，復活時，人子坐厥威顯座，爾等坐十二座上。又曰：凡棄家，謝兄弟姊妹父母妻子田畝爲我名，瑪爾谷十篇爲福音，（卽爲福音所訓之修成，）將蒙百倍，而享常生。瑪竇十九篇可知吾人宜求天堂賞報，珍重聖召之恩，而恒心振作。天主之外，我聖召之恩，亦歸聖母，向聖母求佑。 祝言

三十日 雅依祿女復活

定像 想見耶穌提死女手曰：予命汝起。

特求 求主賜我於誦禱時，有活潑之信，堅切之望。

第一端 堂宰之祈求 有公堂宰名雅依祿來跪耶穌足前，切求往

其家，緣惟一女，年近十二將死。

路加八篇

雅依祿之求主，所慚以主

意而得主俯允者，蓋有故焉。一、謙而敬。其言其狀，皆可愉悅主心。二、切而悲。爲慈父者將失其幼女，則情旣可憐，斯祈請亦爲懇至。三、樸而信。惟言求主辱臨之故，及己心愛戚之緣，餘皆託於主心仁慈，絕無煩絮。問我之誦經祈禱，能深謙祇敬，內外虔恭，如在天主無窮尊威臺前乎。能熱心切意，知己毫無力爲，而懇摯哀求乎。於忠誠樸實倚主之情，能無玷缺乎。自省之餘，效當時宗徒向主曰：望主訓我祈

禱、勉改祈禱中所有之愆。

第二段 堂宰之信德

雅依祿與耶穌行際，家有使者來，曰：爾女適

亡，曷煩師爲。然雅依祿聞此言，仍不失望，謂主曰：吾女適亡，乞辱臨，撫屍令甦。耶穌聞言，謂之曰：勿懼，惟堅信，女可救治。

瑪爾谷五篇，瑪

寶九篇，路加八篇，觀是，使信德不堅者，經此試練，將不能深心望主

矣。乃堂宰不問女之已亡與否，惟求主辱臨。則其信德，何若是之超奇乎。我也，心志無恒，遇事稍有艱棘，卽灰心敗志，不亦大可鄙哉。且吾主旣聞堂宰堅信之語，立時允，並不待其再四懇求，而我當人之有求於我，輒遲遲不應，一似故爲留難者，何也。蓋旣應人所求，又非如使死人復活之難事。苟施之敏速，則受恩者，覺其恩似乎更大。施惠於人，而必使人累次哀懇，旣損德於人目，亦減功於主前。求主

增我信心，充我愛德，使我效堂宰信德之堅，法主施恩之速。

第三端 死女之復活 聖蘇抵堂宰家，携女父母暨從者，造閨，提死女手，謂之曰：達利達古米，卽言女子，予命汝起。厥神返，而卽起。同上人事之奇，聖跡之大，令人目擊情移者，固莫若喚人自死復生。然聖伯爾納鐸曰：猶有聖跡更大更奇者，如靈魂之復活，固執與久犯之罪人，回頭改過是。然此類奇跡，天主豈非已顯於爾乎？聖師又曰：尤有聖跡之愈大愈奇者，修道人翻然改變，出於冷淡之幽塚，一如死而復生，再不陷於日前之失。今日者，恐我亦需此聖跡，當堅信切望，依恃天主，求天主顯斯奇妙。 祝言

六月二十一日 聖類斯公撒格

定像 想見聖類斯臥榻將死，無任歡欣。

特求 求主恩佑，助我效法聖人修成之用力，而能與於其所承之
寵錫。

第一端 聖類斯修成之用力 聖人者修而成之，非生而成之者也。
觀聖類斯修成之用力，尤足勸勉吾人。傳記聖人誦禱時，欲盡免分
心之失，連晷行祈禱之工，至四刻中毫不分心而止。亦記其欲克忿
怒之偏，時常防守其心情之動，卒能戒慎於怒氣未萌之先。又欲滅
其好高之念，喜人知其短處，樂人加以譏嘲。且畏靈魂絲毫之玷。甚
於蝮虺。於是端其步履，嚴其視聽，待己身如仇，行種種苛刻。及其求
進修會，告退世襲顯榮，何其剛強果毅。此皆證聖人之德，成於修身
之用力，非出於本性之自然。訓吾人有志希賢希聖，亦當努力以求。
懇聖類斯轉求天主，賜我心力之強，能善用所有修成之法。

第二段 聖類斯修成之恒心 聖人入會精修，年不過十八。既進初學之門，二年中聖善其身，求成其志。可謂無一息之停。因而德之精進，大有出人意外者。後數年分當攻書課讀，而於修省諸工，仍能銳志恒心，始終如一。及臥床將死，猶垂淚求人，責以苦鞭，移身於灰地，欲行補贖以終。吾儕入院進修，偕聖類斯同此意志，而欲修聖己靈。始亦知忠勤奮勉，覺於道德之途，不無進境。奈繼而志餒氣柔，不恒其德。卽年年行避靜，日日務神工，而於修成實際，卻顧莫前。自訟自認之餘，宜愧悔謙卑。祈主賜佑，復將我心提振，忠心避靜時所定之善志。

第三端 聖類斯勤修之賞報 聖類斯因其修成之用力，得天主酬以特恩，能善於祈禱，恒心契主。神慰滿靈，不禁墮淚。身靈清潔，質比

天神等皆是。其尤足爲吾人羨慕者，乃其善終，及其臨終之歡忭。聖人逝世前八日，寄書於其母曰：愛之之情，在同苦同樂。我母見此書後，想見出乎危險，入於永安，必當與兒同樂。卽就兒而論，在世之微苦，曾受幾何。痛心之哀淚，曾落幾行。乃竟蒙天主賜以永遠之福。一念及此，心中感激，未嘗有若是之深者也。全書之意，及將死之言，皆顯其心神之樂。令人知其將徑升天國，作吾人主保。沒後十四年，其母未亡，卽得列入聖品，亦古來無二之榮也。向聖人喜慶虔祈。祝言。

聖人生於一千五百六十八年，一千五百八十五年十一月棄俗精修，一千五百九十一年去世，一千六百五年初列聖品，一千七百二十六年正列聖品。

24

212214

